


पाकड पर प्रेत



डॉ. अमरेन्द्र

पाकड़ पर प्रेत

अंगिका कहानी-संग्रह

पाकड़ पर प्रेत

(अंगिका कहानी-संग्रह)

लेखक
डॉ. अमरेन्द्र



प्रकाशक

कृति : पाकड़ पर प्रेत
लेखक : डॉ. अमरेन्द्र
प्रथम प्रकाशन : ई. २००७
सर्वाधिकार : लेखक
प्रकाशक : अंगिका संसद, भागलपुर-२
मुद्रक : एम. एल. प्रिंटेर्स, भागलपुर-२
मूल्य : ५०/-

PAKAR PAR PRET By Dr. Amrendra

आपनों बचपन के
जे अभियो रुपसा के चानन नदी किनारी में
खेलते-कूदते होतै ।

—अमरेन्द्र

दू टा बात

ई कहानी-संग्रह के नाम की होतै—जखनी सोचलियै—तेँ एक-एक कहानी के शीर्षक मनोँ में ऐलै—बदरकटुवोँ रौद, वापसी, चन्दन विष व्यापत नहीं, आरनी-आरनी । मजकि नाम रहलै एक्के—‘पाकड़ पर प्रेत’ ।

लागलै, ई शीर्षक एक हेनोँ शीर्षक छेकै, जे सब कहानी के शीर्षक घुमाय-फिराय केँ बनेँ पारें । सब कहानी में कोय-न-कोय सुख के किंछ छै—यानी कि विशाल पाकड़ गाछी के छाँव आरो सब सुख पर भाङ्गटोँ बैठलोँ छै—प्रेत नाँखी ।

ई केना होय गेलै—कहानी लिखै के वक्ती तेँ सोचवो नै करलें छेलियै कि हेनोँ होय जैतै ! की कहानी के यहें नियति होय छै ?

जे हुएँ, हम्में आपनोँ ई कहानी सिनी के बारे में कुच्छू नै कहै लें चाहै छियै—कुछ कहतै तेँ विद्वान आलोचक और प्रबुद्ध पाठक—कि संग्रह रोँ कहानी कहानी छेकवो करै कि नै ?

मजकि एक बात जे हम्में कहे लें चाहै छियै, ऊ ई, कि संग्रह के दू कहानी—‘एक सावित्री रोँ मौत’ आरो दुसरोँ ‘रैन भई चहुँ देस’ ही हेनोँ कहानी छेकै, जे पुरानोँ कहानी छेकै, ओकरोँ में ‘एक सावित्री रोँ मौत’ आरो पुरानोँ’ । ई दोनोँ के बीच के पुरानोँ कहानी छेकै ‘भरखर राती के भोर’, जे रेडियो भागलपुर सेँ प्रसारित होलोँ छेलै, जे ई संग्रह में कोय कारणवश नै आवें पारलै । ई कहानी हिन्दी में ‘आधी रात की सुबह’ के नाम सेँ नवभारत टाइम्स, पटना १८ दिसम्बर १९८८ में प्रकाशित छै । एकरो पहिलें ‘एक सावित्री रोँ मौत’ के भी हिन्दी भाषान्तर के प्रकाशन १० जुलाई १९८८ के नवभारत टाइम्स, पटना में होय

चुकलौं छेलै । २००५ में आवी केँ एकटा कहानी लिखलियै—‘कहानी के कोख’ ।

फेनू बाद में जत्ते कहानी लिखलौं गेलै—ऊ सब २००६ में, जे ई संग्रह में छै । बस दुए कहानी ‘पगलवा मरी गेलै’ आरो ‘सुख’ ई. सन २००७ के सृजन छेकै । सब समेटी-उमेटी केँ तोरा सिनी के सम्मुख; स्वीकार करौं, तभियो ठीक, नै करौं, तभियो ।

चैत मास शुक्ल सप्तमी
वि. सं. २०६४

—अमरेन्द्र

कहानी-क्रम

१. पाकड़ पर प्रेत	६
२. बरकटुवों रौद	१६
३. वापसी	२३
४. चन्दन विष व्यापत नहीं	३२
५. माय	४१
६. कहानी के कोख	५१
७. जहाँ न आपनों कोय	५५
८. धरमदास रों कपली गाय	६४
९. एक सावित्री रों मौत	७५
१०. रैन भई चहुँ देस	८२
११. पगलवा मरी गेलै	९०
१२. सुख	९५
१३. भय	१०२
१४. रहस्य	१०४

पाकड़ पर प्रेत

रात उत्तरे में आभी ढेरे देर छेलै । जोगबरिया की आय सें रही रहलौ छै, कचहरी हाता के ई दुकानी में । जो न दिनों सें शहरो में गोड़ राखलै छै, वही दिनों सें । मतरकि कभियो ऊ आपना के है रँ अनभुआर हेनो नै पैलो छेलै, नै ई रँ भयभीते, जे रँ आय आपना के महसूस करी रहलौ छेलै । ओकरो चाय-पान के दुकान ठीक बरो गाछी के नीचे छेलै, जे ओकरो वास्तें घरो के काम करै, मतरकि आय यहें घोर ओकरो वास्तें राकस के मूँ रँ लागी रहलौ छै, गाछी के कोय्यो ठाहुर पर जेन्हें कोय चिड़ियाँ पंख फड़फड़वै आरो एक्को पत्ता सरसरावै, तेँ चौकी पड़े ऊ । ओकरो मनो में शंका के आंधड़-बतास चली रहलौ छेलै, “हमरो खूब मालूम छै कि आय दस सालो के बाद रमखेलिया के याद विसेसरा के केन्हें पड़लौ छै । आय तांय कहाँ हेरैलो छेलै ओकरो मति ? कहियो तेँ याद नै करलकै । हमरो खूब मालूम छै कि अनचोके ओकरो पिरीत केन्हें जागलौ छै” जोगबरिया ने मने-मन सोचलै छेलै आरो आपनो बाँया तरत्थी पर दाँया हाथ के एक घुस्सा जमैतेँ कहलै छेलै, “विसेसरा, बस यहें समझे कि तोहें हमरो भाय छेकें, ऊ सौतैले केन्हें नी, आखिर छेकें तेँ भाइये । जो भाय नै रहतिथै, तेँ तहूँ जोगबरिया के गोस्सा देखिये लेतिथै । कोर्ट कचहरी जे होतिथै, ऊ देखलो जैतिथै । आरो की कोर्ट-कचहरी के दाँव-पेंच तोहें हमरा सें ज्यादा जानै छें । अरे, हमरो जिनगिये कोर्ट-कचहरी के मुंशी-वकीलो के बीच गुजरलो छै । हमरा एकरो इलिम रहेँ-न-रहेँ कि चाय-पान में कत्ते चीनी-पत्ती आरो चूना-खैर लगै छै, मतरकि कानून केना चलै छै, ऊ तेँ हम्मं जानवे नी करै छियै । ई

चाय-पान, चीनी-चूना के ज्ञान ते रमखेलिया के छै, जेकरा तोहें उड़ावै ले चाहे छैं, मतरकि जानी ले विसेसर, तोरो ई मंसा जिनगी भर नै पूरैवाला छैं । हों..... ई तोरो ले लगोर होतौं, हमरो ले हमरो बेटा छेकै ।” सोचतें-सोचतें हठाते ओकरो ध्यान रमखेलिया दिश गेलै, जे दुकानी के एक ओरी में बेंची बिछाय के चित्त लेटी गेलो छेलै, छाती पर दोनों हाथ राखलें, एकदम घोर नींदों में ।

जोगबरिया भी ओकरे बगलो में सुतै छै, दुकान के समेटी-उमेटी, तीन बेंची के जोड़ी एकदम चौकी रँ बनाय लेलको आरो वहीं पर सुती रहलो ।

ऊ धीरें-धीरें बेंची सें उठलै आरो रमखेलिया के दोनों हाथ के छाती सें हटाय के नीचें करी देलकै, “कहै छै छाती पर हाथ राखी के सुतला सें खराब-खराब सपना आवै छै ।” वैनें माय सें सुनलो बातों के याद करने छेलै ।

छाती पर हाथ धरी सुतला पर रमखेलिया के ते सपना की ऐतै, हों, जोगबरिया के आयकल खराब-खराब सपना जरूर आवी रहलो छै, जौन दिनों सें ओकरा अशुभ के शंका मिललो छै आरो यहें सपना के कारण ऊ आयकल रात-रात भरी भरसक जागले रही जाय छै । जगले रहै छै ते हेन्है के नै; आयके ते बात छेकै, वै नें विसेसरा के सरजुग के पान दुकानी पर देखले छेलै । पान लेला के बादो ऊ घंटा भरी वहें दुकानी पर खाड़े रही गेलो छेलै । चबाय ते रहलो छेलै पान, मतरकि ओकरो नजर रमखेलिये दिश छेलै । वैं समझी रहलो छलै कि हम्में ओकरा नै देखले छियै, मतरकि ओकरा की मालूम, जौन दिना सें ओकरो नीयत के पता हमरा चललो छै, हम्में आपनो अजनबी गहकियो पर नजर राखै छियै । आयकल, ते आदमी के दिन-दहाड़े उड़ाय लै भागै छै, रमखेलिया के आभी उमिरे की होलो छै, बारह बरिस के ते होतें-होतै ।”

पता नै ओकरो मनो में की ऐलो छेलै, ऊ धीरें-धीरें सरयुग के दुकानी दिश बढ़लै, वाहीं सें हिन्नें-हुन्नें सब दुकानी के आगू-पीछू के कोन्हराय-कोन्हराय के देखले छेलै आरो फेनू निचिन्त होय आपनो बेंची तक लौटी ऐलो छेलै । सोचलकै, “रात बीतै में अभियो आधो पहर बाकी छै, केन्हेंनी वें एक झपक मारी लौं । फेनू ते फरचो होय के पहिले, जे आँख खुलतै ते दस बजे रातिये फुर्सतकांही कोय शंका-ऊंका के बातो नै छै” आरो केहुनी बल्लो लेटतें आपनो टाँग बेंची पर चढ़ाय लेले छेलै । नींद लानै के खयालो सें वै आँखो बन्द करी लेलकै, मतरकि आय ओकरा केन्है के नींद नै आवी रहलो छेलै । रही-रही के विसेसर के चेहरा ओकरो आँखी में घुरी आवै छेलै, आरो ओकरो चेहरा याद करी ऊ फेनू बुदबुदेलो छेलै, “केन्हो छटलो बदमाश लागे लागलो छै ई । आय

सैं दस साल पहिलका सैं एकदम अलग । तखनियो कड़ा रुख के तें छेवे करलै । नै रहैतियै तें खाली माय्ये-बाबू के की, पूरा टोला-मुहल्ला के विरोध करी के फुलटुस दा के विधवा कनियैनी के आपनो घोर केना लै आनतियै ! विसेसरा नें टोला में हकाय के कही देलें छेलै, “रमखेलिया आबें हमरो बच्चा छेकै, आरो एकरी माय हमरी कनियैन ।”

वैनें पिछलका दिनों के याद करलकै, “मतरकि सालो नै पुरलो होतै, घरों में गाली-गलौज मचे लागलो छेलै । रमखेलिया माय के ओकरो सांय के नाम लैके की-की नै गाली पढ़े लागलो छेलै, आरो रमखेलिया, रमखेलिया तें टुक-टुक खाली ताकै । भुखलो-प्यासलो टैवैतै रहै । जबे मय्ये के दाना नसीब नै छेलै तें बेटा के कहां सें होतियै । टोला-पड़ोसों सें तें पहलें सें दुश्मनी छेलै, ई बीहा लै के । फेनू विसेसरे कौन कमाऊ छेलै । दिन भरी हिन्न-हुन्न सें झाड़ी लाने तें घोर चलै.....विसेसरां भले घरों सें आँख मुनी लेले छेलै, आरो सब केना मुनतियै ! एक घरों के दू दुआर रहलै सें की होय जाय छै । कानवों-कपसवों दीवार-द्वार थोड़े जानै छै । हमरो जी फाटी के रही गेलो छेलै,

“मतरकि सचमुचे यहें बात छेलै ?” जोगबरियां आपनो दिमागो पर बल देले छेलै आरो तुरत्ते ऊ बोली उठलो छेलै, “नै, नै, ई तें नै छेलै । बात कुछु आरो छेलै । जो न दिन हम्मं ओसरा पर रमखेलिया के खेलतें देखले छेलियै, वही दिन हम्मं एकदम सें अवाक रही गेलो छेलियै, ओकरा निरयासी के देखले छेलियै—एकदम हमरे बेटा के नाक-नक्श लेले छै । सोचले छेलियै—आय ऊ जो जिन्दा रहतियै, तें हेने होतियै, छिनमान हेने ।”

केन्हो पगलाय गेलो छेलै जोगबरिया—आपनो गोदी में आपनो पहिलो टा पूत पावी के । सोरी घोर भी नै बुझले छेलै वैनें आरो दिन-रात सोरिये घरों में घुसलो रहै । टोला-पड़ोसा के रिश्ता में भौजाय लगेवाली जनानी सिनी लाजो लगावै, मतरकि ओकरा पर कोय असर नै । वै सोचें लागलै—कल्ले-कल्ले सपना देखले छेलै वैनें, अपनी कनिलयैनी से भी कहीं ज्यादा.....मतरकि छवो महीना भर नै टिकलै, आपनें नसैलै तें मय्यो के साथे-साथ लै गेलै । हँकरी-हँकरी के जान दै देले छेलै, एकदम सें तेजी देले छेलै अन्न-पानी केपता नै, रमखेलिया के देखतै केन्हें हमरा लागलो छेलै कि हमरे बेटा फेनू जनम लेले छै, आरो ऊ दिन एक बातों पर रमखेलिया माय के गोदी सें एकरा लै के हम्मं यहाँ चललो ऐलो छेलियै । ऊ दिन सें लै के आय तक कोय्यो नै खोज-खबर लेलकै, विसेसरा तें तखनी ई बातों सें खुशे होलो छेलै.....यहाँ ऐला के ठीक साले भरी बाद गाँव के पुरानो दोस्त मंगलिया सें हमरा भेंट होलो छेलै तें वहीं बाते-बात

में बतलै छेलै कि रमखेलिया केँ है रँ लै आनला पर विसेसरां कहलै छेलै—ठिक्के होलै, जे विपत्ति उठाय केँ लै गेलै, अच्छा होतियै कि ओकरी मैय्यो केँ उठाय लै जैतियै, जानो केँ जंजाल छुटतियै । सारो, आपनो पेट तेँ पालना मुश्किल, वहाँ पर ई मौगी लेँ अन्न जुटैवोँ कत्तेँ मुश्किल छै, हम्मी जानै छियै । ऊ तेँ जुआनी के तरंग में हम्में अन्हरो बनी केँ एकरा लै आनलियै । नै आनतियै तेँ एक पेट साँढ़ नाँखि डकरतेँ पालतेँ रहतियै.....

जोगबरिया मने-मन भुनभुनैलोँ छेलै, “तेँ खबर कैन्हें नी करवाय देलैं, तोरा लगोर जनानी उठाय केँ साहस, तेँ हमरा नै । जोँ रमखेलिया माय आवै वक्ती जरियो टा आपना मोँन देखैतियौ, तेँ सब फैसला तखनिये होय जैतियौ । हम्में तेँ यही सोची ओकरा सेँ कुछ नै कहलै छेलियै कि की समझतै वैं—ई घरों के लोग जनानी केँ लोटा-थरिया समझै छै, जे चाहे वही उठाय केँ चली दें । तखनी ई बात जोँ हमरोँ मनोँ में नै ऐलोँ होतियौ तेँ विसेसर आय ऊ हमरा लुग होतियौ । दुकानी के पीछू तेँ खाली पड़लोँ जग्घोँ छेवे करै, एकटा ढावा खसाय देतियै । वही में उमिर काटी लेतिय वैं । हों आबेँ उमिरे तेँ काटना छै । तोहें तेँ ओकरा उमिरो नै काटे लेँ देतेँ होवैं । ऊ जनानी केँ साँय होय केँ दावाहो करै छें आरो पेटो नै पालै छें.....विसेसरा, जोँ ऊ यहाँ होतियै तेँ पेट खातिर कोय मरद केँ पैर नै पकड़ै लेँ पड़तियै, जानी ले । मंगलिया केँ एक बातों सेँ हम्में जानी लेलेँ छियौ कि तोहें ऊ बेबस जनानी सेँ की-की करवाय रहलोँ छें । की समझलेँ छें—सरंग में गहन लागै छै तेँ खाली चादे-सुरूज जानै छै—गहण तेँ बाद में लागै छै, दुनिया पहिलें जानै छै आरो फेनू आग काँही लागौ, धुइयां तेँ दूर ताँय दिखाय पड़े छै ।”

ऊ दिन बाजार करतेँ हठाते लपटोलिया के डोंगी का मिली गेलोँ छेलै, तेँ जोगवारी केँ गाँव केँ खिस्सा सुनैतेँ हाँसी केँ कहलै छेलै “आबेँ तोहरोँ भाय तेँ काफी मौज-मस्ती में छौ, खाय-पीये केँ कोय कमी नै । कनिर्याँय केँ महतो बाबू कन नौड़पनी केँ काम मिली गेलोँ छै, फेनू कमी कथी केँ रहतै । आबेँ तेँ सुनै छियै, विसेसरोँ डाँटना-फटकारना छोड़ी देलेँ छै, महतो बाबू डाँटे-फटकारै सेँ मना करलेँ छै । आबेँ की जानौ, की बात छै.....” महतो बाबू केँ बात याद ऐहें जोगबरिया बेचैन होय उठलै ।

जोगबरिया केँ मालूम छै कि महतो बाबू इलाका भरी में कत्तेँ दबंग आरो मातवर आदमी छेकै, हुनकोँ इच्छा केँ विरुद्ध तेँ पंचायतो नै खखसै छै । ओकरा याद पड़लै—यहें महतो बाबू केँ घरों सेँ दू सौ गज केँ दूरी पर सिकोरिया केँ बारात जाय रहलोँ छेलै, सिकोरिया डोली पर बैठलोँ छेलै । महतो बाबू केँ

सामना से भला सिकोरिया जेन्हों आदमी डोली पर बैठी के बीहा करै ले जाय, ई ते एकदम अनकूठों बात भेलै । महतो बाबू ने आपनो दू आदमी के भेजी के डोली लौटवैले छेलै आरो आपने घो के सामना वाला खजूरी गाछी से सिकोरिया के बाँधी के की रे पिटवैले छेलै, वहे खजूरी गाछी के खजूरिये साटो से । कहले छेलै—हमरो आँखी के सामना से डोली पर चढ़ी के जाय के गौरव के परिणाम की होय छै, जानी लेले नी ।.....

जोगबरिया के सौसे देह भौआय उठलै, जेना महतो बाबू के आदमी ओकरे देहो पर वहे खजूरी के साटो बरसावे लागलो रहे । देखते-देखते वैने आपना के सिकोरिया के जग्घा पर बाँधलो पैले छेलै आरो सामने में महतो बाबू कुर्सी लगवाय के बैठलो होलो गुराय रहलो छेलै, “की रे जोगबरिया, पुस्त-दर-पुस्त तोरो बाप-दादा हमरो घो के जोगबारी करते ऐली आरो वहीं से घो र भरी के पेट पोसते रहलौ..... से कते अन्नो से खून बढ़ी गेलौ कि हमरुहे से रार करै पर उतरी ऐलो छै.....बिना हमरा पुछले, विसेसर के बेटा के उठाय के चली देले—सुनाफड़ में बनलो मन्निर के देवता के सोनावाला आँख उखाड़ी लेले, आंय रे.....आँख की गाड़ले होले छै, आँख उठाय के हिने नी देख”

आरो जोगबरिया के लागलो छेलै कि वै ने जबे आँख उठलकै ते देखलकै, वहाँ पर महतुए बाबू ने, ओकरो भाय विसेसरा भी खाड़ो छेलै आरो विसेसरे के बगलो में ओकरी कनियैन । ओकरा लागले—महतो बाबू के फेनु आवाज उठलो छेलै, “विसुनमा, जरा दे ते फेनु से गिनी के बीस साटो एको देहो पर । बच्चा-चोरी के केस अभी एकरा मालूमे नै छै ।”

जोगबरिया के जना करेन्ट लागी गेलो रहे । ऊ एकदम तिलमिलाय के उछली पड़लो छेलै । डरलो-डरलो आँखी से चारो दिश हेरले छेलै । कांही कुछ न छेलै । ओकरो आपनो स्वभाव पर गुस्सो ऐलो छेलै, मतरकि है सोची के कि कहीं है सब होयवाला घटना के पहिलको भास ही ते नै छेके । ओकरी माय कहै छेलै, कोय बहुत बड़ो घटना होय वाला रहे ते मने पहिले ओकरो भास कराय दे छै । ई बात याद ऐहें ऊ फेनु एकदम से सिहरी उठलै । जो विसेसरा महतो बाबू के बल्लो पर एकरा मंगवाय लेलकै, तबे की होतै । हमरो दुनिया के की होतै । रमखेलिया आगू में खेलते-धूपते रहै छै ते बेटे नै, खगड़िया वाली भी आँखी के सामना में घुरते रहै छै । मरला से की आदमी के यादो मरी जाय छै, फेनु हमरो बिना ते यहू मुरझाय के रही जैते । देखे नै छियै, घो र जाय के नामे से केन्हो मनझमान बनी जाय छै..... आय से पाँच साल पहिले एकरी माय ऐली छेलै, एकरा ले ले ही । कते मनैला-कहला के बादो ई यहू कहते

रही गेलै, हम्मैं बाबू छोड़ी केँ कहूँ नै जैबौं” ऊ क्षण केँ याद करतें जोगबरिया के आँख लोराय गेलै आरो बोली उठलै, “आरो हम्मूं तोरा नै छोड़े पारौं बेटा, तोहें केकरो लें लगोर रहे पारें, हमरो लें एकदम अपनसुत ।”

एक क्षण लेली लागलै कि ऊ एकदम मजगूत होय उठलो छै । काहीं सें कोय डोर नै कि तखनिये एक शंका ओकरा मनझमान करी देलकै—मानी लै छियै विसेसरा के कहला पर महतो बाबू कुछ नहियो ध्यान दे, मतरकि रमखेलियें माय जो विसेसर के बातों में आवी केँ महतो बाबू सें कहै, तबे की होतै ?.. कोय ठिकानो नै, आखिर कल्लो मरद मारें-चुरें, दुल्हा-कनियेन एक समय एक्के होय जाय छै ।” जोगबरिया नें मनो के शंका केँ बल देतें मने मन कहलें छेलै, “कोन ठिकानो, विसेसरा के बातों में आवी केँ रमखेलिया माय महतो बाबू सें कहलें रहे कि हमरा हमरो लड़का मंगवाय दे, हमरो सहारौ होतै आरो बचलो समय में मालिको के कामो करी देतै । हुएँ-न-हुएँ, महतो बाबू ई सोचलें रहे कि रमखेलिया तेँ आबेँ खेत-बारी करै लायक होय्ये गेलो होतै, केन्हें नी ओकरा बुलवाय लेलो जाय.....मतरकि ज्यादा तेँ यहें बात सच लागै छै कि है चाल विसेसरा के ही छेकै । ओकरा मालूम होय गेलो छै कि रमखेलिया एकदम चालू-पुरजा होय गेलो छै । गाँव में चाय-पान के दुकान खोली देभें तेँ हमरो बुढ़ारी तक के व्यवस्था होय जैतै आरो ई बात वें रमखेलियो माय लुग रखलें होतै, शैत यहू कहलें होतै कि वें जाय केँ महतो बाबू केँ कहे—हुनी जेना भी हुएँ रमखेलिया केँ गाँव बुलवाय दे ।मतरकि है हुएँ नै पारें” वैने आपनो शंका केँ एकदम निर्मूल करतें हएँ आपना केँ समझलें छेलै, “जो हेने बात होतियै, तेँ रमखेलिया केँ गोद में तखनी देतें ई कहतियै—आय सें तोहीं एको बाप । ई तोरहे छाया, तोरहे लाठी—वैने विसेसरा के बात एकदम सें टाली देलें होतै—मारो-लात खाय केँ नै मानलें होतै, आखिर वहुँ तेँ जानै छै कि कोनी विपदा के घड़ी में हम्मैं ई लगोरो केँ बचैने छियै.....” ऊ ओकरो दिश सें निचिन्त होय केँ फेनू विसेसरा बारे में सोचलें छेलै, “जे हुएँ, जो विसेसरा यहाँ ऐलो छेलै तेँ आरो कुछ व्यवस्था वें जरुरे करलें होतै । हुएँ सकै छै कि दू-चार आदमी केँ आरो हिन्ने-हुन्ने बैठलें रहे, आरो समझलें रहे कि—सुनाफड़ देखलें रमखेलिया केँ उठाय लेना छै । आरो जो मानी लें, विसेसरा रमखेलिया केँ गायब करवाय में सफल होय जाय छै तेँ हम्मैं की ओकरा पावौं पारवै ? नै कभियो नै, रोजे तेँ बच्चा गायब करै के बात सुनै छियै, आरो फेनू महीनो-महीनो सुनतें रहै छियै कि हो बच्चा नै मिललै—आखिर मिललै तेँ फलां जंगल में टुकड़ा-टुकड़ा करलो.....”

जोगबरिया एकदम घामेँ घमजोर होय उठलै । ओकरा लागलै कि ओकरो गोड़ थरथरावेँ लागलो छै । जेना आपना पर ओकरा कोय अधिकारे नै रही गेलो रहेँ । नै जानेँ कैन्हें ओकरा लागेँ लगलो छेलै कि विसेसरा के आदमी सिनी हिन्नें-हुन्नें काँही छिपलो बैठलो छै । जबेँ कि वैँ जानेँ छेलै—ई सब ओकरो भरम छेकै, यहाँ तेँ रातो भर कचहरी जागले रहै छै, दुए बजेँ चुल्हा में आग पड़ी जाय छै आरो चार बजे भोर सेँ हॉटलो में खाना बनाना शुरू होय जाय छै, एक होटल के बात थोड़े छेकै, दस-दस हॉटल में सवो सौ नौकर-चाकर जमले रहै छै । एक हाँक देतै, तेँ पूरा कचहरी गनगनाय उठतै । तहियो नै जानौ, आय जोगबरिया केँ ई सब बातों पर कोय विश्वास नै होय रहलो छेलै । ओकरा लागी रहलो छेलै, सब कोय ऊँधी रहलो छै । भय में ओकरो आँख वकील तरुण बाबू आरो मुंशी अशोकी बाबू के बैठकी दिश गेलै, जहाँ पर हुनका दोनों के उठलै कोय-न-कोय बैठले रहै छेलै, आय वहाँ पर कोय नै छेलै । जोगबरिया के हृदय अनहोनी होय के आशंका सेँ भौआय उठलै, “की सचमुचे में तेँ कोय अनहोनी नै होय वाला छै !” मतरकि वैँ जानेँ छै, पिटपिटिया के बात अलग छै, एकरा सेँ अलग ऊ पांचो आदमी केँ अकेल्ले देखेँ सकै छै, यहुँ उमिरो में एतना ताकत तेँ छेवे करै । वैनें सरंग दिश देखलकै—आभियो फरचो होय के दूर-दूर तक ठिकानो नै छेलै, जबकि बोँर गाछी पर बैठली चिड़िया सिनी एक दाफी हाँक पारी चुकलो छेलै ।

पहिलो दाफी ओकरा लागलो छेलै कि ऊ आय तक मुर्दघट्टी केँ जोगी रहलो छै, जहाँ लोग आवै छै, आपनो संबंध-विच्छेद करै ले । आरो बड़ी थकचुरुवो होय केँ सोचले छेलै “फेनू हैनो जग्घो केँ जोगिये केँ की होतै । तभियो रात तेँ काटनै छै ।”

जोगबरिया नेँ आपनो तीनो ठो बंची केँ रमखेलिया के बेंची सेँ सटाय देलकै आरो वही पर गोड़ बिथारी केँ बैठी गेलै । फेनू सिरहाना दिश एल्लेँ खिसकी ऐलै कि ओकरो आरो रमखेलिया के तरबा एक सीधी में आवी जाय । वैनें आपनो गल्ला सेँ लिपटलो गमछी केँ उतारलकै आरो आहिस्ता-आहिस्ता ओकरा आपनो साथेँ रमखेलिया के एड़िया के नीचेँ सेँ पार करी देलकै । ओकरो दोनों छोर केँ एक करतें आहिस्ता-आहिस्ता गाँठ लगैलकै । एक गाँठ नै, तीन-तीन गाँठ—कस्सी केँ, होले-होले कि रमखेलिया के नीन नै टुटेँ । जोगबरिया एक दाफी फेनू ओकरा देखलकै, ऊ आभियो निभोर सुती रहलो छेलै । दोनों केहुनिया के सहारा लेतेँ वहाँ वहाँ पर चित्त लेटी गेलै—ई तीनडेरिया पर आँख गड़नेँ ।

बदरकटुवों रौद

“कुल्हड़िया चुनाव में खाड़ो होय के रहतै ।.....कुल्हड़िया” आपनो नाम के याद करतैं ओकरो मोन एकदम कससो होय उठलै, “हे नाम जरूरे कैथ टोली या बभन टोली आकि रजपुतानी टोलो के लोगे राखले होतै । गुअर टोली के चौधरी परिवारो के भी करतूत हुए पारे । यहू भला कोय नाम होलै—कुल्हड़ियानै हमरो बोली कुल्हाड़ी रँ, नै करतूत, तभौं हम्मं कुल्हड़िया आरो जेकरा आँख न कान, ओकरो दिपुआ नाम । शिवचन्नर के बेटा के सूरत सब्भें देखवे करै छै, मतरकि नाम की छेकै—सुदर्शन ।” ई सोचिये के, आभी-आभी जे ऊ आपनो नामो से कलपित्तो हेनो होय गेलो छेलै, हाँसी पड़लै, “बड़का टोलो के यहें रँ रिवाजे रहलो छै” वैनें मने-मन सोचले छेलै आरो सामनें में राखलो मूढ़ी-कचरी के बीचो में दाँया हाथ के बिचलका ओंगरी दुकाय के घुमावे लागलो छेलै । “एतना टा मूढ़ी-कचरी से भला की होय वाला छै” अजनसिया ने कहले छेलै, “जानी ले कुल्हड़िया, माल से चार गुना ज्यादा चखना रहै छै, तभिये खाय-पीये में मजा आवै छै, ठहर हम्मं जंगली दा कन से पाँच टका के आरो कचरी ले आवै छियौ ।” ई कही के अजनसिया जे गेलो छेलै ते आभी तांय नै लौटलो छेलै, दस मिनिटो से ज्यादा होय गेलो होतै ।

“लागै छै, वें बनलो-बनैलो के जग्घा पर ताजा छकवावे लागलो होतै, तबे ते आध घन्टे के बरोबर देर समझो । भीड़-भाड़ में ताजा के चक्कर । अजनसिया के समय-कुसमय के कोय ज्ञान नै छै.....ज्ञान रहतिये ते साधू महतो के सामने में ई कहतिये, ‘कुल्हड़िया, अबकी तोरा इल्कशन में खाड़ो होन्है छै, छो या खो । फैसला होय के रहना छै’ अजनसिया के बातो पर महतो की रँ कनखलो छेलै, आरो एकरो बाद की हुनी चुप्पे-चाप बैठलो होतै, सब औजार

भिड़ाय देलें होतै । अखाड़ा के पुरानों पहलवान छेकै, कोन दाँव-पेंच के इलिम नै छै,.....बाप रे बाप, ओत्ते बड़ो लाग-भाग वाला मिसिर जी जें दिल्ली सें ओत्ते बड़ो मंत्री के उतारी देलकै, ई मुर्दघट्टी रँ गाँव में, ओकरा तेँ मात दै में देरे नै लागतै महतो जी के; तेँ भला हमरा हेनो इग्गी-दुग्गी के की बुझतै, मतरकि जे हुएँ, अजनसिया के बातों पर कनखलो छेलै महतो जी जरूरे आरो कनखे के कारणो छै, होन्है के नै.....महतो बाबू के जत्ते चलती रहौ कैथपट्टी आरो बभन टोली में, कुम्हार टोली, रजक टोली आरो बेलदारी टोला में हुनकोँ एक नै चले वाला छै आरो जो ई तीन पट्टी केँ मिलाय देलोँ जाय, तेँ की मजाल छै कि चुनाव के फैसला महतो जी के पच्छोँ में होय जैतै” ई सोचिये केँ कुल्हड़िया के आँखी में एक चमक आवी गेलै । ऊ हठाते एत्तेँ गदगद होय गेलै कि अजनसिया के बिना ख्याल करल्लैँ एक मुट्टी चखना आपनोँ गलफरोँ फाड़तै वैमें राखी लेलकै । मुँह में चखना राखतैँ वैनेँ जाँधी के बगलोँ में राखलोँ महुआ के बोतल दिश देखलेलकै, मतरकि आँख फेरी लेलकै । सोचलकै, एक बूँद भी कम देखतै, तेँ कचकचोँ करतै, यहू नै कि येँ में पीवी केँ पानी मिलाय देलोँ जाय, मुँह में राखतैँ ओकरा सब पता लागी जाय छै, दस टाका बेसी दै केँ आनलेँ छै, दोनोँ बोतल.....फेनू, आवेँ ओकरा आवै में देरिये कतना छै, ऐन्है होतैँ” आरो ई सोचतैँ, मुँहोँ के चखना केँ जेना-तेना कुचली-काचली निगली लेलकै । सवादोँ के कोय सवाले नै छेलै । साथे-साथ वैनेँ मूरी-कचरी केँ वहेँ रँ समेटी देलकै, जेना अजनसिया समेटी गेलोँ छेलै ।

वैनेँ आँख उठाय केँ एकपैरिया दिश देखलकै । अजनसिया के काँही छायाहोँ तांय नै दिखैलै । जबड़ा आरो मसूड़ा में फँसलोँ कचरी के कण केँ वैनेँ जिह्वा सें लारी-लारी केँ समेटनेँ छेलै आरो फेनू ओकरा कंठोँ के नीचेँ उतारी देलेँ छेलै । मुँह केँ फुर्सत मिलतैँ वैनेँ आपनोँ ठोरोँ केँ विचित्रे रूप देतेँ सोचलेँ छेलै, “चार कचरी छकवाय में सौँसे दिन लगाय छै, तेँ एकरा सें चुनावोँ में टोला सिनी के लोग की छकैतै । ई चोट्टा आरो कुछ नै करतै, दस-पन्द्रह जुत्ता बीच रास्ता में सब के सामना दिलवाय देतोँ आरो कुछ नै । बड़का-बड़का के तेँ येँ दंगल में धाह-पता ढेर लागै छै । मंचे पर भाषण देतेँ बम सें उड़ी जाय छै, तेँ हमरा के पूछै छै । तैहाकरोँ चुनाव छेकै, जबेँ मुँहोँ सें कोय उरेफ नै निकालै छेलै, आरो जो उरेफ नै निकालै छेलै, तेँ बातो छेलै । आयकोँ नेता सिनी हेनोँ बाढ़-सुखाड़ के राशि निगलै वाला नै छेलै, नै घरढुक्की करैवाला—अखबारोँ में साफ फोटू छपै छै, लाज छै ! तभियो वहेँ सिनी जीतै छै.....जीतै वास्तेँ चाहियोँ बानर सेना, इनरासन के परी और पैसा, आरो हमरोँ पास की छै, एक अजनसिया आरो

साँझको वक्ती के एक बोटल दारू । एको इन्तजाम आयकल अजनसिये करै छै, नै तेँ वहु नदारत । गिनलो-गुथलो टाका चुनाव वक्ती लेँ सेती केँ राखी देलेँ छियै । आबेँ जे एक बोटल महुआ के इन्तजाम नै करेँ पारै छै, ऊ चुनाव वास्तेँ एत्तेँ-एत्तेँ टाका कहाँ सेँ लानतै । टाकाहौ की एक-दू लाख, कम-सेँ-कम तीन-चार लाख । एहै-एहै टाका होतियै तेँ बड़का पार्टी सेँ टिकिट नै लेँ लेतिये—है निरदलीय । जे भी दस-पन्द्रह हजार जमा करलेँ छेलियै, दिलो दा वाला अधकठिया खरीदै लेँ, वहु ई अजनसिया खरच-वरच करवाय देतोँ, आरो कुछ नै, दौड़ै-धूपै आरो नाम दाखिल करै में तेँ आभी तांय पाँच हजार उड़ी चुकलोँ छै । धन की छेकै, अरे जरा सेँ मुट्ठी सेँ खोलोँ तेँ ओकरा बीस जोड़ जोड़ निकली आवै छै, फेनू के ओकरा पकड़ेँ पावेँ ।”

कुल्हड़िया एक क्षण लेली मनझमान होय उठलै, मजकि जल्दिये आपना पर काबू पैतेँ खुद केँ समझैनेँ छेलै, “कोयरी धूपोँ सेँ डरलै आरो गुआरो पानी सेँ, तेँ होय गेलै तरकारी उपजैलोँ आरो भैंस पाललोँ । चुनाव छेकै, दस पन्द्रह हजार गेलोँ तेँ समझोँ कि घाम गिरी केँ रही गेलै, यहाँ तेँ बीस-पच्चीस लाख टाका उड़ी जाय, ई कहोँ कि देहोँ के सबटा खूने गिरी जाय छै, तभियो लड़वैय्या ठहरी नै जाय छै, तबेँ हमरहै की दुख । आरो जोँ लगतेँ-पिलतेँ हम्मू निकली जाय छियै, तबेँ तेँ गिनतेँ नी रहोँ सीबियाय मकान आरो मारतेँ नी रहोँ छापा । टेर लागतै नुनुआ केँ तबेँ नी । टेरो लागतै तेँ केसे नी करतै । केस खुलतेँ-खुलतेँ आरो सजा होतेँ-होतेँ की हम्मं जिन्दे रहवै । सरकारी केस तेँ नेता सिनी वास्तेँ खेलोड़ । केशो बाबू के की होलै, भला ओत्तेँ बड़ोँ पार्टी के ओत्तेँ बड़ोँ मंत्री । कोँन सीबियाय के दम छेलै घरोँ में राखलोँ सरकारी गोदाम के माल केँ निकाली लेतियै । सामान कहाँ राखलोँ छेलै आरो पुलिस छापा मारी रहलोँ कहाँ ! मंत्रियो खुश, विरोधियो खुश, जनताओ खुश आरो पुलिसो खुश—ई छेकै राजनीति के खेला । आरो जोँ ई पाशा हमरोँ पच्छोँ में आवी जाय छै तेँ मत पूछ.....” सोचतेँ-सोचतेँ ओकरा लागलै कि ऊ आबेँ कमर आरो माथा पर हाथ रखी केँ नाचेँ लागतै । ऊ भीतर सेँ एकदम गनगनाय उठलै आरो वहेँ खुशी में वैनेँ हाथ मूरी-कचरी दिश बढैलकै, मतरकि ओकरा छूए सेँ पहिलेँ हटाय लेलकै; जेना ऊ धोखाहै में बिच्छू केँ पकड़ै लेँ जाय रहलोँ रहै आरो ऊ संभली गेलोँ रहेँ । वैनेँ समझी लेलेँ छेलै कि चखना सेँ चुटकियो भर उठाय के मतलब छै, अजनसिया के गोस्सा बढैबोँ ।

“कचरी साथेँ फुलौड़ी छकवावेँ लागलोँ छेलियै, यही में देर लागी गेलै । की कहियौ मरदे, पर्व के मेला-ठेला रहेँ कि इलेक्शन-मिलेक्शन के मेला-ठेला, सब

सैं ज्यादा भीड़ जंगली के दुकानी पर” फुलौड़ी के चूर करी मूरी सैं मिलैतें अजनसिया कहलकै, “झूठ नै कहै छियौ, चुनाव में जों जंगली खाड़ो भै जाव, तें सब के मात दै दै । चुनाव चिन्ह होतै कचरी आरो घोषणा पत्र में लिखलो जैतै—बड़का होटल बंद करी के वै जग्घा में मूड़ी-धुंधनी के दोकान खुलवैलो जैतै । हफ्ता में तीन रोज इच्छुक के चखना मुफ्त दिलवैलो जैतै ।” कहतें-कहतें अजनसिया नें जोर के ठहाका लगैनें छेलै आरो हाँसतें-हाँसतें कहनें छेलै “आबे तें हेने उलूल-जुलूल के घोषणा करलो जाय छै, चुनाव जीतै ले । देश-समाज जाव चुल्हा-भांडी में.....अच्छा आपनो घोषणा-पत्र में की छपतै, कुल्हाड़ी” हठाते अजनसिया गंभीर होय उठलो छेलै ।

“अरे हों, ई बातों पर हमरा सिनी ते विचारे नै करले छियै ।” कुल्हाड़िया नें चखना के एक बड़ो फक्का मुँहो में डालतें कहलकै । ई देखी के अजनसियों ओकरो सें एक बड़ो फक्का मुँहो में डालतें पलास्टिक वाला गिलासो में दारू के ढाले लागलै ।

महुआ केरो गंध बोतल सें निकलना छेलै कि दोनों के चेहरा फागुन में परास के फूल नाँखी खिली गेलै । अजनसियां पौआ गिलासो में लगभग टापे-टुप दारू भरी देले छेलै । कुल्हाड़ियां उठाय के ओकरा मुँहो सें लगैवे करतियै कि अजनसिया रोकलकै, “ठहर, पहिलें गिलास ते टकराव । अरे, मोर-मिनिस्टर बनवें, कल मजलिस में पीवें, आरो जों हेनें आदत रहतौ ते आन शहरी नेता की कहतौ ।” गिलास के ओकरा गिलास सें छुलैतें अजनसियां कहले छेलै आरो एक घूट में पूरे गिलास के कंठो के नीचें उतारी देले छेलै; जेन्हो कि कुल्हाड़ियां ।

दोनों एक क्षण लेली आँख मुनी के मौन होय गेलो छेलै, जेना कि कंठो सें नीचें उतरतें दारू के धार के पहचानतें रहे । आरो आँख मुनले कुल्हाड़िया नें कहलकै, “हों; तें तोहें घोषणा के बात करी रहलो छेलें, से तें तोंही सब जान । हम्में ठहरलियौ टिप्पा मार,ई ते समझें कि जनतंत्र-गणतंत्र में हमरो सिनी हेनो आदमी राज करे पारे, नै ते, गदहो देखी के नै रेकै वाला छेलै । भगवान खूब सुख दे स्वर्ग में गान्ही बाबा आरो लेहरू जी के, जे हेनो शासन लागू करी के गेलै । लेकिन बात यहाँ लेहरू जी के नै छै, बात यहाँ छै हमरो ।”

“मतरकि सबसें पहिलें बात उठै छै भोटर के आरो भोटर होय छै जात के, धरम के । आबे सबसें पहिलें ई सोचना छै—दूसरा सिनी के कोन-कोन जातो के सहारा मिले पारे । बाभन, राजपूत आरो वैश के सहयोग ते मिले सें रहलौ, ऊ तीनों ते जैथौ भजप्पा आरो कांग्रेस में । इनलो-गिनलो के छोड़ी दें ते

कोयरी-कुरमी तीर में । पासवान, लोजपा में आरो मुसलमान लोजपा-कांग्रेस छोड़ी के कन्हौं जावे नै पारे । यादव ते लालू यादव के छेके । लालटेन छोड़ी के कन्हौं जावे नै पारे । बचलै कैथ, कैथो के पकड़िये के की होतै । ओकरो भोटे की छै, जन्नें लुढ़कौ, कोय अन्तर नै पड़े छै, हेना में तोरो टिबरी केना जलतौ, पहिलें ये पर सोचना छै । फेनू तोरो जातो के वोटे कतना टा छै कि नारा देलो जाय—बेटी आरो वोटे जात के ।” ई सब बात अजनसिया आँख के मुनले-मुनले कोय भविष्य जानै में लीन योगी-मुनी हेनो कहले छेलै ।

“ते की तोहें है सब बातों पर पहिलें से नै सोचले छेलें, जे आय आठ-दस हजार खरच करवाय के सोचे ले कही रहलो छें ।” अजनसिया के बातों से कुल्हड़िया के आँख खुली गेलो छेलै, मजकि ओकरो बातों में बेचैनी के भास करियो के अजनसिया ने बिना आँख खोलले कहलकै, “फिकिर नॉट कुल्हड़ी, फिकिर नॉट । इलाका में एतने टा जात थोड़े छै, अरे छत्तीस करोड़ देवता छै ते समाज में छियत्तर करोड़ जात । जेना पियाज में परत-पर-परत रहै छै नी कुल्हड़ी, होन्है के यहाँ जात में जात छै—राजपूत छै ते वै में छै—जादन, भदौरिया, चौहान, बनौत, कछवाहा, केनवार, पछियारा.... कायस्थ छै ते कायस्थ में श्रीवास्तव, अम्बष्ठ, करन, राढ़ी.... बाभन छै ते बाभन में कनौनिया, गौड़, मैथिल, राढ़िये....., फेनू देखें, राढ़ी कैथ छै ते वहू में घोष, सिन्हा, मजूमदार, दास, दत्ता जत्ते उपाधि, ओत्ते कैथ—सब पियाज के छिलका नाँखी, जखनी चाहें उतारी के राखें । तोहें चीचो सिनी के देखले छै नी, जखनी धारा पाती चलै छै ते एक-दूसरा के पुछड़ी मुँहो में लेले, पैर-गोड़ पटकी दें ते सब तिल मिल ।” ई कही अजनसिया खूब जोरो से हाँसलो छेलै आरो कहले छेलै, “की समझलें कुल्हाड़ी ! खाली टाका चाहियो । इलेक्शन की छेके, टाका के खेल । तोहें की करले छें, आरो की करवें । ई देखै छै कोय । फुल प्रचार कर आरो टाका बहाव, फेनू देखें खेल । आगिने से आगिन लागै छै कुल्हाड़ी । एक ते पन्द्रह हजार टाका के बललो पर चुनाव लड़े ले चललो छें, वहू में निर्दलीय आरो चिंता करै छें, लाख करोड़ केचल पहिलें एक-एक गिलास आरो गल्ला के नीचे उतार, ई सब बातों में दिमाग ज्यादा खरच होय छै । ज्यादा सोचभें ते दोनों बोलत गंगाजल बनी जैतौ ।”

अबकी कुल्हड़ियाँ हीं गिलासों में दारू ढारले छेलै आरो आपना में गोठो गिलास से ज्यादा नै ढारले छेलै । वें जानै छै, अजनसिया डेढ़ो बोलत पचाय लेतै ते ऊक-बिक नै करतै, ओकरो ते अद्धा में ही मोन औल-बौल हुएँ लागै छै । से वें आपना से बेसिये अजनसिया के गिलासों में ढारले छेलै आरो

आपनों गिलास लै के ओकरो दिश बढ़ैले छेलै । ये पर अजनसिया कहले छेलै, “नै, जाम एक्के बार टकरैलो जाय छै ।”

ओकरो बातों से कुल्हाड़िया के झेंप होलो रहे आकि आरो कुछ, से बात नै छेलै । आवे ओकरो मोन उनमनी होय चललो छेलै; चखना-दारू पर कम, जमा पूँजी आरो खरचा पर ज्यादा । ओकरा समझ में नै आवी रहलो छेलै कि घंटा भरी पहिले यही अजनसिया की-की रँ ढाढस दै वाला बात करी रहलो छेलै, आरो इखनी एक गिलास ढारहैं बदललो-बदललो बात करे लागलो छै ।” तबे घंटा भरी के बाद आरो निसाँव चढ़ला पर येँ यहू कहे पारे है चुनावी मेला-ठेला में तोरो दुकान की चलै वाला छै । अरे जहाँ आवे बिजली से चलैवाला तर-ऊपरी चलै छै, जेमें बम्बे के हीरोइन पतुरिया से ज्यादा भीड़ जुटावै छै, वैमें तोहें चाहै छै कि कागज के घोड़ा नचाय के भीड़ के अपना दिश खीची लौं; है भला होय वाला छै । जुग-जमाना बदली गेलै, एक-एक करोड़ टाका लैके जितलो दल के किशमत पलटी दै छै....तोहें कथी ले पड़लो छै कुल्हाड़ी है चुनावो-पुनावो के चक्कर में । तोरो बचलो दस-पन्द्रह हजार टाका तेँ पच्चीस आदमी के आपनो पच्छो में ही लाने पर पार होय जैतौ । है कि पचपन साठ वाला चुनाव छेके कुल्हाड़ी ।” कुल्हाड़ी ने ढेर सिनी बात एक्के साथ सोची लेले छेलै ।

ओकरो मनो में कुछ शंका उठलो छेलै, जेकरो निदान लेली ऊ अजनसिया के घूरलकै, जे आवे गल्ला से नीचेँ दुसरो गिलास उतारी के एकदम खामोश होय गेलो छेलै; आपनो दोनो हाथ के पीछू करी आरो पिछुए आपनो मूड़ी के जरा से झुकैले; जेना, मुनलो आँखी से सरंग देखते रहे । “इखनी एकरा टोकना ठीक नै होतै । टोकला से भारी बवाल । कही चुकलो छै—निसाँव वक्ती दिमागी बात नै । आरो यहीं कहले छेलै कि चल एकान्ती में बैठी के सब योजना तय करी लेलो जैतै । छोटकी के कही देले छियै—चुपचाप बोटल गाछी जड़ी में राखी दै ले—वाँही पाँच रोजो के पलान सोची लेलो जैतैआरो इखनी सरंग हियाय रहलो छै ।.....कुछ नै होतै, परसुवे नाँखी सबटा पीवी लेतै आरो कहतै, ई सिनी बातों पर दुसरो दिन चर्चा । इखनी मूड नै खराब कर.....कहीं हेनो तेँ नै, येँ....कोय ठिकानो नै, आय भले ई हमरो साथ छै, मतरकि पिछुलका बीस सालो में ई कोन-कोन पार्टी के साथे नै रहलो छै । कोन पार्टी के येँ देवता के पार्टी नै बताय चुकलो छै, कोन कोन नेता के येँ मसीहा नै कही चुकलो छै, जेकरा हममें जानै छियै कि हत्या करवाय में महीनो जेल काटी चुकलो छै.....आय वही अजनसिया हमरो ले प्रचार करतै, भोट दिलैतै,

लोगों के बतैतै—जबे—जबे धर्म के हानी होय छै, तबे—तबे कुल्हाड़ी हेनो देवता नेता के अवतार होय छै—अधर्म आरो अन्याय सें जनता के मुक्ति दै लें.....।” आरो आखरी बात सोचलें ओकरो चेहरा फेनू सें खिले लागलै । “को न ठिकानो, अजनसिया के बोली के जादू काम करिये जाय ।” ई सोचलें ओकरो मो न गुदगुदाय उठलो छेलै आरो खिललो चेहरा सें वैन दोनों हाथों से एक-एक मुट्ठी चखना उठने छेलै आरो दौया हाथ के लगभग सबटा चखना मुँहो में राखतें चबाबे लागलो छेलै । फेनू बाँयो हाथ के मुँहो में लैके । बड़ी तेजी सें ओकरो जबड़ा चले लागलो छेलै । लागी रहलो छेलै; जेना ऊ बड़ी तेजी सें बहुत कुछ बात सोची रहलो रहे । देखलें-देखलें वैन गिलास वाला दारू के मुँह सें नै लगाय के पहिलें बोटल वालाहै गट-गट करी पीवी गेलो छेलै आरो तबे गिलासो वाला के नै छोड़ले छेलै ।

कुल्हड़िया के माथो हन-हन करे लागलो छेलै । आरो देह-हाथ एकदम इस्थिर । आँख दोनों एकदम बंद आरो बंद आँखी में सपना घूमे लागलो छेलै—ठेला पर एक ठो काठो के कुर्सी छै, जेकरा पर कुल्हड़िया हाथ जोड़ले बैठलो होलो छै,गल्ला में कन्डेली फूलों के आठ-दस माला छै । ओकरो आगू सें फटलो कमीज के कुछ हेनो ढंग सें सीलो गेलो छै कि सबसे पहिलें लोगो के नजर वही ठां पड़े.....कुल्हड़िया के पीछू पाँच आदमी खड़ा छै, जे जोर-जोर सें कठपुतली नाँखी हवा में हाथ भांजतें नारा दै रहलो छै—गरीबो के नेता केन्हो होय, कुल्हड़ी भैया हेन्हो होय.....ठेला के पीछू पचास लोग साथ दै रहलो छै आरो सबसे आगू छै अजनसिया, जेना ऊ रेगिस्तान में कोय गाड़ी के खींचतें ऊँट रहे ।

पर क्षणें में कुल्हड़िया के फेनू लागलै कि ऊ धीरे-धीरे कोय देवता के मूर्ति बनी गेलो छै, आरो ओकरो पीछू-आगू के सबलोग कीर्तन-भजन में लीन छै, सब जोर-जोर सें ‘जय-जय’ के नारा लगाय रहलो छै । पंडी जी हाथ उठाय-उठाय के कही रहलो छै—मूर्ति विसर्जन के समय होय रहलो छै, जल्दी करो । कुल्हड़ियाँ देखलकै, ओकरो ठेला गाँव के बड़की पोखरिया दिश बड़ी रहलो छै ।

वैन आपनो माथो के एक झटका देले छेलै, आरो फेनू वही सें सोचना शुरू करले छेलै—अजनसिया आगू-आगू बड़ी के भीड़ के समझाय रहलो छै—सौसे इलाकां, ई भितरिया मो न बनाय लेले छै कि अबकी मुहर कुल्हाड़ी नेता के ढिबरी पर । बस आबे तोरा सिनी के आर्शीवाद चाहियो ।

कुल्हड़िया के अपने-आप दोनों हाथ उठी गेलो छेलै, मजकि निसाँव एहै जमी गेलो छै कि ऊ वाँही चित्त होय के लेटी गेलै ।

वापसी

कुन्दन में लैम्प के रौशनी एकदम हल्का करे के खयाली सें ही बत्ती के नीचें करी देलें छेलै, एतन्है नीचें कि ऊ रौशनी में लैम्प के खाली चिमनिये झलकी रहलौ छेलै । जाड़ा के दिन । जल्दिये साँझ उतरी ऐलौ छेलै । माघ-पूसो के दिने की....होना के आभी बजते की होतै ? वैनें झुकी के वहे मटियैन्हो रौशनी में आपनो कलाई के घड़ी देखलकै । छो बजी रहलौ छेलै ।

.....“की अभियो सृष्टि आवे पारै छे ?” ओकरो मनो में शंका उठलौ छेलै, मतर, तुरन्ते शंका के समेटियो लेलें छेलै, “कैन्हें नी, अभी समइये की होलौ छे । शहर में ते होन्हौ के आदमी रात भरी ऐत्तै-जैत्तै रहै छे, जाड़ा के दिन होलै ते की, आठ-नौ बजे तांय ते आवा-जाही लागलौ रहतै.... कखनियो आवे सकै छै....नै आवै के कोय सवाले नै छै.....

पता नै, ओकरो मनो में की बात उठलौ छेलै कि वैनें फेनू सें रौशनी तेज करी देलें छेलै आरो कोठरी के चारो दिश नजर के दौड़ैले छेलै । एक विद्वान के कोठरी जेना रहै छै, होने छेलै । वै आपनो बिछौना पर दू तीन किताबों के साथे डायरी के कुछ हेनो ढंग सें राखी देलें छेलै, जेकरा देखतै कोय यही समझै कि ऊ अभी पढ़िये रहलौ छेलै जे ऊ आवी गेलै....सृष्टि के देलो उपन्यास ‘गुनाहों का देवता’ टेबुल पर सामनाहै कुछ हेनो ढंग सें राखले छेलै कि ऐत्तै कोठरी के कोय चीजों पर सबसे पहिलें नजर पड़े ते वहे किताबों पर । है कहना मुश्किल छेलै कि किताबों पर लाल रं के कोन खिललौ फूल धरलौ होलौ छेलै, जेकरा कुन्दन में एक दाफी उठैने छेलै आरो फेनू होनै के किताबों पर

आहिस्ता सें राखी देले छेलै ।

एक क्षण लेली वांही ऊ खाड़ो रहलै, फेनू घुमी के कोठरी के भिड़कलो केबाड़ आपना दिश आहिस्ता सें खींचने छेलै । सूरज वाला प्रकाश एकदम खतम होय गेलो छेलै आरो वै जग्घा पर सड़क के किनारी-किनारी खड़ा बिजली खंभा पर ट्यूब आरो बल्ब जगमगावे लागलो छेलै, जेकरो रोशनी में कारो शीशा नाँखी सड़क चमकी रहलो छेलै । मोटर, स्कूटर बोहो के रेत रँ सड़क पर बही रहलो छेलै आरो सड़के के दोनों दिश आदमी के चीटी रं कतार । कुन्दन नें वहे रोशनी में फेनू आपनो घड़ी के सूई देखले छेलै—साढ़े छो ।

ओकरो चेहरा पर शांति के एक भाव झलकी उठलै आरो केबड़ा के फेनू वैन्हें भिड़कैतें हुएँ टेबुल के एक दिश पड़लो कुर्सी पर आवी के बैठी रहलै “कहीं हेनो नै हुएँ कि सृष्टि बिना दस्तक देले अन्दर आवी जाय आरो ओकरो सब परेशानी एक्के बारगी उजागर हो जाय” यही सोची वैनें बैठले-बैठले फेनू रास के नीचें करी देलकै ।

वहे मटियैलो रौशनी में आय हठाते ओकरा ऊ दिन याद आवी गेलै, जेकरा ई बीचो में वै कभियो यादो नै करलकै, याद करै के जरूरते नै पड़लो छेलै । पाँच-छो महीना, पाँच-छो दिन नाँखी गुजरी गेलो छेलै । हों, पाँच महीना सें बेसी नै होलो होतै, जबे सें कुन्दन नें सृष्टि के पढ़ाना शुरू करले छेलै । सृष्टि के बाबूजी धरमचंद शहर के नामी वकील । जेहनो शान-शौकत, होन्है के शालीनतौ में बढ़लो-चढ़लो । कौन घरों में, एक दिनों में एक दाफी, धरमचंद के चर्चा नै होय जाय । कौन हेनो घरों के माय-बाबू नै होतै, जे आपनो बच्चा के सृष्टि हेनो सुशील आरो पढ़लो-लिखलो होय के उपदेश मौका मिलहैं नै देतें होतै । ई कम बड़ो बात नै छेलै कि हेनो घरों में कुन्दन के पढ़ावै के काम मिली गेलो छेलै, वहू में सृष्टि के, जेकरो बारे में कॉलेज सें लै के मुहल्ला तक में हल्ला छेलै कि एकरो सम्मुख ते प्रोफेसरो के घिग्घी बंधलो रहै छै—नै जाने, कखनी की पूछी दे । साईन्स के विद्यार्थी छेली सृष्टि, बस जरा-सा कहीं कुछ समझें में ओकरा दिक्कत हुऐ ते हिन्दी के नया किसिम के कविता । ई सब बात वैनें विमलेन्दु सें सुनले छेलै । नै ते एत्ते बड़ो शहर में की छेकै—केकरा मालूम । फुर्सत कहाँ छै, केकरौ । विमलेन्दु, जे ओकरो पितियैतो भाय, जे खुद्दे सहायक होय के साथे सृष्टि के पढ़यो के काम करै छेलै, नें ही बतैले छेलै—सृष्टि के पढ़ाय लेली एकटा टीचर ठिक्को करलो गेलो छेलै । कोय शक नै—खूब विद्वान छेलै । खाली हिन्दिये के नै, जेहनो लच्छेदार हिन्दी, होन्है, आचारशास्त्र आरो राजनीति के । धरमचंद ते गदगद छेलै ऊ टीचर पावी के,

मतरकि सृष्टिये नाखुश । आबे, जबे कि सृष्टिये नाखुश छेलै तेँ ऊ टीचर ऊ घरों में टिकै पारतियै कले ? बात ई छेके कि सृष्टि छै जरा खुल्ला मिजाज के लड़की, कोय बातों के चर्चा केकरौ सें करी दिऐँ पारे, पंडितो सें प्रेम के चर्चा धर्मविज्ञान नाँखी करेँ पारे । बस यहें होलो छेलै—एक दिन, सृष्टि पूछी देलकै—गुरुजी आपनें कभियो केकरौ सें प्रेम करलेँ छियै ?.....टीचर तेँ सुन्तहै आग होय गेलोँ छै, जेना गंगा नहाय लेँ जैतै कोय पुजारी पर कोय अंडा फोड़ी देलेँ रहेँ । हुनकोँ समुच्चा नीतिशास्त्र नंगोटा बान्ही केँ खाड़ोँ होय गेलोँ छेला आरो फुंफकारलेँ जे घरों से बाहर भेलै तेँ दोबारा नै ऐलै, महीनबारियो लैलेँ नै ऐलै, जबकि महीना पूरे में एक दिन आरो बची रहलोँ छेलै । धरमचंद नेँ ओकरोँ खोज खबर भी लैलेँ चाहने छेलै, मतरकि सृष्टि मना करी देलेँ छेलै । ठीक दसे दिन बाद हिन्दिये पढ़ाय वास्तेँ कुन्दन केँ ऊ घरों में बुलैलोँ गेलोँ छेलै । बुलैलोँ की गेलोँ छेलै, ई कहोँ कि विमलेन्दु नेँ ओकरोँ हिन्दी-ज्ञान के एहेंँ पुल बाँधी देलेँ छेलै कि दुसरे दिन सृष्टि केँ पढ़ाय लेलोँ बुलाय लेलोँ गेलोँ छेलै । नै बुलाय के कोय सवाले नै छेलै, विमलेन्दु ऊ घरों के एन्हे विश्वासी पात्र छेलै, जेकरोँ बात केँ टारवोँ धरमचंद केँ भी मुश्किल लागै ।

आरो सचमुचे में कहला मुताबिके कुन्दन नेँ वहाँ आपनोँ हिन्दी-ज्ञान के अद्भुत परिचय देलेँ छेलै । पहिलेँ तेँ ऊ काफी धुकचुकैलोँ छेलै, मतरकि वहाँ पहुँची केँ ओकरा लागलै—बेकारे वैं रात भरी पढ़ाय के रियाज करतेँ रहलै आरो दुकान जाय केँ नया-नया किताब उलटाय के जहमत उठैलकै । जबे रियाजे करलेँ छेलै आरो किताब केँ उलटैले छेलै, तेँ हौ सब सृष्टि के सामना में राखे सें चुकलो नै छेलै । आईना नाँखी घूमी जाय छै कुन्दन के सामना सें सब बितलोँ बात । औसतन लड़की सें कुछ उच्चोँ कद, नै कारी, नै गोरी—नै मोटी, नै पतरी—छरहरी, जै पर पंजाबी कुरता आरो पजामा । कुर्ता पर ऊपर सें लै केँ नीचेँ तक राजस्थानी काम । आँख सें लै केँ सौंसे देह में अद्भुत चंचलता आरो बोली ? बोली तेँ देहात के कोय जनानी रं मुक्त, पीपर गाछी सें छनी केँ ऐतेँ जेठ के हवा,.....कुन्दन सृष्टि सें कुछ पुछतियै, एकरोँ पहिलेँ सृष्टियेँ कहलेँ छेलै—पढ़ाय सीधे वहाँ सें शुरू होतै, जहाँ पहिलकोँ गुरु जी छोड़ी गेलोँ छै, यानी स्त्री के प्रति कवि के भोगवादी दृष्टि—विषय ई छेलै कि साहित्य में नारी के सौन्दर्य के बढ़ी-चढ़ी केँ चित्रण की पुरुष के भोगवादी दृष्टि के सबूत नै छेकेँ आरो कि स्त्री के थोड़ोँ टा भी हँसी केँ बोलबोँ, बनी-ठनी केँ रहबोँ पुरुष वास्तेँ ई बात के प्रमाण नै बनी जाय छै कि ऊ स्त्री के पुरुष लेँ रसमय निमंत्रण छेकेँ ?

कुन्दन नेँ बड़ोँ शांत स्वरोँ में समझैनेँ छेलै कि देह के सौन्दर्य, चाहे स्त्री

के रहे कि पुरुष के, ऊ आखरी सौन्दर्य नै हुए पारे । सौन्दर्य ते अनन्त विचार के चेतना छेके, जेकरा मोटा-मोटी आदर्श के बोध कहलो जावे सके छै । घंटा भरी कुन्दन देह आरो प्रेम पर बोलतै रही गेलो छेलै । सृष्टि ते दंग छेवे करलै, धरमचंद भी दंग छेलै, जे औसाराहै पर एक कुर्सी बिछाय के बैठी रहलो छेलै । हेना के देखाय के ते यही दिखाय रहलो छेलै कि हुनी फाइल के समझ में व्यस्त छै, मतरकि हुनको ध्यान कुन्दन के बातो पर छेलै । शैत आभी आरो देर वै पढ़ैतियै, मजकि बीचे में धरमचंद नें कुन्दन के बोलाय लेले छेलै आरो सामना के कुर्सी पर हाथ पकड़ी के बैठतें हुए सीधे पूछले छेलै, “की आरो कहीं ट्यूशन चलै छै ?”

“नै” बड़ा संक्षिप्त-रँ उत्तर वैने देले छेलै ।

“कहाँ पर डेरा राखले छौ ?”

“तिलकामांझी में ।”

“ठीक छै । होना के ई कोठरी देखी रहलो छौ नी, एको दरवाजा सड़क दिश खुलै छै आरो खिड़की ऐंगना दिश । ई हमरे कोठरी छेके । जो तोरो मोन करौ कि हममें यहाँ रहौ, ते कोठरी खोलवाय देभौ । कोय दिक्कत नै होतौ, कोठरिये में सब कुछ के व्यवस्था छै ।”

“बाबू जी, ठिक्के ते कही रहलो छौ ।” सृष्टि नें हुलसी के कहले छेलै ।

मतरकि कुन्दन नें ई बातो पर कोय जवाब नै देले छेलै । एकदम्मे चुप बैठी रहलो छेलै । ओको चुप्पिये देखी के नै ते धरमचंद नें बात के आगू बढ़ले छेलै, नै ते सृष्टिये नें । बात के बदले के खयालो सें ही हुनी कहले छेलै—अभी प्रेम पर जे विचार राखलो—वहे ठीक छै, हमूं मानै छियै कि प्रेम शरीर के बान्है वास्तें औजारे खाली नै छेके, ई मन के मुक्ती के भी मार्ग छेके, जेको श्रेष्ठ परिणति त्याग में होय छै, प्रेम खाली शरीरे के नै, मनो के परिभाषा होय छै.....होना के नया विचार आयको आदमी के ज्यादा बान्है वाला छै—कही के हुनी निर्मल हँसी हँसी देले छेलै ।

कुन्दन के एक-एक बात याद छै । पाँच-छौ महीना बितल्लै सें की होय छै । याद रहै के ते आदमी के बचपन के बातो याद रही जाय छै । बाते-बात में एक दिन धरमचंद नें ओकरा बतले छेलै—सृष्टि के संकेते पर हुनी ई कोठरी के खोलवैने छेलै आरो आपनो रुचिये मुताबिक सृष्टि नें ऊ कोठरी के सामान हिन्ने-हुन्ने करी के सजैले छेलै, जेकरे कारण आफिस रँ लगे वाला ऊ कमरा झायंग रूम में बदली गेलो छेलै । कोठरी सें नेता जी आरो गाँधी के तस्वीर ते नै उठवैने छेलै, मजकि जोन दीवाल पर खाली ठाकुर प्रसाद के कलैण्डर टंगलो

छेलै, ओकरा हटवाय के वहाँ शकुन्तला के एक बड़ो रँ पेंटिंग टांगी देले छेलै, जे वै आपनो कोठरी से निकाली आनले छेलै । माय के कोठरियो से नरगिस के पोर्ट्रेट लानी के ऊ वहे दीवाल पर टांगी देले छेलै । धरमचंद जी से वै जानले छेलै कि सब परिवर्तन के बादो गाँधी आरो नेता जी के तस्वीर के जरियो टा नै छूले छेलै । ई दोनों तस्वीर के जानकारी देते हुनी बीच में कहले छेलै—जो न दिन ई दोनों तस्वीर घरो में ऐलो छेलै, ऊ दिन लागलो छेलै कि तस्वीर नै, दोनों के ही आगमन घरो में होलो रहे । सृष्टि वास्तें ते दोनों—गुरूदेव; बिना मूड़ी झुकैने बाहर नै जावे पारे छै, ई दू तस्वीर नै छेकै, सृष्टि के शील आरो दृढ़ता के चिन्ह छेकै, जे वैने ई घरो से पैले छै, जेकरा छोड़ी के ऊ जीये नै पारे । यहे कारण वै तस्वीर नै हटलकै । हम्मं जे ई परिवर्तन पर कहलिये—“वाह, की हुलिया बदली के राखी देलहै तोहें—नेताजी आरो गांधी साथें, शकुन्तला-नरगिस । अजीब टेस्ट छै नया पीढ़ी के । वन्दे मातरम के भी पोप सांग बनाय के ही गावे के शौक ।” ते सृष्टि हमरो बातों पर जानै छै, की कहलकै ! कहलकै, “मजकि ये में खराबिये की छै बाबू जी, आबे दू आँख मिललो छै, ते दोनों आँखी से ही दुनिया के देखना चाहियो । एक आँख मुनी के देखला से आदमी खाली आपने सूरत नै बिगाड़ी लेते, देखवइयो के ऊ केन्हो लागतै, ई ते सोचले जावे पारेआबे तोही देखी नी ।” आरो ई कही के सृष्टि ने एक आँख मुनी के हमरा देखले छेलै ते हम्मू खिलखिलाय के रही गेलिये आरो हँसतै-हँसतै कहलिये, “तोरा से बात करै में पार पैवो मुश्किल । होना के कोठरी के देखे लायक बनाय देलो छै जरूर.....बस जरा-सा बदलाव के जरूरत छै.....ई कुन्दन वाला कुर्सी नी छेकै, एकरा ऊ दिश करी दौ ।” जानै छै वै पर सृष्टि तुनकी के कहलकै, “नै बाबू जी, नै, गुरूजी आरनी के माथो होन्है के नीतिशास्त्र के सेन्द्रल लाइब्रेरी बनलो रहै छै । सड़ै से बचाय लेली ई व्यवस्था करलो गेलो छै ।” कहते-कहते सृष्टियो के ठोरो पर मुस्कान फैली गेलो छेलै आरो हम्मं ते तखनी एकदम से खुली के हँसी पड़लिये । हसतै-हँसतै हुनी यहो कही देले छेलै, “हम्मं ते समझे छिये कि ई परिवर्तन सृष्टि ने ये लेली करले छै कि तोहें यही रहो । विमलेन्दु ते रहिये रहलो छै ।”

कुन्दन के आँखी में ऊ सब दिरिश घुमी आवै छै....वैने साइकिल वाँही दिवाल से सटाय के खाड़ो करले छेलै आरो कोठरी दिश मुड़ी गेलो छेलै.... “आय से याँही पढ़ाय-लिखाय चलतै” अभी कोठरी में हम्मं दुकलो नै होवे, कि आपनो कुर्सी पर बैठली सृष्टि ने खड़ा होतै कहले छेलै आरो सामना के कुर्सी दिश ईशारा करले छेलै । मंत्रमुग्ध नाँखी हम्मं वहे कुर्सी पर बैठी रहलिये ।

“ते गुरु जी, आपने के मालूम है कि कल बात के कहाँ पर छोड़ी देले छेलिये आपने ।” सृष्टि ने गुरु जी पर कुछ विशेष बल देते ही पुछले छेले ।

“बेशक, उर्वशी के शंका के समाधान में छेले पुरुरवा । पंक्ति छेले,
वृष्टि का जो पेय, वह रक्त का भोजन नहीं है
रूप की आराधना का मार्ग आलिंगन नहीं है ।

“मजकि तोहरा पुरुरवा के हेनो बात कुछ अटपटैलो रँ नै लागै छौं, जो नै, ते उर्वशी रक्त के भाषा पढ़े ले कँहें कहतिये । ठिक्के ते रक्त दिमाग से ज्यादा बली होय छै, की तोरा हेनो नै लागै छौं । हमरा ते यही लागै छै, लहू के सामना में बुद्धि के कोय बो ल नै चले छै । जो हेनो नै होतिये ते कण्व हेनो ऋषि के आश्रम के बीच पली-बड़ी के भी शकुन्तला के विवेक केना बही जैतिये ।”

तखनी अकबकैलो बस हम्मं एतन्हें कहले छेलिये, “लहू के हेनो पुकार नैतिक नै मानलो जावे सके ।”

“मजकि, गुरु जी, तोहें है ते बतावो कि सीमोन द बोउवार आजीवन अविवाहित सार्त्र के साथे रहले, जेकरा से प्रभावित होय के अज्ञेय हेनो कथाकारो ‘नदी के द्वीप’ उपन्यास लिखे छै; तोहें ई संबंध में की कहै ले चाहवौ ।”

“सृष्टि, बहस के कोय अंत नै हुएँ पारे । मतरकि तोहें जोन सीमोन द बोउवार आरो सार्त्र के बात करी रहलो छौ, हुनको बारे में तोरा यही मालूम होतौ कि बोउवार सार्त्र से पहिले जोन प्रेमी के चाहै छेले, ऊ ओकरा से ब्याहो करैले चाहै छेले, मतरकि असमये में प्रेमी के मृत्यु ने ओकरो मनो के झकझारी देलके आरो एकरे प्रतिक्रिया हुएँ पारे कि बोउवार के शादिये से नफरत होय गेलो छेले, शैत यहें कारण छेले कि सार्त्र जबे बोउवार के जीवन में ऐले आरो वहुँ ओकरा से बीहा के प्रस्ताव राखलके, ते वैने इनकार करी देले छेले । सीमोन द बोउवार आपनो जिनगी भर आपनो प्रेमी मैर्लोपोन्ती के नै भूले पारले छेले” तखनी कहते-कहते हम्मं एकबारगिये चुप होय गेलो छेलिये आरो हमरा से कहीं ज्यादा गंभीर होय गेलो छेले सृष्टि ।

फेनू उर्वशी काव्य के पन्ना उलटते-पुलटते ही हम्मं कहले छेलिये, “तबे स्त्री में पुरुष से कहीं ज्यादा खतरा से खेलै के साहस होय छै, बोउवार के ही बात नै छै, उर्वशियो अविवाहिते रही के पुरुरवा के पुत्र दिए सके छै..... तखनी नै जानौ, मनो में की सोचते हुएँ किताब के मोड़ी एक दिश राखी देले छेलिये । सृष्टि कुछ जवाब नै देले छेले । ओकरो आँख कुछ देर लेली हमरो आँख पर गड़ी के रही गेलो छेले, जेना कि हमरो । कुछ क्षण लेली हेने होय गेलो छेले, जेना हौ सन्नाटा में आरो कोय होतिये ते आसानी से दोनों के दिलो

के धड़कन सुनी लेतियै । हठाते हमरा दोनों के नजर झुकी गेलो छेलै । जेना, दोनों दू कठपुतली रहे, जे एक्के इशारा पर एक्के रं नाँचते-बैठते रहे.....

कुन्दन के एक-एक बात याद छै । छोटो-छोटो बात याद आवी रहलो छै, जेकरा पर वै कभियो ध्याने नै देलो छेलै—एक दाफी सृष्टि नें कागज के मटर नाँखी गुल्ली बनैले छेलै आरो फेनू टेबुल पर राखी तर्जनी सें ये रँ उड़ैले छेलै कि ऊ हमरो छाती सें टकरैते ओकरे पास लौटी गेलो छेलै, जेकरा वैन फेनू होनै के उड़ैले छेलै, जे दुसरो दाफी हमरो बालो सें टकरैते दूर छिटकी गेलो छेलै । जबे हममें कहलियै, ई की रँ के बचकाना हरकत छेके ?.....ये पर वै कहले छेलै, “ये में परेशान होय के कोय बाते नै छै । फ्रायड बाबा कहै छै कि आदमी के अन्दर गन्दगिये भरलो छै आरो डार्विन बाबा कहै छै कि आदमी बन्दर के विकास छेके, ते आचरजे की, जो हमरो हरकत तोरा बन्दर नाँखी लागौ आरो गन्दौ ।” एतना कही ऊ मुस्कैलो छेली ।

“आरो तोरा मालूम होना चाहियो कि मार्क्स बाबा ई कहले छै कि मनुष्य आपनो आस-पास के परिस्थिति के निर्माता होय छै आरो ओकरो भोक्तो.....” पता नै हमरो बात के की लेले छेलै जेकि हठाते चुप होय गेलो छेलै आरो तबे सृष्टि तीन दिन तांय हेने खामोश बनलो रहलै कि नै कहे पारौ । बात धरमचंद जी तक पहुँची गेलो छेलै । ऊ दिन हमरो केन्हो हाल होय गेलो छेलै.....हुनी ऐलो छेलै आरो कहले छेलै—कुन्दन, की बात होय गेलो छै कि सृष्टि आय कल घर में चुप-चुप रहै छै, नै तोरो कोय बड़ाय, नै कोय शिकायत । आखिर मामला की छेके.....आबे मामला की बतैलो जैतियै हुनका, बस कही देलियै—पढ़े में मोन नै लगावै छै, यही में कुछ कही देलियै ते ई नारजगी छै.....हमरो बात सुनिये के हुनी हाँसी पड़लो छेलै । कहले छेलै—ये में हमरो वकिलाय काम नै करे पारे । आपसे में मुद्द और मुद्दालय समझौता करी लौ, ते अच्छा ।

ई बीचो में सृष्टि नें टेबुल के नीचे हाथ करी नै जानौ कखनी ते कागज के बड़ो रँ गुल्ली बनाय लेले छेलै आरो धरमचंद जी के जैतै गुल्ली के टेबुल पर राखी, विचलका अंगुली के बुढ़वा सें टिकाय के जे रँ उड़ैले छेलै कि ऊ गर्दन सें टकरैते सीधे गंजी में जाय के फँसी गेलो छेलै । विचलित होय उठलियै, ते सृष्टि बच्चे नाँखी ताली बजैते खिलखिलाय पड़लो छेलै । हमरा दिश से बेखबर । तखनी हममें कत्ते तेजी सें ऊ गुल्ली गंजी सें नकालले छलियै आरो टेबुले पर राखी ठीक होन्है के उड़ैले छेलियै, जेनाकि वैन आरो जबे गुल्ली होन्है के ओकरो गर्दन सें टकरैते ओढ़नी में फँसी गेलो छेलै ते हँसते-हँसते वै कहले छेलै—“निशाना बाँधै छौ ?”

सृष्टि के ऊ मुक्त हँसी के तुलना हमरो पास कुछ नै छै—कुन्दन नें मने-मन सोचले छेलै—सेमर के रूई सें भी ज्यादा गुदगुदो, मुलायम आरो उजरो; जेकरा देखी ऊ केन्हो मुग्ध होय उठलो छेलै—जेना नद्दी सें वैन पनसोखा उठतें देखले रहे.....

कुन्दन के आँख अपने आप बंद होय गेलै, जेना ऊ क्षण के दोबारा देखले चाहतें रहे । आँख बन्द होले ते ओकरा यहो खयाल ऐलै, “गुनाहों का देवता” ओकरो सिलेवस में ते नै छै, फेनू केन्हें सृष्टि नें जिद्द करले छेलै कि अगला हफ्ता सें यहें उपन्यास पर व्याख्यान होतै । उपन्यास थमैतें हमरा सें कहले छेलै, “गुरू जी, जों उपन्यास पढ़ियो चुकलो छौ, तहियो पढ़ी के ऐइयो । मनो में ढेरे सवाल छै, जे पूछना छै ।” घोर लौटला पर वैन पढ़े के खयाल सें उपन्यास उलटैने छेलै । पन्ना उलटैतें एक चित्र देखले छेलै—किताब के पन्ने पर बनैलो—एक टूठ छै, टूठ के फुनगी पर एक फूल आरो टूठ के आधो भाग एक ठो विशाल अजगर के जबड़ा में फंसलो । कुन्दन नें गौर सें देखले छेलै, ऊ छपलो फोटो नै छेलै—हाथ सें बनैलो गेलो छेलै आरो चित्र के एक कोना में लिखलो छेलै—सृष्टि । ओकरा आचरज होलो छेलै—किताब के हर पाँच पन्ना के बाद वहे चित्र बनैलो गेलो छेलै—छोटो-बड़ो आकारो में । कै दाफी मोन होलो छेलै—एकरो माने सृष्टिये सें पूछी लै, मतरकि हेनो नै करे पारले छेलै ।

बितलो बातों सें कटी के कुन्दन नें सोचलकै—की हमरो चिट्ठी ओकरो सब सवालो के उत्तर नै छेकै, ई सोचतैं, ओकरा एक झटका रँ लागले आरो ऊ उठी बैठलै । फर्श पर चहलकदमी करे लागले । ओकरो दिल अजीबे नाँखी धड़के लागलो छेलै, कभी ते लागै, ऊ एकदम रुकी गेलो रहे आरो कखनियो-कखनियो एकदम तेज, जेना, छाती नै, भांती धुक-धुक करतें रहे ।

ओकरा ई बातों के खयाले नै छेलै कि कोठरी में कजरोटी के कालिख रं अन्हार पसरी गेलो छेलै । लैम्प दिश देखलकै, तहियो ओकरो मोन होलै—कोय रौशनी नै करी, हेने अन्हार रहे दियै, मतर नै, जों सृष्टि आविये जाय । ई बात मनो में ऐतैं ऊ फेनू चौकी पड़लै, जेना दरवाजा पर कोय दस्तक देले रहे । वैन घुमी के देखलकै । मतर, हेनो कुछवे बात नै छेलै, कोय दस्तक देले होतिये ते उत्तर नै पावी के फेनू नै देतिये, केबड़ो ते होन्हे भिड़कलो छै । कुन्दन नें हुड़का छूवी के देखले छेलै—कही वै भूलो सें लगाय ते नै देले छै; नै हुड़को खुल्ले छै । ओकरहै भरम होलै । वैन खिड़की दिश देखलकै, वहू खुल्ला । कि तभिये ओकरो मनो में ऐलै—कोठरी में रौशनी नै देखी हुएँ सकै छेँ,

सृष्टि लौटियो जावे पारे.....मतर, है की जरूरी छै कि सृष्टि आविये जैतै ?
जों नै आवै छै, ते एकरो मतलब होय छै कि कल सें हमरो वहाँ जाना
 बन्द ।अच्छा नै करलियै, हमरा हेना के चिट्ठी ओकरो हाथों में थमाय के
 नै आना छेलै । खोली के पढ़ले होते ते की-की सोचले होतै.....मतर नै,
 सृष्टि, हमरा सें जे नै कहे पारी रहलो छेलै; वहे ते हम्में ऊ चिट्ठी में लिखले
 छियै । अबे सब फैसला सृष्टि के हाथों में छै । आरो ई हुऐ नै पारे कि ऊ
 नै आवे । ...कै दिन सें ओकरो चुप-चुप बनी के रहवौ—जाने कत्ते-कत्ते
 बात कहै ले चाहते रहे, जेकरा वें आपनों बंद ठोर आरो कभी-कभी बंद आँखी
 सें कहै छेलै । हमरो चिट्ठी ओकरो शंका के निदान छेकै.....आखिर बिना
 संदर्भ के वै कैन्हें ई पूछी बैठलो छेलै—कुन्दन, उर्वशी की ठिक्के में पुरुरवा के
 पुकार पर स्वर्ग सें दौड़ी के धरती पर आवी गेलो होतै ? आरो हमरो ई कहला
 पर, “सिद्ध करना छीं की?” ऊ की रँ कठुआय के रही गेलो छेलै.....नै हम्में
 कुछुओ गलत नै लिखले छियै, ऊ सृष्टि के मनो के बात छेकै.....

कि तखनिये भिड़कलो केबाड़ खुललै । केवाड़ के होलें सें पीछू करलो
 गेलो छेलै । सृष्टि के देखतैं, कुन्दन आगिन पर चढ़लो दूध नाँखी उफनाय
 उठलै । जेना कोय गुफा में खजाना के द्वार मिली गेलो रहे ओकरा । मुँहो सें
 निकललै, “सृष्टि ! हमरा पूरा विश्वास छेलै, तोहें हमरो पुकार पर जरूर ऐवौ,
 तोहें रुकै नै पारौ.....अरे, द्वारिये पर कैन्हें छी, भीतर आवो.....” कुन्दन नें
 दोनों हाथ बढ़ले छेलै ।

“नै कुन्दन, नै ।” फेनू सृष्टि नें चिट्ठी के कुन्दन के हाथों में थमैतें कहले छेलै,
 “ई तोरो चिट्ठी होन्है के बंद छीं, जेना तोहें देले छेलौ । शैत एकरा खोलै के
 हमरा कोय जरूरते नै छेलै । हमरा तुरत लौटना छै, बाबूजी के लौटे सें पहिल्लें ।”
 एतना कही सृष्टि दरवाजा के दोनों फाटक के फेनू सें भिड़कले छेलै आरो सड़क
 पर उतरी ऐलो छेलै । बदहवास बनलो कुन्दन नें खिड़की सें ही सड़क के रौशनी
 में देखले छेलै—एक छाया धीरे-धीरे लम्बा होलो छै, जे ओकरो खिड़की पर
 फैली के हठाते खतम होय गेलो छेलै ।

चन्दन विष व्यापत नहीं

नूरपुर इस्कूल छोड़ला के बाद ई ओकरा सँ हमरो पहलो मुलाकात छेलै । ठीक फुलवड़िया मोड़ो पर ऊ मिली गेलै—एक पान दुकानी पर खाड़ो । केकरो इन्तजारे करी रहलो छेलै ? देखलै वैन आवाज देलकै—“विकास, अरे रुक” आरो वैन आपनो दोनों हाथ उठाय देन छेलै, जेकरो कारण भीड़ के चीरतें हमरो ध्यान सीधे ओकरहै पर गेलै । ओकरा वहाँ देखी हमरा कुछ अचरज नाँखी होलै, मजकि आपनो सब भावो के छिपैतें ओकरे दिश बड़ी गेलियै आरो नगीच आवी कहलियै, “मन्टू, तोहें यहाँ ?”

“पहिलें तोही बताव कि तोहें यहाँ ?”

“यही तगेपुर हाई इस्कूल में बदली होय गेलो छै । आबे साइकिले सँ आना-जाना करै छियौ ।” आरो ई कही हममें आपनो साइकिल वारी दुकानी के एक दिश खाड़ो करी देलियै, “मजकि तोहें ई तें बताव कि तोहें यहाँ पर की करी रहलो छें ?” ई कही हममें हिन्ने-हुन्ने नजरो दौड़लियै । काँही कुछ नै । कुछ होय के सवालो नै छेलै । आस-पास कोय बस्तियो तें नै छै, छेवो करै तें सौ-पचास बाँस के दूरी पर । हमरा यहू मालूम छेलै कि यै इलाका में मंटू के नै तें कोय संबंधी रहै छै, नै तें कोय दोस्त-मोहिन ।

मन्टू नें हमरो सवाल के कोय जवाब नै दै के उल्टे हमरहै सँ पुछलकै, “इस्कूल तें दस, साढ़े दस सँ लगै छै, आरो तोहें इखनियै.....है नवे.....।”

“बाजार के कुछ सामान छै, सोचलियै, जल्दिये निकली जांव तें इस्कूल सँ लौटे वक्ती सामान खरीदै-उरीदै के झमेला नै रहतै ।”

“खैर, तबे ते तोरा समय छी, एक काम कर” वैने आपने से ऊ दुकानी के नीचे राखलो बेंची के खींचलकै आरो ओकरा रूमाल से झाड़ते बोललै, “तोहें, बैठी के दस मिनिट हमरो इन्तजार कर । तोरो साइकिल ले के जाय छियौ । बस भेंट करलियौ कि लौटलियौ ।” आरो वैने हमरो कोय उत्तर के बिना अपेक्षा करलें हमरो साइकिल के लेलकै आरो साइकिल के पीछू से आपनो लम्बा दाँया टाँग के पार करतें सीटो पर जमी गेलै । यद्यपि वैठां नै ते दूर-दूर तांय आरो नै ते आगू ही कोय आदमी दिखाय छेलै, तैहियो वैने तीन-चार बार घंटी बजैलकै आरो जल्दी-जल्दी पैडिल घुमैते आगू बढ़ी गेलै ।

पीछू से हमने ओकरा देखलिये ते हमरा हँसियो आवी गेलै । छोट फुट के लम्बा-चौड़ा जवान । इखनियो देहो पर वहे लम्बा खलत्ता कुर्ता आरो चूड़ीदार पैजामा । हमरो छोटो रँ के साइकिल के चलाय में ओकरा कल्ले दिक्कत होय रहलो छेलै, ऊ देखतें कोय्यो हँसी पड़े । प्रतिक्रिया देखे के खयाले से ही हमने पानवाला दिश देखलियै, जेकरो ठोरो पर पान के रंग नाँखी मुस्कान फैली रहलो छेलै । हमरा आपनो दिश देखतें देखलकै ते हठाते गंभीर होय गेलै, शायत ई सोचियै, कि हमरा ओकरो मुस्कैवो अच्छा नै लागतै । आरो ई बताय ले कि ऊ हौ दिश देखिये नै रहलो छेलै—वैने एक बड़ो रँ बाटी में राखलो पानी के पाने पत्ता से पान के ढेरी पर छिड़कना शुरू करी देलकै, जरियो टा हमरो दिश देखले बिना । आरो पानिये छिड़कतें पूछलकै, “पान-ऊन चलतै की बाबू जी?”

“नै, पान नै खाय छियै ।”

“कसेलिये, मुँहो में दबैइयै ।” ई दाफी वैने सामना में राखलो एक छोटो रँ बाटी से कसैली के दू टुकड़ा उठैलकै आरो हमरो दिश बढ़ाय देलकै ।

हेना के ते हमने कसेलियो नै खाय छियै, मतरकि हर बातों में इनकार करवो ठीक नै होतै, यह सोची के कसेली ले लेलिये आरो दाँया हाथ के अंगुठा, तर्जनी आरो मध्यमा के बीच टुकड़ा सिनी घुमावे लागलियै ।

“आपने माट साहब के के लागै छियै ?” दुकानदारें पान के पिछुलका डंटी तोड़तें आरो फेनू बीचो से चीरतें, हमरो दिश देखी के बोललै ।

“दोस्त छेकै ।”

हमने सोचले छेलिये, एकरो बाद वै आरो कुछ पुछतै, मजकि हेनो बात नै होलै । पहिलके नाँखी दुसरो पान के डंडी तोड़लकै; बीचो से चीरी वै पर चूना-कत्था लगैलकै आरो एक लाल रँ के कपड़ा से हाथ पोछी लेलकै ।

“से की, कुछ बात छै की ?” हमनी ओकरा से पूछलियै । लागलै, ओकरो प्रश्न

करै के पीछू जरूर कोय रहस होतै ।

“बस हेन्हे के जानै ले चाहै छेलियै कि हिनी कौन पाटी के नेता छेकै ?”

“अरे नेता-वेता नै छेकै । सुनलौ नै, बतैलकै कि यही मुखेरिया हाई इस्कूली में मास्टर छै ।”

“आय बुझलियै । चेहरा-मोहरा सें आय तक हिनका हम्में कोय नेताहै बुझते रहियै ।” ई कही वैनें आपनो मूड़ी बाँया दिश झटकैनें छेलै, जेना ओकरा आपनो समझ पर आचरज साथें ग्लानियो होलो रहे । आरो फेनू दोनो हथेली के केहुनियो से जोड़ी ओकरा फलकलो कमल नाँखी बनेले छेलै, जैमें ऊ आपनो टुड्डी डाली के मौन होय गेलै ।

हमरा खयाल ऐलै, मंटू के बदली जबे जमदाहा इस्कूली सें नूरपूर इस्कूल होय गेलो छेलै, ते एकरा नेताहै समझी के साल भरी हेडमास्टरें कोय टोक-टाक नै करलकै । गोरों दिप-दिप चेहरा ते छेवे करै, हाथों में ताँबा आरो चाँदी रंगों के तारों सें गुंथलो मोटो मठिया मंटू के आकर्षक बनावै आरो दबंगो । हमरा याद छै, साल भरी में एक्को दिन ठीक टैम में ऊ इस्कूल नै ऐलो होतै । कभी बारह बजे, आरो कभी एक बजे । एक दाफी हेडमास्टरें टोकी देलकै ते आपनो निचलका ठोर के दाँतो सें दबैलकै आरो फेनू छोड़तें कहलकै—माट साब, तोरो बात हम्में समझे पारों, मोटर गाड़ी आरो ट्रेन नै..... एक हमरो लेली नै ट्रेन दू घंटा पहिलें पहुँचतै, नै मोटर । गाड़ी खाली हमरहै लेले -लेले तोरो लुग पहुँचाय देतै की ? की हमरो बिना तोरो इस्कूल बंदे होय जाय छै । अरे गाड़ी-घोड़ा छेकै, बीचो-बीचो में पसँजर उठैवे करतै, आबे जो आवै में मोटर बीसे बार रुकै छै, आरो पच-पचे मिनट देर होय छै ते सोचौ, एकरहै में डेढ़-दू घंटा पार । आबे जबे हम्में कुछ देर करी ऐवे करै छियै, ते एकरा ध्यानो में राखै के जरूरत नै छै ।” आरो फेनू हमरो दिश इशारा करी के कहले छेलै, “पूछी लौ, विकास सें, जमदाहा में कभियो हम्में लेट आवै छेलियै, हों, पंकचुअल कहावै वाला विकास भले लेट आवे ते आवे ।”

तखनी ते हमरो हालत एकदम विचित्र होय गेलो छेलै । आबे बोलों ते बोलों की.....हमरा विश्वासो नै छेलै कि मंटूओ के बदली वहे इस्कूली में होय जेतै, जैमें हमरो । एकरो पहिलें दोनों जमदाहै इस्कूली में छेलियै । तबे हमरो यहें कोशिश रहै कि इस्कूल लागै सें पाँच मिनट पहिलें पहुँचौ, तभियो कुछ नै कुछ देर भइये जाय.....केना नै होतियै—बाँसी सें जमदाहा तक जाय वाली गाड़ी बस एक्के आरो वहे गाड़ी सें सबके आना-जाना । गाड़ी खुललो नै कि पीछू सें हो-हो के आवाज हुऐ आरो गाड़ी रुकी जाय । नै रुकै के मतलब

छेलै, दुसरे दिन गाड़ी के दे ईंटों-पत्थर से शीशा ते चूर करवे करतियै, ड्रायवरो माथों- कपाड़ भंगवाय लेतियै । दुसरो बात यहू छेलै—सड़के पर हाथ, पाँच हाथों पर बित्ता-बित्ता भर के गड़ढा । सुनाफड़ पावी के तेज चले भी ते केना । यैमें पाँच-दस मिनट देर होय जैवों कोय बड़का बात नै छेलै । आरो हेनो कोय दिन नै होय छेलै कि कोय-न-कोय मास्टर के देर होइये जाय । खुद हेडमास्टर साहब के के दाफी हेनो हाल से गुजरै ले लागै । बात ई छेलै कि इस्कूली में जत्ते मास्टर छेलै—काहीं-न-कांही से आवै—हमरे नाँखी । केकरौ-केकरौ ते रास्ता में एक-दू गाड़ियो बदले ले लागै—आरो जो केन्हीं के जमदाहा जाय वाली ई पहिलको गाड़ी छूटी जाय छेलै ते समझो घंटा भरी के लेट होनाहै होना छै—चाहे तोंय पैदले जा कि वहे गाड़ी के फेनू से लौटे के इन्तजार करो । मन्दू है सब बात नै जानै छेलै, से बात नै । तभियो वै ई सब बातों के देर होय के कारणे नै मानै । वै कहै—नौकरी के मतलबे होय छै—नौकर नाँखी बनी के रहवों । जो बाबू बनी के आना-जाना छौं, ते आपनो कोय व्यवसाय करो, है नौकरी करै के की जरूरत छै । आवे सरकार जेबे ठीक टैम में आवै-जावे आरो पढ़ावे के पैसा दे छौं ते बाबू नाँखी टहललो-बुललो, दस बजे के बदला ग्यारह-बारह में ऐवो, ते नै नी होतौ ।

ई बात मंटू खाली जुनियर मास्टरे के कही देते रहे, से बात नै छेलै, केकरौ नै कुछ बुझै—की सिनियर आरो की हेडमास्टर । कोय ओकरो विरोधो नै करे पारै—एक ते सब आपनो गलती पर भीतरे-भीतरे आपना के हीन महसूस करै, दुसरो ई कि मंटू कभियो इस्कूल में देर करी नै आवै । इस्कूल दस बजे से लागै आरो मंटू पौने दसे बजे आवी के दम दाखिल । आवी के इस्कूल के चारो दिश घूमै—अहाता के एक-एक गाछ के देखै आरो कोय गाछी के कोइयो ठाहुर टुटलो मिलै ते ऊ दिन लड़का से लैके मास्टर तक के उपदेश दे में लीन रहै, “जेबे गाछे के हिफाजत यहाँ मुश्किल छै, तबे इस्कूल के पढ़ाय-लिखाय के की हिफाजत होतै....ई इस्कूली के मास्टरे जेबे बारह बजे ऐतै, ते लड़का सिनी के की, छुट्टी होला के बादे आवै छै ते की ।”

मंटू के कोय बातों के जरियो टा कन्हौ सुराग मिले ते ऊ सीधे मास्टर के देर से आवै के विषय पर उतरी जाय । एकरा से एक फायदा होय जाय कि मंटू के कोय क्लास-उलास लै ले नै कहै । हेडमास्टरो तक नै । बस हमरा से कही दे “जरा मंटू बाबू के किलास लै लियौ ।”

एक ते मंटू के, दुसरो हेडमास्टर साहब के आदेश; आपनो घंटी साथे ओकराहो लेना हमरो उत्तरदायित्व बनी गेलो छेलै जेना । मजकि एकरा से

एतना होलै कि मंटू आरो जेकरा जे कहै, हमरा कुछ नै कहै । एक तरह सें हम्मैं ओकरो दोस्ते बनी गेलियै । यहाँ तक कि तुम-ताम पर हमरा सिनी उतरी ऐलियै । मतरकि जहाँ तक क्लास के बात छेलै, वैनें घंटी लै के भार तभियो वापिस नै लेलकै ।

सब मास्टर ई मानी लेलै छेलै कि ओकरा जब तांय ऊ इस्कूली में रहना छै, मंटू के यै विषय पर फुंफकार सुननै छै ।

दसे-ग्यारह बाँसो के दूरी पर छेलै मंटू के घोर, जहाँ सें ऊ पैदले चललौ आवै ।

क्लास करै लेली तें आवै पौने दस बजे, मतरकि एको पहिलो बिना नागा के भिहानै एक दाफी जरूरे इस्कूल दिश आवै टहलै के बहाना । गाछ-बिरिछ के भोरको हवा तन-मन के मजगूती दै छै, यही सोची । आबे जबे दसे-ग्यारह बाँस के दूरी पर मंटू के घोर छै तें टिफिन वक्ती ऊ टिकतियै केना; जलखै लें घोर दिश बढ़ी जाय आरो तखनी सब टीचर इकट्ठा होय मंटुवे के बारे में कोय-न-कोय शिकायत निकाली लै । है बात नै छेलै कि हम्मैं वै मंडली सें अलग छेलियै ।

बात की छिपलौ रहै । ई कानाफुसकी केन्हौ-न-केन्हौ मंटू के कानो में चल्ले जाय आरो दुसरे दिन वै कोय-न-कोय बहाना निकाली केँ ऊ सब दोहराय दै, जे मास्टर सिनी के बीच बितलौ दिनों में होलौ रहै आरो आखरी में उपसंहार नाँखी जरूरे कहै, “है नै सोचो कि तोरो सिनी के शिकायत-षड्यंत्र से हम्मैं यहाँ सें खिसकी जैवै, हों तोरा सिनी जरूरे खिसकी जैवा, जोन दिना हम्मैं चाही लेवौ !” ई उपसंहार सुनावै वक्ती मंटू दोनों हाथ ऊपर करी लै आरो फेनू फेरा-पाती सें एक-दुसरा हाथो सें कुर्त्ता के हत्था बाँही तक ससारी दै ।

जेना ई दिरिश नै देखै के मनो सें ही सब मास्टर चौख-डस्टर लेलै स्टाफ रूमो सें निकली जाय—घंटी लै के बहाना सें ।

.....कोन मास्टर नै होतै, जे तंग नै आवी गेलो होतै । के मनो सें चाहै कि क्लास लेवे करौ । त्रिलोचन, भुवनेश्वर और त्रिवेणी तें एकदम अक्कच आवी गेलो छेलै । होना केँ सब चाहै कि कोय दुसरो इस्कूली में बदली होय जाय, मजकि त्रिलोचन, भुवनेश्वर आरनी तें यै वास्तें शिक्षा-विभाग के पदाधिकारी आरो हेडक्लर्क केँ भारी घूसो दै ऐलो छेलै । दस-पन्द्रह रोज के छुट्टी लै केँ भागलपुर दौड़ो-धूप करलकै, मतरकि सब बेरथ—टाकाहौ गेलै आरो परेशानियो । ई तें भाग मनावौ कि कोन विन्डोवो उठलै जे टीचर सिनी केँ एक जिला सें दुसरो जिला में बदली होना शुरू भेलै आरो त्रिवेणी आरनी हौ इस्कूली से हेनो भागलो छेलै

जेना गोहाली सें खुललो लेरू उड़लो रहे ।

ऊ दिन के बात याद ऐहें विकास मुनलो ठोरो सें हाँसी पड़लै, कुछ एतन्है जोरो सें कि ओकरो पूरा देह-हाथ डोली पड़लै ।

“भला की सोचले होतै ई पानवाला, हमरा हेना के मने-मन हाँसतें देखी” ई सोची हम्मं पानवाला दिश देखलियै, जे अभियो तांय होन्है के फलकलो तरस्थी पर ठोढ़ी फँसैले सड़को दिश ताकी रहलो छेलै ।

हमरा आपना दिश देखतें देखलकै ते सीधा होतें कहलकै, “नै कसेली, ते लोंगे-इलाइची लिए । देखै छियै कसेली के दोनों टुकड़ा ते आपने के अंगुरिये बीचो में छै ।” आरो झट सनां वेनें एक छोटो रँ डिबिया के खोली वैसें इलायची निकालकै, फेनू छिलका उतारी के ओकरो दाना हमरा दिश बढैलकै—बड़ी निष्ठा साथें । हेनो करै वक्ती ओकरो बाँया हाथ के अंगुली सिनी दाँया हाथ के बाँही पर आवी के जमी गेलो छेलै आरो हमरो दाना उठैला के बादे जे हटलो छेलै । “आचरज छै, दस मिनिट बोललकै आरो आभी तांय नै ऐलो छै ।” हम्मं ई बात दुकानदार के सुनइये के बोललियै । से वैं उत्तरो में कहलकै, “दस मिनिट कहलें छौं ते साठ मिनिट बूझो । कहै के हिनी माट साहब रहौं, मतरकि हिनी छेकौं पकिया नेता आरो आयकल ऊ टीचरे की, जे नेता नै रहे । तखिनको जमाना छेकै थोड़े, जखनी गुरु के मतलब गुरु होय छेलै, आय गुरु के माने होय छै—गुरु घंटाल ।” ई बात के वैने थोड़ो दबले-दबलो आवाजो में कहलकै, मतरकि एतना साफ, कि कोइयो सुनें पारे ।

“ते की, है बात ये मंटुवे के सामना में राखी के बोललकै ?” हम्मं पानवाला के बातों के बिना कोय उत्तर देलें सोचलियै—झूठ भी ते नै बोली रहलो छै ई । नया जगह में ऐहें मंटू जे चाल चलना शुरू करी देले छेलै, वै सें बंधलो व्यवस्था में जेना उबाल आना शुरू होय गेलो छेलै.....छुट्टी होला के बाद, रोजे कोय न कोय टीचर साथे लय्ये के ऊ निकलै आरो ओकरा ई विश्वास दिलावै कि हेडमास्टर के एत्ते सवेरे आवै के की मानी छै.....वैं कहै, “हमरो मालूम छै कि इस्कूली के पैसा कोन-कोन फण्डों के नीचे दबलो रहै छै, आरो जेकरो नीचे हेड के परानो । ई ते भाग मनावौ कि हमरो गाड़िये देर पहुँचै छै, नै ते धोन सहित प्राण उखाड़ी के राखी दियै ।”

है की खाली मंटुवे के विश्वास छेलै, दुसरो मास्टर सिनी के ये विश्वास छेलै सालों सें । मंटू खाली ओकरा बोल देले छेलै—विरोध करै के । आरो फेनू शुरू होलै बातों सें गाली तक के उठा-पटक । पढ़ाय-लिखाय ते हेन्हौ के नहिये हुऐ । पहिलें मास्टर सिनी स्टाफ रूमों में देश सें लैके दुनिया तक

के राजनीति बतियावै; एकरा सें फुर्सत मिलतै, वेतन, पेंशन, हड़ताल आरनी पर.....

आबे मंटू के ऐला पर शिक्षक सिनी आपन्हें में उलझी ऐलो छेलै । लड़का ते तभियो मैदान में दिन भर फुटबॉल खेलते रहै आरो अभियो..... मतरकि हेडो ते कम बड़ो खेलाड़ी नै छेलै.....एक दिन मंटू नै ऐलो छेलै, हेडें सब टीचर के बोललकै आरो कहलकै—“हमरो कखनू ट्रान्सफर हुएँ पारे । जेकरा जे सीआर हमरा सें लिखवाना छौं, लिखवाय लियो ।”

धनवन्तरी महाराज के जड़ी रँ काम करलकै हेड मास्टर साहब के कथन आरो वही दिनों सें सब टीचरें मंटू के साथ छोड़ी देले छेलै । हमरा सें कै दाफी ऊ ई रँ कन्नी कटाय के कारण जानै ले चाहलकै, मजकि हमरो गोबध नै टूटे । एकदम गुम्मी साधी लियै ।

आरो फेनू एक दिन हठाते विन्डोवो । ई ते महीना भरी बादे हमरा सिनी के मालूम होलै कि है विन्डोवो हेड सर के उठेलो छेलै । लड़का सिनी के है कही सनकाय देलकै कि हुनी ते यहै चाहै छै कि ओकरो सिनी के परीक्षा-केन्द्र यहै इस्कूल रहे, पटना तक पैरवी होय चुकलो छै, मतरकि नया सर मंटू एकरो विरोध करी रहलो छै । चाहै छै कि सेन्टर दुसरो जिला, दुसरो इस्कूल पड़े ।

हेडमास्टर के एतना कहना छेलै कि उठवे नी करलै विन्डोवो । लड़का सिनी दिन भरी सड़क जामे रखलकै । आस-पास के छोटो-मोटो दुकानी के लूट-पाट होय गेलै । नारा, अलगे ताबड़ताड़—सबभे टीचर सच्चा छै, मंटू टीचर लुच्चा छै ।

शिक्षा पदाधिकारी ऐलै, पुलिस ऐलै । हेडमास्टर साहबें दोनों के आपनों रूम लै गेलै । आध घंटा बात-चीत चललै आरो जबे बाहर निकललै ते एकदम चेहरा खिललो-खिललो लै के । जेकरा देखतै लड़का सिनी के विद्रोहो अलोपित होय गेलै आरो ठीक दुसरे दिन सबनें जानलकै कि मंटू के तबादला होय गेलै । इस्कूल छोड़े के नोटिसो तुरत मिली गेलो छेलै । है सब एत्ते जल्दी-जल्दी होलै जेकरो कल्पना मंटुओ तक के नै रहै ।

“एक बात कहियौं माट साहब ?” दुकानदार के प्रश्न सुनी के हम्में चौंकी उठलियै, “हों कहो ।” आरो गड़लो नजरी सें ओकरो दिश देखलियै ।

“बुरा नै मानियो माट साहब” फेनू आपनों दाँया हाथ पूरब दिश दिखैतें कहलकै, “हौ जे इस्कूल छेकै—मिसनरी वाला, वहाँ ओत्तो टीचर नै होतै, जत्ते आपने के इस्कूली में । एकाध टा कम्मे होतै, आरो हमरा ते मालूम होलो छै कि तोरा सिनी

के जत्ते तनखा मिलै छीं, ओकरो अधियो नै मिलै छै—मिशनरी इस्कूल के टीचरो के—एक चौथाइये कहो । आरो देखो, की समय पर आवै छै, की समय पर जाय छै । जेहनों लड़का सिनी अनुशासित, होन्हे टीचर.....बुरा नै मानियो माट साहब, आय तांय ई स्कूली के टीचर सिनी के हड़ताल करतें नै देखलियै, तोरा सिनी हेनो आरो तोरा सिनी के हड़ताल-आन्दोलन के नामो पर सालो भर ठीक सें विद्यालय करतें नै देखलियो । ई दुकानी पर रं-रं के टीचर सिनी आवै छै, है ते कहना मुश्किल कि कोन-कोन इस्कूली के हुनका सिनी टीचर छेकै, मजकि हुनका सिनी के खुल्लमखुल्ला के बातों सें सबटा बात ते समझै में ऐवे नी करै छै । हमरा अभियो याद छै कि खाली शनिचराहै पैसा के आपनो वेतन समझी, हमरा सिनी के गुरु नें ओतन्है ज्ञान देलकै, जत्ते तोरा सिनी महिनवारी पन्द्रहो हजार टाका लै के नै दिऐ पारै छै । वहे गुरु के हमरो रं चेला के सामना तोरो एम. ए., बी. ए. वाला चेलाहौ नै टिके पारे । झूठ नै कहै छियो.....माट साहब बुरा नै मानियो, सरकारी इस्कूल के टीचर सें लैके लड़का सिनी के मोन-मिजाज एकदम सरकारिये आदमी रें । आदमी हताशा में आपनो बच्चा मिशनरी इस्कूली में दै छै—आरो जेबे अंग्रेजी, अंगरेजियत फैलै छै, ते ओकरो ले चीखै-चिल्लावै छै कि अंग्रेजी शिक्षा बन्द करौक । आपना पास त्याग के ते भावे नै रही गेलो छै । माट साहब, है ते जानले बात छेकै कि जहाँ पैसा पावे के हाही बड़ी जाय, वहाँ आदमी के ज्ञान पहिले बनरयावै छै । आरो हेनो आदमी सें देश-दुनिया के हित सोचवो गूहो में घी ढारबो ।”

ई सब बात ऊ कोय सिद्ध साधू नाँखी बोली गेलै, जे हमरा तीर नाँखी लागलो छेलै । विरोध करतें कहलियै, “तोरा सिनी के है ओखो सोच के पीछू दरअसल मास्टर सिनी के बढ़लो वेतन छेकै । तोरा सिनी चाहै छै कि मास्टर सिनी भिखमंगा नाँखी जिऐ ते बड़ी बढ़ियो, नेता-मंत्री पर अँगुली ते उठावे नै पारवो ।”

कि तभिये मंटू हुप सना सामना आवी के साइकिल रोकी देलकै । ऊ जो न दिश सें गेलो छेलै, हुन्हें सें नै आवी के दुकानी के ठीक पीछू वाला एकपैरिया रास्ता सें साइकिल हाँकले ऐलो छेलै । साइकिल रोकतें कहलकै, “बुरा नै मानिये विकास, हेडमास्टर साहब सें बात करै में कुछ देर होय गेलै, सब्भे बात सलटाना जरूरी छेलै ।” कहतै-कहतै वैने साइकिल के स्टैण्ड पर खाड़ो करलकै आरो नगीचे वही बेंची पर बैठी गेलै । पानवाला के दू अँगुली दिखाय के दू खिल्ली पान दै के संकेत करलकै आरो फेनू हमरा सें कहे लागलै, “हमरो खिलाफ लड़का सिनी के भड़काय के वै हेडमास्टर की समझले छेलै, वै वाजी

मारी लेलकै । चहैतियै तेँ बीच रस्ता में छेकी केँ.....तबेँ चलें, जे होलै, अच्छे होलै । ई इस्कूल छेवौ करै एकदम अबहट्ट में—सड़क सेँ चार मील दूर । कोँन पदाधिकारी के मोँन करतै कि धुरदा-गरदा फाँकतेँ आरो गड्डा-गुड्डी पार करी इस्कूली के इन्सपेक्शन करौं । सड़के सेँ पूछ-ताछ करी केँ चल्लोँ गेलोँ आकि हेडमास्टर साहब के घोरोँ पर ऐलोँ आरो गेलोँ । लड़का तेँ पाँच सौ के करीब छै, मजकि खाली रजिस्ट्रे पर । पचासो टा नै आवै छै । हेडमास्टर लगाय केँ दस मास्टर छियौ । सब के पारी बान्हलोँ छै । बस हफ्ता में तीन दिन आना छै, तीन दिन के हाजरी जोँन दिन ऐलां, बनाय लेलां । कोय हरहर-कचकच नै । खाली जोँन दिन वेतन उठाना रहै छै, वहेँ दिन इस्कूल के सब मास्टर के मेला लागलौ ।” आरो ई कहतेँ-कहतेँ वैँ ठहाका लगाय देलेँ छेलै ।

हमें चोर निगाह सेँ पानवाला दिश देखलेँ छेलियै, जेकरोँ हाथ तेँ कथा-चूना पर चली रहलोँ छेलै, मतरकि ओकरोँ कान हमरहै दोनों पर गड़लोँ छेलै । हमरा लागलै, जेना वैँ हमरा सेँ पूँछतेँ रहेँ, “आबेँ तोरा की कहना छौँ, माटसाब ?”

जेना एक कड़ा सवाल गुरू जीं चटिया सेँ पूछी देलेँ रहै आरो हमें बक्खोँ । की जवाब देतियै ! बस उठलियै आरो मंटू सेँ दोनों हाथ मिलैतेँ साइकिल पर सवार होय गेलियै । हेन्ही केँ बहुत बेर होय गेलोँ छेलै । पीने ग्यारह तेँ अभिये बजी रहलोँ छै । जैतेँ-जैतेँ पन्द्रह मिनट आरो । तेज-तेज चलतेँ इस्कूल पहुँचलियै । खैर आभी कोय टीचर नै ऐलोँ छेलै । लड़का सिनी उछल-कूद करी रहलोँ छेलै आरो इस्कूल के चपरासी बायां हाथ में घंटी केँ ऊपर उठैनें दायां हाथ के छड़ी सेँ टनटनाय रहलोँ छेलै—टन, टन, टन, टन..... ।

माय

“माय केँ है मालूम नै छै, कि केना केँ बाबू जी के ठठरी उठहैं जेठोँ बेटाँ मइयो के बोरियो-बिस्तर बांधी देलेँ छेलै आरो हमरा कहलेँ छेलै—लै जो माय केँ, जहाँ लै जाना छौ । बाप-माय के ऋण खाली बड़के बेटा वास्तें नै होय छै, छोटको लेँ होय छै ।” कहतें-कहतें हमरोँ कंठ भरी ऐलै, “आरो आय देखोँ, माय बड़के बेटा कन जाय लेँ जिद मचैलेँ छै ।”

“जिद मचैलैं सें की होतै, माय केँ वहाँ नै जाना दै छै । पचहत्तर के होलै, देह-हाथ के काठी होन्है केँ झलकै छै, वै पर आँखी सें लाचार । दिशा-मैदान लेँ बहियार जैतै आरो नहावे लेँ ओल्लेँ दूर नद्दी—काँही कुछ होय गेलै तेँ लेनी के देनी । की होय छै, एकाध दिन शोरे नी मचैतै । समझी जैतै कि नै लै जाय वाला छै, तेँ आपने चुप होय जैतै ।” चौर बिछती शैलजाँ आपनोँ मूड़ी बिना उठैले कहलकै ।

“ठीक कहै छौ” हममें कहलियै आरो माय दिश एक दाफी ताकी केँ आपनोँ कोठरी में जाय बैठलियै । एक केस के काम जल्दी-जल्दी निपटाना छेलै । जों आय खाता-खसरा पूरा नै होय छै, तेँ यहू पार्टी हाथोँ सें निकलै ही वाला छै, जे रँ कि ऊ कल झुंझवैलोँ बोली गेलोँ छै ।

अभी फाइल खोललोँ नै होवै कि माय उठी केँ हमरोँ कोठरी चललोँ ऐलै “दिलो, की सोचलैं—हमरोँ जाय के बारे में” आरो बगले में पड़लोँ टेबुल पर बैठतें कहेँ लागलै, “कै दिनोँ सें तोरा सिनी सें कही रहलोँ छियौ कि हमरा मुकुन्द कन पहुँचाय दे । तोहें हमरोँ बेटा छेकैं, तेँ वहू हमरोँ बेटा छेकै । साल

भरी होय गेलै; हुनको उठला के बाद मुकुन्द के मुँह आय तक नै देखे पारले छियै ।”

मो न ते यहै करलै कि कही दियै—तोर्है को न देखै ले ऐलौ छौ—बाबू मरला के बाद । तोहें जो न बेटा के देखै ले बेकल होय रहलो छैं, तोरा नै मालूम कि हुनी तोरा देखलें कत्ते बेकल होय जैतौ । कहीं दुसरे दिन नै कही दौ, “माय, जानवे करै छैं कि यहाँ नहाय-धोयाय के कत्ते तकलीफ छै, तोहें दिलो के पास रहै छैं ते हमरौ शांति मिलै छै । शहर के बात अलग छै, घरे में मोर-मैदान सें लैके नहाय-धोआय के सब वेवस्था ।” हुनको पास तोरा वहाँ सें हटावै के सौ बहाना छौ ।

शायत माय के ई बतैये ले कि हमरो मो न ठीक नै छै, हममें आपनो कपारो पर दौया हाथ फेरै लागलियै, ते माय लागले कहलकै, “देखें, तोहें बहाना नै करें कि हमरो तबीअत ठीक नै । आरो सब काम ते करवे करै छैं, खाली हमरा घर पहुँचाय के नामो पर तोरो हठाते तबीअत खराब होय जाय छौ आकि कचहरी में काम बढ़ी जाय छौ । आरो जो एतन्हें व्यस्तता छौ ते हमरा देघरो वाली गाड़ी पर बैठाय दे । हममें असकल्लिये चल्ली जैवो । संते नगर ते जाना छै, गाड़ी दुआरिये होय के ते जाय छै ।”

पहिलो दाफी माय के ई रँ बेकल हममें देखलियै । इखनी माय के कुछुवो कहना ठीक नै होतै, ई सोची हममें चुप्पे रहलियै । फाइल बन्द करलियै आरो बायाँ हथेली पर कपार टिकैतें केहुनी के टेबुल पर टिकाय देलियै । माय हमरो मनो के बात गमी गेलै, से बिना कुछ बोलले उठलै आरो आपनो कोठरी में जाय के बैठी गेलै ।

शैलजा ऐलै आरो चाय के प्याली हमरो सामना में राखी देलकै । कुछ बोललै नै । मैयो के कोठरी गेलै आरो वहाँ ओकरो सामना में चाय राखी के रसोयघोँर लौटी गेलै ।

घरो में जबे भी माय जाय के बात उठाय छै, कुछ देर लेली माहौल सनसनावै छै, फेनू पहिलके नाँखी व्यवस्थित होय जाय छै । मजकि आय होनो बात नै होलै । माय जे कुछ कहलकै, वै में गुस्सा के रंग छेलै, जेकरा हम्मी नै, रसोई घर में चाय बनैती शैलजाँ सुनले छेलै । यहै कारण छेलै कि ऊ माय के आगू चाय रखी बाहर निकली ऐलै—बिना कुछ बोललै । नै ते चाय रखतें एतना टा जरूरे बोलै, “माय जी चाय, जल्दिये पीथिन, नै ते ठंडाय जैतै ।”

माय के चाय पीयै के खूब आदत छै । मतरकि चाय जब तक एकदम नै ठंडाय जाय, तब तांय ठोरो सें नै सटावै । चाय पर जबे गाढ़ो लाल पपड़ी

दूध के छाली रँ जमी जाय, तें माय उठावै । घर भरी जानै छै कि माय केँ खाली मिट्ठोँ चाहियोँ—चाय-वाय सें कुच्छू मतलब नै । मजकि शैलजा केँ ई बात एकदम नागवार गुजरै । से चाय रखहैं कहै—पानी बनाय केँ नै पीथिन । तबेँ माय हाँसी केँ प्याली उठावै आरो शैलजा के मोँन राखै लेँ ही ठोरोँ सें लगाय तुरत राखियो दै । शैलजा केँ मालूम छै, आबेँ माय एकरा तबेँ ठोरोँ सें लगैतै, जबेँ चाय ठंडाय केँ कजरी रंग के होय जैतै ।

आय शैलजा के होना केँ चाय राखी निकली जैवोँ मइयो केँ अखड़लोँ होतै, हम्में जानै छियै, मतरकि ऊ बोललै कुछ नै । बस आपनोँ गोस्सा जाहिर करै लेँ प्याली टसकाय केँ एक दिश करी देलकै ।

हम्में समझी गेलियै, इखनी आबेँ घरों में रहवोँ मुश्किल । नै शैलजा कुछ बोलतै, नै माय । बच्चा-बुतरू सहमलोँ-कटुवैलोँ हिन्ने-हुन्ने नुकियैलोँ फुरतै से अलगे । कै दिन सें बीनू, मटू आरो तुलसी देखी रहलोँ छै—जबेँ-जबेँ दादी कुछ बोले छै—माय-बाबू, दोनों दिन भरी अनखनोँ बनले रहै छै आरो हेना में कखनी केकरा डाँट पड़ी जैतै आरो केकरा धुमक्का—है कहना मुश्किल छेलै ।

कुछ सोचलियै आरो चाय सुढ़की केँ कमीज-फुलपैट के मांग करलियै, तें शैलजा रसोय घरों सें नै निकललै । है बात नै छेलै, कि हमरोँ आवाज ओकरा तक नै पहुँचलोँ होतै, मतरकि सुनियो केँ अनठियाय देलकै ।

की करतै आवी केँ । कोँन ओकरोँ बातों के हम्में ख्याल राखै छियै । कहतियै—बाहर जाय छोँ तेँ खाय-पीवी ला, आवेँ कखनी लौटवा, नै लौटवा । हम्मू निश्चिन्त रहवोँ, नै तेँ मनोँ में लागले रहतौ कि.... ।

आरो शैलजा के एतना कहला के बादो की होतियै—बस ऊ बोलतें रहतियै आरो हम्में कपड़ा पिन्ही बाहर निकली जैतियै । आरो जबेँ-जबेँ हेनोँ होलोँ छै, शैलजा भूखले रही गेलोँ छै—दिन भरी । कोय-न-कोय मुँहोँ से ई बात मालूम होइये जाय छै ।

“तुलसी कमीज-फुलपैट दिएं” बेटी केँ आवाज देलियै तेँ वैं झट सना लै आनलकै आरो बिना नजर मिलैलेँ वहेँ टेबुल पर राखी लौटी गेलै, जे टेबुल पर माय कुछ देर पहिलें बैठली छेलै । हमरा ई समझै में देर नै लागलै कि इखनी बच्चो-बुतरू यहेँ चाहतेँ होतै कि केन्हीं केँ बाबू जी घरों सें बाहर निकली जाय तेँ अच्छा । माय-दादी के हेनोँ कोप तेँ बच्चा-बुतरू केँ सहै के जेना आदत बनी गेलोँ छै । बाहर निकलै सें पहिलें आपनोँ आवाज केँ तेज करतें कहलियै, “बिनु माय सें कहीं दिऐँ—दादियो केँ ठीक टैम पर खिलाय केँ खुद खाय लेतौ । हमरोँ कोय ठिकानोँ नै—संझो बेरां लौटेँ पारों । जोँ ग्यारह बजेँ तांय नै ऐलियोँ तेँ

समझी लीं—हमें कोय हौटलो में खाय लेलिये ।”

घरो से निकलै वक्ती नै शैलजां टोकलकै, नै मइयें ।

आखिर कत्ते चक्कर मारतिये । घण्टा भरी पहिलें कचहरी पहुँची गेलिये । एकदम खाली-खाली हाता । मोर-मोकदमा लड़ैवाला के आवा-जाही ते दू घण्टा बादे होतै । हों रोजनके नाँखी हरिचन्दर आपनो टाइपराइटर पर अंगुली जरूरे उड़ाय रहलो छेलै । कलको बचलो काम दुसरो दिन सबेरिये आवी के निपटाय लै छै हरिचन्दर । दस आदमी के परिवार चलाय छै—सेहो एक टाइपराइटर पर । कचहरी खतम होला के बादो एक घंटा तांय खुटखुटैतै रहै छै । कोय मतलब नै—कोय कुच्छू बोले, नै बोले ।

हमरा लागलै, हमरा से दस गुना अच्छा छै हरिचन्दर । दू सौ टाका से एक्को दिन कम नै कमैतें होतै । कोय-कोय दिन ते तीनो सौ आरो यहाँ ते पचास-सौ पुरते-पुरते धतपत । वकील बनिये गेला से की होय छै, पाँच ठो डिगरिये लेला से की होय जाय छै । पत्थो के काम करै छै ते पुराने चोर । जे जत्ते पुरानो वकील, ओत्ते नामी । नामी होय में ओकरा आरो बीस-तीस साल आपनो खटास वकील के पुछड़ी थामले राखै ले लागे । दिन भरी टहलगिरी करो ते आखिर वक्ती हाथ में पचास टाका हेना के थमैतौं, जेना जमीन्दारी के कोय पट्टा थमैतें रहे । आबे की बतैयै कि ई आरती के पैसा से जबे खैनी के जुगाड़ तांय मुश्किल होय छै ते परिवार कहाँ से चलतै ।.....माय के पेंशन नै मिलतें रहतिये ते नै जानो की हाल होतिये हमरो । हौ ते महीना पुरतै माय के छो सौ मिली जाय छै, ते यादो नै आवै छै कि हमरा सिनी किराया के मकान में रहै छिये । मइयो सब बात समझे छै—तहीं से ते एक तारीख ऐतैं शैलजा के ले के बैंको से टाका लै आनै छै आरो बाहरे-बाहर मकान मालिक के हाथो में किराया थमाय दे छै । कोय तगादा ले दुआरी तांय आवै—माय के ई बात एकदम पसन्द नै । “आरो जबे माय देवघर चल्लो जैतै तबे.....” हठाते हमरो मनो में विचलित करी दे वाला बिन्डोवो उठलो छेलै—तबे किराया ठीक समय पर केना चुकैवै । मानी लै छिये कि ऊ महीना भरी मकान मालिक ठहरियो जाय, मतरकि है जरूरी ते नै छै कि महीना भरी के बाद माय लौटिये ऐतै । जाय रहलो छै ते लौटै, नै लोटै के बात ओकरो मनो पर छै । आरो ई ते हुऐ नै पारे कि मकान मालिक दोसरो महीना के एक तारीख के बिना दोनो महीना के किराया लेले मुक्ति दे दे.....आय छेके बीस, जो माय जिद्दे ठानी दे छै, ते कल नै परसू ओकरा पहुँचाइये ले लागतै.....पिछले महीना से जिद्द करी रहलो छै, ऊ ते हमें तीन दिन तांय बीमारी के बहाना करी बिछौना पर पड़लो रहलिये ते मांय

जाय के नाम पर मुँह बान्ही लेलकै.....एकदम चादर तानी के सुतले रही गेलो छेलियै । शैलजो परेशान रहलै—नै देह-हाथ गरम छै, नै कँपकँपी । हुएँ पारै छै—देह-हाथ के ऐंठन रहे आकि फेनू माथो दरद—यही ले लेटलो रहै छियै आरो माय आपनो बिछौना पर बैठलो—बैठलो बात के भाँपे के कोशिश करै, आखिर हमरा होलो छै की ? माय के मालूम छै—बाबू के मरला के ठीक सोलमे दिनो बाद, जबे हमरो पेटो में दरद उठलो छेलै, ते पक्का दस दिन तांय सौंसे घोँर उधियाय देले छेलियै; बाबू के मरै के दुक्खे जेना खतम होय गेलो छेलै । शायत वहेँ खयाल करी, जबे हमें बिछावन पकड़लियै तेँ माय के चेहरा तीनो दिन उड़ले-उड़ले रहलै । शैलजा जेन्है केँ हमरो घोँरों सेँ निकलै कि आपनो आँखी पर मोटो शीशा के चश्मा तुरत लगाय, बैठले-बैठले ओकरोँ चेहरा के भाव पढ़े के कोशिश करै—कहीं तबीअत ज्यादा तेँ खराब नै छै ।

.....ऊ दिन जेन्है शैलजा हमरोँ कोठरी सेँ निकली केँ माय लुग गेलै तेँ माय बड़ी फुर्ती सेँ साड़ी के अँचरा से आपनोँ चश्मा के शीशा बारी-बारी सेँ पोछी आँखी पर चढ़ैलकै आरो ओकरोँ चेहरा बड़ी गौर सेँ देखलकै, जेना शैलजा के चेहरा पर हमरोँ तबीअत के उतार-चढ़ाव लिखलोँ रहेँ । हमरा हँसी आवी गेलै । माय तेँ देखेँ नै पारै—सवो दाफी कहलेँ होवै—माय ठंडा आवी गेलौ, अबकी दाफी मोतियाबिन्द के ऑपरेशन करवाय ले, मतरकि ओकरोँ तेँ बस एक्के जिद, “हमरा लेँ तेँ दोनोँ बेटा—दू आँख । बेटा, आबेँ तेँ तोरहे सिनी हमरोँ आँख । ई आँख रहेँ कि जाय, की फरक पड़े छै ।”

“की बात छै दिलिप जी, आय एत्तेँ भोरे-भोर । तोरोँ कचहरी तेँ दस-ग्यारह के बादे जमै छौँ” हरचिन्दर नेँ टाइप मशीन पर आपनोँ आँगरी बिना रोकलहँ, हमरोँ दिश देखतेँ कहलकै, “गृहयुद्ध सेँ लौटलोँ छौ की ?”

कहतेँ-कहतेँ हाँसेँ लागलै हरचिन्दर । पान सेँ करियैलोँ ओकरोँ बत्तीसो दाँत अचोके दिखावेँ लागलै । कारोँ देह पर कारोँ रँ के कपड़ा सालो भर चढ़ैलेँ हरिश्चन्द्र बारहो घण्टा पान चबैतेँ रहै छै—यहीं सेँ ऊ बोलेँ-हाँसेँ नै के बराबर छै, जबेँ एकरोँ बिना काम्हे नै चलेँ, तभिये ऊ हाँसेँ-बोलेँ छै । आरो जखनी हाँसेँ, तेँ सामना ताला के कमीज आरो टाइप पर राखलोँ कागज छींटदार होन्हँ छेलै । जेना मुँह नै रहेँ—फुहारा ।

हममें देखलियै ओकरोँ हँसी हठाते रुकी गेलोँ छै । मतलब साफ छेलै कि मशीन सेँ लागलोँ कागज कुछ ज्यादाहे रंगी गेलोँ होतै । हमरहौँ हँसी आवी गेलै । कोँन हेनोँ पार्टी नै होतै जे यहेँ कारण हरचिन्दर सेँ उलझतेँ नै होतै आरो फेनू नरमो नै पड़ी जैतै होतै । उपायो की छै—हरचिन्दर अकेला आदमी छेकै जे

हिन्दी टाइप करै छै, नै नरमैतै तेँ कल सें कामो नै होतै । हमरोँ मनोँ में ऐलै, जोँ हम्मूँ हिन्दी टाइप करै लेँ जानतियै तेँ हमरोँ स्थिति आरो कुछ होतियै ।

एकदम सें उचाट होय गेलै मोँन । जरूर हमरोँ चेहरा एहँ मनझमान होतै कि जे भी देखतै, वहीं टोकतै । उठलियै आरो हरिचन्दर केँ बिना कोय जवाब देल्लै सीधे सड़क पर आवी गेलियै । मोँन होलै कि जयप्रकाश उद्यान चल्लोँ जाँव । कै दाफी तेँ वाँही रही केँ दिन काटी देलेँ छियै—मोँन उचाट होला पर ।

मतरकि हेनोँ चाहतौँ, हम्में हुन्नेँ जाय के बदला आपनोँ घरों दिश मुड़ी गेलियै—पता नै, घरों में कोँन कुहराम मचलें रहेँ, ओकरोँ भुखले चल्लोँ ऐला पर । जोँ मइयोँ कौर नै उठैलकै तेँ आरो विपद । कै दाफी हेनोँ होइयो चुकलोँ छै । आबेँ माय नै खैतै तेँ शैलजौँ केना खैतै । आरो जबेँ दोनोँ भुखलोँ छै तेँ तुलसिये, बीनू आरनी के कंठों सें कल्लेँ कौर नीचेँ निकलतै । बस ऊ दिन सौँसे घोर के उपास.....जबेँ उपास के सचमुचे नौबत आवी जाय ? ऐतै तेँ देखलोँ जैतै, हेनोँ दिन ऐलोँ नै छै की ? हम्में केन्होँ केँ नै भुलावेँ पारौँ ऊ दिन—हफ्ता भरी के बंदी होय गेलोँ छेलै—बीच कचहरी में हौ रं के नामी वकील वीरू बाबू केँ गुण्डा भरनांटी दिखाय देलकै । हेनोँ बंदी होलै कि कचहरी में भंक लोटेँ लागलै, तबेँ मोँर-मुकदमा लड़ैवाला के दूर तांय छायाहौ नै दिखावै । पैसा आनतियै कहाँ सें ? एक शाम खाना चलै, तेँ एक शाम उपासे ।

जोँ सुखोँ के दिन आवियो गेलै तेँ ऊ दिन केना केँ भूलेँ पारवै—सड़क के किनारी गुपचुप के खाड़ोँ खोंचा । पाँच छोँ खायवाला के पाँत । खोंचावालां देलेँ जाय आरो खवैयां मुँहोँ में देलेँ जाय । वैने दूरे सें देखी लेलेँ छेलै—बिनू-मिन्दू खोमचा सें थोड़ोँ दूरी पर खाड़ोँ छै । ओकरोँ नजर गुपचुप के निकालै आरो उठावै के साथ उठी-गिरी रहलोँ छेलै । हमरा देखल्लै दोनोँ छरबिन्न नाँखी उड़तें घरों में नुकाय गेलै—मारे डरोँ सें.....हम्में मारतियै की, खुद्दे मरी गेलोँ छेलियै—जे बाप आपनोँ बच्चा केँ दू शाम ठीक सें भोजन नै दिऐँ पारेँ, ओकरा बाप बनै के की अधिकार । सौ बच्चा के हत्या से भी बड़ोँ पाप छेकै—एक बच्चा केँ भूखे रखी केँ बाबू बनवोँ ।

गुपचुप वाला बात याद ऐहँ हम्में एकदम व्याकुल होय जाय छियै । चाहै छियै—बाते केन्हौ केँ भुलाय दौँ, मजकि ऊ तेँ तेलन्होँ कपड़ा पर जमलोँ धूल नाँखी उतरवे नै करै छै, जबेँ तांय कोय जब्बड़ बात नै सामना में आवी जाय ।

“अरे दिलो, आय एत्ते जल्दी । आय कचहरी नै छीं की ?” दुआरी पर गोड़ राखहैं मौसीं टोकले छेलै ।

“अगे मौसी ।” हम्मू आपनो चेहरा पर कठहस्सी लानतें कहलियै, “कखनी ऐलै ? हमरा ते फुर्सते नै मिलै छै कि तोरा से भेटो-गांट हुए पारे । कचहरी के कामों से मुक्तिये नै मिलै छै । आरो घोरो पर वहे हलफनामा-तफलनामा से उलझते रहो । मजकि तहू ते हिन्ने गोड़ नहिये धरे छें—जब तांय कोय भारी काम नै आवी जाय । की झूठ कहै छियौ ?”

“नै, झूठ ते नै बोलै छो । की करियै, नौकरी जोगे में साँसो ले के फुर्सत नै । हाय-हाय करी के बिहाने उठो, चौका-चुल्हा करो, बच्चा के खिलावो, फेनू घोर लौटो ते वहे माया ।” मौसी जे दुआरी के बरामदे पर बिछेलो खटिया पर बैठली छेलै, थोड़ो खिसकी के हमरो वास्ते जग्घो बनैलके आरो वही जग्घा के दू-तीन बार थमथपैते हमरा बैठे के इशारा करलकै ।

हम्में जबे वहे जग्घा पर बैठी गेलियै ते मौसी कहलकै, “तोहें ठिक्के कहलौ, मौसी बिना काम के हिन्ने आवै नै पारे । अइयो कामे ले के ऐलो छियै” आरो फेनू दिलो के कुछ कहला के पहिले कहनौ शुरू करी देलकै, “है कहै छियौ दिलो, तोहें माय के देवघर पहुँचाय केन्हें नी दै छौ ? आबे माय के औरदे कत्ते दिन ? जबे तांय जीतो छै, जे चाहै छै, पूरा करी देलो करौ । तोरो बाबू नै रहलौ ते की, हुनको पूरा-पूरा जिनगी ते वांही बितलै । आबे जो न-जग्घा से हुनको ठठरी उठलै, ऊ जग्घा के प्रति मोह-माया ते होवे नी करतै नूनू । माय कुछ पैसा-कौड़ी ते मांगै नै छीं, से ते तोरो बाबू आपनो पेंशन से दीदी के बचलो जिनगी के खेपे लायक वेवस्था करिये गेलो छीं । आबे बचलै—लै आरो पहुँचाय आवै के । से ते तोरहै दोनो भाय के नी करै ले लागतौ । जानवे करै छौ कि माय के सूझै पाकै छीं नै । जो सूझवे करतिऐ, तभियो की ? दीदी के देश-दुनिया के की पता । कभियो बाबू दुआरी से बाहर ते निकले नै देलखौ । शादी के बाद घुरी के नैहरा नै देखलकै दीदी । कहीं देखले छौ हेनो मिडिल पास लड़की आकि जनानी, जेहनों दीदी छै ? जबे दीदी वास्ते देहरी के बाहर अन्हारे अन्हार छै, तबे ते तोरा समय निकाल्लै ले पड़तौ । कोन मारे कंधा पर बंधी राखी के तीरथ-वैरांगन कराय ले माय कही रहलौ छीं, बस देवघर तांय ते पहुँचाय के बात छै । भोरे जैबा ते सँझकी तांय लौटी ऐवा ।” मौसी ई सब बात एक्के साँसो में बोली गेलै ।

“मौसी, तोहें समझै नै छें, ई सब बात थोड़े छै कि हम्में माय के देवघर पहुँचाय

ले नै चाहै छियै । तोहें समझै केन्हें नी छैं—माय के आबे आँख-कान ते रहलै नै । आबे ओल्ले समांगो नै रहलै कि आपनो साड़ियो थपकारी ले; कुइयाँ से पानी खीचे के ते बाते छोड़ी दें—जबे यहाँ चापाकल के हेंडिलो उठावे-बैठावे नै पारे छै । यहाँ छै ते छोटकी पुतोहू सेवा करी दै छै, वहाँ के नौड़ी बैठलो छै—माय के हुलकियो ताकै वाली ।”

हम्में है सब बात फोकनैले मनो से कहलियै । हमरा जानै में ई तनियो टा देर नै लागलो छेलै कि हमरो घरों से निकलतहें माय मौसी कन पहुँची गेलो होतै आरो सबटा हाल सुनाय देले होतै । दसे घोर के बाद ते मौसी के घोर छै । शैलजां खुद दू-तीन दाफी माय के साथे चली के ओकरा मौसी घोर तक जाय वाला रास्ता चिन्हवाय देले छै । आबे माय असकल्लिये, जबे होलो मौसी कन पहुँची गेलो । ते आय पंचैती करै ले माय मौसी के बुलाय आनले छै । “देखो बेटा, वहाँ दीदी के कोय देखैवाला छै, आकि नै छै, आबे ई बात के ले के तोहें माय के जाय से नै रोको । जो कोय नै छै ते जेठो बेटा ते छै ।” “मौसी, नै जानै छैं कि तोहें जहाँ माय के ले जाय ले कही रहलो छैं, वहीं ठां से माय.....”

“छोड़ो-छोड़ो ई सब बात ।” मौसी बीचे में हमरो बात काटते हुँ कहलकै, “होन्हो के माय ते बेटा के सब अनकुटो बेवहार पचाय ले ही होय छै । तोंही की बच्चा में माय के कम सतेने छै । एक दिन गेंद वास्ते तोरा दू टाका नै देले छेलो ते माय के केन्हो पीटी देले छेलो, जेना कोय बुतरु के बड़काही नै पीटे छै । दीदी मूड़ी झुकाय के तोरो सब मार सही लेले छेलहैं, मतरकि आपनो नै मूँ खराब करले छेलै, नै आपनो हाथ । आबे बड़का बेटा जे भी करतै, एकरा से बेसी ते नहिये नी करतै ।”

मौसी कहीं से गुस्सा में छेलै । मजकि ओकरो गोस्सा से कहीं ज्यादा ओकरो बात हमरा लागी गेलै । एकदम गुम होय गेलियै । हमरो चेहरा उतरी ऐलै, जेना कोय पानी ढारी के आग बुझाय देले रहे । हम्में पासी पर दोनों हाथ के बल दै के उठै ले चाहलियै ही कि मौसी हमरो हाथ पकड़ी लेलकै, “दिलो, माय के कल बिहानी जरूरे देवघर पहुँचाय दौ । भाय आरो गाय के सींघ भले जन्मो से अलग रहे, माय के मोन आरो कोख कभियो बँटलो नै रहै छै । फेनू माय कोन मारे उमिर काटे ले जाय रहलो छै, महीना पुरते नै पुरते देखियो नी, यहाँ आवै ले धड़पड़ करे लागतौ । हम्में जाय छियो दिलो । देखियो माय के मोन कलपिल्लो नै हुँ ।”

हमरो कोय बोली नै फुटलै । मौसी उठी के बाहर निकली गेलै । माय

आपनों कोठरी में बैठली-बैठली सब बात सुनी रहलो छेलै आरो शैलजा शायत रसोय घोरो में होतै, यहीं सें मौसी के जाय के बारे में ओकरा कोय इलिम नै होलै । आरो हमरो ते मने एत्ते टूटी गेलै कि मौसी के रोकै वास्तें नै मुहे खुललै, नै हाथे बढ़लै ।

ऊ दिन रात मरुवैलो-मरुवैलो हेनो रहलै । वहे माहौलो में आधो रात के बाद हमरो आरो शैलजा के बात होलो छेलै, जबे माय साथें बच्चा-बुतरू सुती गेलै । हमरो भूल छेलै कि शैलजा मौसी के बात नै सुतले होतै । जखनी मौसी बोलै छलै, तखनी शैलजा चौर बीछे के बहाना ऐंगनाहै में बैठली छेलै । सें शैलजाहें सब तरह सें सोची-विचारी के कहलकै, “जो माय यहे चाहे छेथिन, ते तोहें हिनका पहुँचाय आवौ—जे होतै, जेना होतै, देखलो जैतै ।” “तोहें एकदम ठीक कहै छो । हम्मू सोची लेले छियै, बिहानके गाड़ी धरी के माय के देवघर धरी ऐवै । माय कहीं है ते नै सोची लेले छै कि ओकरूहै सें हमरो सब भांगटो संभरै छै । रहोक जेठा बेटा कन, जेठे बेटा आग देतै ।”

आरो विहान होतें न होतें शैलजां माय के जगाय देलकै ।

देवघर जाय के बात सुनिये के माय झबझब आपनों कपड़ा-लत्ता एक प्लास्टिक वाला झोली में समेटी लेलकै । शैलजा रास्ता के नास्ता ले रसोईघर घुसी गेलो छेलै ।

फरचो होय पर छेलै । गाड़ी ठीक पाँच बजे छै । देखलियै आपनों झोली उठाय सें पहलें मांय बिनू, मिंटू आरो तुलसी के गालो के एकेक करी के चुमले छेलै ।

हमरे नाँखी रास्ता भर माय चुप्पे रहलै । गाड़ी पर चढ़े वक्ती चेहरा पर जे चमक दिखाय पड़लो छेलै, ऊ अनचोके गाड़ी के खुललें आलोपित होय गेलो छेलै । बीचो-बीचो में माय हमरो दिश आँख करै—शायत कुछ कहै ले चाहे, मतरकि हमरो नजर झायवर दिश तनले रहलै ।

गाड़ी घोरो के दुआरिये होय के देवघर बस स्टैण्ड पहुँचै छै । कन्डक्टर के पहिलें बताय देले छेलियै, सें दुआरिये पर गाड़ी रुकलै । सामाने की छेलै—बस एक झोली । ओकरा लेल्लें माय साथ नीचे उतरी ऐलियै । झपटी के झोली ठो दुआरी पर राखलियै आरो दौड़ी के गाड़ी पकड़ी लेलियै । गाड़ी चलै पर होलै ते माय दिश देखलियै—माय के दोनों हाथ आशींवाद दै ले ऊपर उठलो छेलै ।

दुपहरिया के दू बजतें होतै, जखनी हम्में घोँर लौटलियै । बिनू, मिंटू आरो तुलसी इस्कूले में होतै—ई जानले बात छेलै । शैलजा दुआरिये पर ठाड़ी

हमरो इन्तजारी में छेलै ।

दुआर पर गोड़ राखतैं अनमनैलो ढंगो से सूचना देलियै, “पहुँचाय ऐलियै, बड़के बेटा के पाली—छायौ झबरले गाछ के मिलै छै, टूठ के नै.....” कि हठाते अकचकैते ठाड़ी शैलजा से पूछलियै, “अरे ई तोरो हाथो में ? लगै छै, माय हड़बड़ी में लैले भूली गेलै ।” फेनू झुंझलैते बोललियै, “आबे एकरा पहुँचावै ले फेनू देवघर दौड़ो ।”

हम्में देखलियै हमरो बात सुनतैं शैलजा के आँख डबडबाय ऐलो छै । कहलकै, “से बात नै छै, जाय वक्ती माय ई हमरो हाथो में थमाय देलकै, ई कहते कि होना के हम्में तीनो महिना नै ठहरवौं, तबे माय के ममता । वै कहते ते रुकियो जाय ले पड़े । तोहें घरो के ख्याल राखियो । है पास बुक छौं । सब पन्ना में दसखत करी देले छियौं । होना के एतना टा टाका से होवे की करै छै—तहियो ।”

शैलजा माय के एकेक बात सुनाय रहलो छेलै आरो हमरो आँखी के सामना दोनो हाथ उठैने माय फेनू ठाड़ी होय गेलै ।

कहानी के कोख

स्टेशन पहुँचला पर सतेन्दर के पता चललै कि विक्रमशिला आवै में अभी दू घण्टा देर छै । ओकरोँ मौँन एकदम सें भिन्नाय गेलै, मतरकि आबेँ वें करै की पारै छेलै । है संकट टालौ पारैँ छेलै, जों घरै सें गाड़ी आवै के बारे में जानकारी लै लेलेँ होतियै । घर के टेलीफोन खराब छेलै तें की, बूथे कत्तेँ दूर छेलै—घरोँ के दुआरिये पर तें । मतरकि ठीक वक्ती पर ओकरोँ बुद्धि एकदम सें सठियाय जाय छै । आबेँ चक्कर मारोँ हिन्नेँ-हुन्नेँ टीशन पर आरो ताकतें रहोँ उल्लू जकाँ सवारी आरो रेल डिब्बा केँ । कि तखनिये ओकरा क्षेम सुमन के खयाल ऐलै ।

स्टेशन के ठीक हौ पार के मुहल्ला में रहै छै क्षेम सुमन । रिटायर होला के बाद तें क्षेम कहुँ बाहर निकलवो नै करै छै—सतेन्दर नें मने-मन सोचलेँ छेलै, होतै तें घरे में । नै होतै तें ओकरी पत्नी सपना तें जरूरे घरोँ में होतै । तखनिये ओकरोँ मनोँ में यहू विचार उठलै, जों क्षेम घरोँ में नै होतै आरो सपना होवो करै छै, तें एकरा सें होइये जाय छै की ? ज्यादा-सेँ-ज्यादा सपना एक-दू मिनिट लेली ओकरोँ पास बैठतै, फेनू घरोँ के है काम, हौ काम लेली ऊ बौला-बौला । नौकर भी राखलेँ छै क्षेम नें, लेकिन रसोय के एक काम नै करेँ पारैँ नौकर । सब टा काम सपनाहै केँ करै लेँ लागै छै, जों क्षेम केँ केन्ही मालूम होय जाय कि नौकर नें आलू काटलेँ छै, आकि चौर धोलेँ छै, तें हौ दिन क्षेम उपासे पर रहतै । खाना तें खाना, घरोँ के कपड़ो-लत्ता नै छुएँ पारैँ नौकरें । नौकर खाली बाजार सें समान लानै वास्तेँ छै आरो बगीचा के फूल-पत्ती के गाछोँ केँ पटावै-देखै लेली ।

बाकी तेँ सपना केँ टुकनी रड उड़ी-उड़ी केँ देखै लेँ लागै छै.....हेनोँ हालतोँ में वहाँ बैठवो तेँ मुश्किल । फेनू सतेन्दर के मनोँ में यहू ऐलै कि क्षेम बाहरो जाय छै तेँ बस चार-पाँच मिनिट लेली । जोँ ऊ हिन्ने-हुन्ने गेलोँ होतै तेँ यै बीचोँ में लौटियै ऐतै.....आरो कोँन फेरू हम्मै वहाँ रात बिताय लेँ जाय रहलोँ छियै । घन्टा-दू-घन्टा के तेँ बात छेकै । फेनू डेरे कोँन दूर छै, नै होतै तेँ घूमी ऐवोँ । आवै-जावै में कुछ समय तेँ हेन्हीं केँ कटिये जैतै । स्टेशन पर बोर होला सेँ तेँ यहै बढ़िया ।

द्वार पर आवी केँ सतेन्दर नेँ जेन्हैँ कुंडी खटखटैलेँ छेलै, तेँ द्वार क्षेम नेँ ही खोललेँ छेलै । दोनोँ के चेहरा पर एक खिललोँ मुस्कान उभरी ऐलोँ छेलै ।

“आव सतेन्दर आव, आवेँ तेँ हिन्नेँ आन्है-जाना छोड़ी देनेँ छै । की कोय नया रोजगार फेनू धरी लेलैँ की ?”

“धूरो, नया रोजगार, आरो ई शहर में ! हों एकटा अखबार में लिखबोँ शुरू करी देलेँ छियै ।” कहतेँ-कहतेँ सतेन्दर जबेँ कमरा के भीतर आवी गेलै तेँ क्षेम नेँ केबड़ा ओढ़काय देलकै ।

“सुनै छोँ, सतेन्दर ऐलोँ छौँ, आवेँ तेँ ई सब बड़का आदमी होय गेलौँ भाय । अखबार में लिखना की आसान बात छेकै ।” ई कहतेँ-कहतेँ क्षेम गद्दावाला लम्बा कुर्सी पर आपनोँ दोनोँ हाथ फैलाय केँ बैठी रहलोँ छेलै, जेना कोय बड़ोँ पक्षी पंख खोली केँ आकाश में उड़ै ही वाला रहेँ । तब तांय सतेन्दरो वहीं पर पड़लोँ एक गद्दै वाला कुर्सी पर बैठी गेलोँ छेलै ।

“की कहलैँ, अखबार में लिखना शुरू करी देलेँ छै.....” आरो ई कही केँ ऊ हाँसेँ लागलोँ छेलै ।

सतेन्दर केँ ऊ हँसी में छुपलोँ उपहास साफ-साफ पकड़ै में आवी रहलोँ छेलै, मतरकि ऊ यहौ जानै छै—क्षेम के ई पुरानोँ आदत छेकै । तहियो ओकरोँ बात सुनी केँ ऊ मनझमान होय गेलोँ छेलै । कि तखनिये सपना ट्रे में तीन चाय लै केँ आवी गेलोँ छेलै आरो मुस्कैतेँ हुँएँ कहलेँ छेलै, “आवेँ ऐतै चाय के मजा । चाय-वाय वक्ती कोय लेखक-कवि सामना में रहै छै तेँ चाय के मजे बढ़ी जाय छै ।”

ई बात पर सतेन्दर के चेहरा हठाते खिली उठलोँ छेलै आरो कहनेँ छेलै, “से बात नै छै, चाय के मजा तेँ ई बातोँ पर निर्भर करै छै कि साथ दै वाला के छेकै ।”

सतेन्दर नेँ ई बात शैत क्षेम केँ सुनाय केँ ही कहलेँ छेलै, से वैँ ई कही केँ ओकरोँ दिश देखलेँ छेलै । लेकिन क्षेम ओकरोँ बात सुनलै नै छेलै । ऊ

तेँ हाथ में एकदम छोटीँ रँ के नाव नुमा रिमोट सेँ टी० वी० के सिरियल धांय-धांय बदली रहलोँ छेलै, जेना ओकरा कोय सिरियले पसन्द नै रहेँ—सब फालतू ।

तखनी क्षेम सचमुचे में काफी खिललोँ दिखी रहलोँ छेलै—शैत तुरत नहाय केँ ऐलो छेलै । खुल्ला देह पर गमकै वाला पाउडर, जे गल्ला सेँ शुरू होय केँ छाती तांय जाय केँ हल्का होय गेलोँ छेलै । फेनू गल्लै में स्फटिक पत्थर के माला साथेँ छोटीँ दाना के रूद्राक्ष माला, जे चाँदी के तार आरो दाना सेँ गुथैलोँ रहै—बड़ी शोभी रहलोँ छेलै क्षेम ।

सतेन्दर के आँख हठाते घुरी केँ सपना पर लौटी ऐलै ।

भारी उमस के बावजूद, शैत सपना केँ नहाय के मौका नै मिललोँ छेलै । जोँ नहैलेँ होतियै तेँ ओकरो केश संवरलोँ होतियै, साड़ी पर ढेर सिनी सिलवट नै होतियै, तबेँ चाय लानै के क्रम में कुच्छू ज्यादाहै सावधानी होतियै कि आँचल कंधा सेँ ज्यादा नै ससरै आरो तबेँ हेना केँ ऊ बैठवो नै करतियै, जेना पलंग में दोनों टांग मोड़ी केँ आभी बैठी रहलोँ छेलै ।

“अजी, ई अच्छा लागै छै कि तोरोँ दोस्त ऐलोँ छीँ आरो तोहें टी० वी० के सिरियल घुमाय में मग्न छौ ।”

क्षेम नेँ सपना के यै बातों पर कुछुवो नै प्रतिक्रिया देखेनेँ छेलै, जेना ई बातों के कोय मान्हे नै रहेँ । ऊ होन्हे केँ रिमोट सेँ सिरियल घुमेंतेँ रहलै । फेनू ऊ सतेन्दर दिश घुमी केँ कहलकै, “देखै छैँ, केन्होँ साफ-साफ तस्वीर उतरेँ छै । ई रंगीन टी. वी. के पुर्जा-पुर्जा विदेश के बनलोँ छेकै । बड़ी शौक सेँ महीना भरी पहिलेँ तेँ खरीदलेँ छियै ।”

“आबेँ खरीदलेँ छोँ, तेँ इखनी तेँ बंद करोँ, दोस्त ऐलोँ छौ, की सोचतौँ—हम्मं ऐलोँ छी, आरो दोस्त टी० वी० देखै में मशगूल छै ।”

क्षेम नेँ आपनोँ बात कहै तांय ही हिन्नेँ मुड़ी राखलेँ छेलै, फेनू वहेँ सिरियल दिश । आबेँ ऊ हेनोँ सिरियल बार-बार उतारी रहलोँ छेलै, जेकरा नंगा नाच नहियो कहलोँ जाय, तेँ ऊ नंगे नाच नाँखी छेलै ।

“देखै छौ नी, यहेँ तोरोँ दोस्त के पसन्द छेकोँ आरो मनाहौ करोँ तेँ कोय असर पड़ेवाला नै । संगति के हवा लागलोँ छै ।”

क्षेम केँ जेना हठाते करेन्ट लागी गेलोँ रहेँ । वैंने घुमी केँ कड़ा आँखी सेँ सपना केँ देखलेँ छेलै, मतरकि बोललोँ कुछ नै छेलै । खाली मुड़ी टी० वी० दिश फेनू घुमाय लेनेँ छेलै ।

एक अजीब किसिम के तनाव कोठरी में हठाते पसरी गेलोँ छेलै, जे नै तेँ हमरा सेँ छुपलोँ छेलै, नै केकरौ सेँ । शैत, माहौल केँ हल्का बनाय के

कोशिश में ही हममें सपना दिश होते हुए कहलें छेलियै, “हों, तोरा एक बात तें कहना भूलिये गेलियौं, हममें तोरा पर एक ठो कहानी लिखलें छियौं.....याद छीं नी, पहिलो दाफी तोरा कन जबे ऐलो छेलियै आरो तोरो हौ परेशानी.....”

सतेन्दर के बातों के सचमुचे में ओकरा पर अचूक प्रभाव पड़लो छेलै, जेना काँही कुछ होले नै रहे ।

“मतरकि कहानी में तोरो जग्घा पर सब कुछ झेलै छै तोरो पति—यानी हमरो दोस्त ।” सतेन्दर नें चाय के एक लम्बा घूँट लेतें कहलें छेलै आरो सपना जे हाथों में चाय के प्याली के उठैलें ही छेलै, नीचें राखतें हुए कहलकै, “से कहिनें ?”

“हमरा लागलै कि जे हमरा कहना छै, ऊ क्षेम के ही सामना राखी के ठीक-ठीक से मुक्त होय के कहे पारौं । तोरा कहानी में राखला से हममें स्वभाविक नै होवे पारतियै; यै लेली ।”

सतेन्दर नें देखलकै, सपना के चेहरा अनचोके मनझमान पड़ी गेलो छेलै ।

“कहिनें ? की भेलौं ? कहानी के बात अच्छा नै लागलौं की ?”

“से बात नै छै । दरअसल, हममें सोचे लागलो छेलियै, कि ऊ कहानी में तोरो दोस्त के जग्घा में हम्मी रहतियै ते की होतियै ! कहिनें हर दाफी थोड़ो-टा सुख के नामों पर जनानी मात खाय जाय छै । जे कहानी हमरा से जुड़लो छेलै, ऊ जग्घा पर हमरो पति केना आवी गेलै ।” कहलें-कहतें ओकरो चेहरा एक मुलायम विरोध से भरी गेलो छेलै ।

“तोहें समझै नै छौ, दरअसल.....”

“हममें खूब समझै छियै सतेन्दर जी.....कोय स्त्री के सुख-दुख हसौती के पुरुष जत्ते महान होय जाव, मतरकि है बात तहूँ जानतें होभौ—पुरुष के जीवन में कोय कहानी नै होय छै, कहानी तें होय छै जनानी के जीवन में ।” कहलें-कहतें सपना नें चाय के प्याली उठाय के ठोरो से लगाय लेलें छेलै । बस हल्का-हल्का चुस्की लेतें रहलै, ओकरो बाद ऊ कुछ बोलवो नै करलै ।

क्षेम होन्है के हाथवाला रिमोट से सिरियल घुमाय में मस्त छेलै आरो हममें ई सोच से चुप होय गेलो छेलियै कि जना अनचोके हमरा से कोय बड़ो अपराध होय गेलो रहे । गोबध लागी गेलो छेलै हमरा ।

जहाँ न अपनो कोय

देखै के तेँ साल भरी सें जयन्तो ऊ जग्घों केँ देखै, मजकि वहाँ पर गुमटी बैठाय के साहस ओकरा केन्हौ केँ नै हुऐ । रोज शाम केँ चौबटिया पर बनलौ शहीद चौरा पर ऊ बैठी जाय आरो वांही सें जग्घों केँ देखी-देखी मने-मन खुश हुऐ; सोचै—जल्दिये गुमटी बैठाय लेना ठीक होतै, केकरो नजर गड़े पारै । की पता, कल्ले वहाँ कोय टटिया केँ घेरी खाड़ोँ होय जाय आरो परसुवे वैमें फोँल-फलारी के दुकान खुली जाय । फेनू तेँ हेनोँ सोना रं जग्घों हाथोँ सें गेले समझोँ ।

सोचतेँ-सोचतेँ जयन्तो बेकल हुऐँ लागै, ओकरोँ सब खुशी पानी रं बहेँ लागै । फेनू आपना केँ ढाढसो दै, “धुर, ई निरघिन जग्घा पर केँ टटिया घेरी केँ गुमटी बैठाय के बात सोचतै । ई तेँ हम्मेँ नी सोचै छियै कि ई सोनोँ रं जग्घों छेकै, मजकि आरो केँ यहेँ रं लागतेँ होतै की ? दीवाल सें सटलोँ-सटलोँ हे नाली पहिलेँ तेँ बिहारी स्कूल के सीमाना तांय जाय केँ खतम होय छेलै, आबेँ तेँ नाली के मुँहे ठो जग्घों-जग्घों सें मुनाय गेलोँ छै । नालिये पर ईटोँ-माँटी के पिंडा आरो पिन्डा पर चलै छै मूढ़ी-घुमनी, अंगूर-बेदाना सें लैकेँ सैलून साथेँ-साथेँ पैँट-पतलून के बेचै के धन्धा । नाली के पानी बहै छै—बीच सड़क होय केँ—शिवाला के एकदम सामना सें—पिछुवाड़ी होलेँ नै । ओकरोँ पिछुआड़ी वाला तेँ मुँहे मुनाय गेलोँ छै ।”

जयन्तो केरोँ मोँन सोचतेँ-सोचतेँ एकदम भिन्नाय उठलै, “यहाँकरोँ आदमियो सिनी धन्न छै । देखै छै कि नाली बन्द होय गेलोँ छै, तहियो खाड़ोँ

होय के पेशाब करवे करतै, नाली नाली रहलै; जे मूत बहलै ! दीवाली सें ससरी के सड़को दिश टघरलो जाय छै आरो मूते पर खाड़ो होय के गारले जाय रहलो छै सब—कोय मानै वाला नै—घिन केकरौ नै ।”

“सुनो, ई कोय तरीका छेकै” कि तखनिये जयन्तो खाड़ो होतें बोललै । ओकरो दाँया हाथ ऊ आदमी के रोकतें उठी गेलै, जे आदमी अभी बाँया टांग थोड़ो मोड़ी दीवाली सें लगभग सट्टी के खाड़ो होलो छेलै । जयन्तो के बातों के असर ओकरा पर अगर कुछ होलै ते एतने टा कि वैनें घुरी के ओकरा देखले छेलै आरो फेनू मुँह सीधा करी के कुछ देर लेली खाड़े रहलै ।

जयन्तो के लागलै, जेना वै जाय के ऊ आदमी के पीछू सें पकड़ी ओकरा वाहीं गोती देतै, आरो आय तक जे गत नै पुरलो होतै, पुराय देतै । अभी ओकरो क्रोध उफाने पर छेलै कि ऊ आदमी ओकरो पास आवी के खाड़ो होय गेलै, तमतमैतें बोललै, “लगै छै, खरीदी के जमीन छोड़ी देले रहौ । बड़का मना करै ले ऐलो छो । यहाँ बैठी के सबके टांग नाँपे छो, फुटो यहाँ सें ।” जयन्तो ते थरथर । ऊ ते खैर कहो कि आत्मरक्षा में जबे वै हिन्ने-हुन्ने निहारी रहलो छेलै ते ओकरो नजर आपनो पुरानो साथी शिवेन्द्र पर गेलै, वहू कि पुलिस वाला वर्दी में । सुरक्षा वास्तें जयन्तो नें शिवेन्द्र के हाँक देलकै ।

बात बनी गेलै । पुलिस के देखतैं ऊ आदमी धीरें सें टसकी गेलै । “की जयन्तो, तोरा यहाँ देखै छियौ । यही शहरो में रहे लागलें की ? हमरो बदली यहें शहरो में होय गेलो छै—इन्सानपुर फाँड़ी में मुंशी छियौ । आबे ई शहर छोड़नौ नै छै । बसोवासी जमीनो-जग्घो देखी लेले छियै..... ।” शिवेन्द्र नें एक्के साँसो में जेना आगू-पीछू के सब बात बताय देलकै, सब पूछियो लेले छेलै । मतरकि पूछलौ पर जयन्तो ई नै बतैलकै कि ऊ आदमी के छेलै आरो कोन बातों पर गरम होय रहलो छेलै । ई सब बतावे के रो बदला में वैनें मनो के किंछे सीधे शिवेन्द्र के सामना में राखले छेलै, दाँया हाथ के इशारा सें जग्घो दिखेतें, “जों येंठां हमरो एकटा गुमटी बैठी जाय ते सब बेड़ा पार ।”

“अरे ई ते तोहें हमरो मनो के बात करी बैठलें । हममें चाहवो यही करै छेलियै कि कोय मोन लायक आदमी मिलै ते ई जग्घो ओकरै दिलवाय दियै, अभी तक खाली छै ते समझें हमरा सिनी के परमीशन बिना ते यहाँ कोय दुबड़ियो नै उगे पारे ।”

शिवेन्द्र के बाकी बात पर जयन्तो ज्यादा ध्यान नै देलकै, बस एक्के टा बातों सें ऊ खिली गेलो छेलै ‘अरे ई ते तोहें हमरो मनो के बात करी बैठलें’ । ओकरा लागलै, जेना ओकरो सब बंद रास्ता खुली गेलो छै, “केकरो हिम्मत

होतै कि गुमटी बैठाय सें मना करतै ।” वैने मने मन सोचलकै आरो घुमी केँ चारो दिश देखलकै । आस-पास के गुमटी वाला के आँख ओकरे दिश उठलो छै । जयन्तो पल भरी लेँ एक अजीब ऐंठ सें भरी उठलै । वें सोचलकै, शायत कोय नहियो देखलेँ रहेँ, आरो यही सोची केँ वैनेँ दाँया हाथ रही-रही उठाय केँ गुमटी सिनी के तरफ इशारा करलेँ छेलै । बोलै कुछुवो नै । हेना करी केँ वें आपनो पहुँच सब गुमटी वाला केँ बताय दे लेँ चाहै छेलै ।

जयन्तो केँ मालूम छेलै कि वैठां नया गुमटी खाड़ोँ करना कोय सहल काम नै छेकै । सब गुमटीवाला चाहै छै कि ओकरे लोँर-जोँर के गुमटी बैठै । शिवेन्द्र के मिली गेला सें पाशा पलटी गेलै ।

आनन-फानन में दुसरे दिन रातो-रात जयन्तो के गुमटी वहाँ खाड़ोँ होय गेलै । खाड़ोँ तेँ होय गेलै, मतरकि भर महीना ऊ हुन्नेँ ताकहौ लेँ नै गेलै । कारण कि गुमटी बैठला के ठीक दुसरे दिन शिवेन्द्र घोर चललोँ गेलै—खगड़िया । आबेँ वहाँ जाय तेँ केना । कोँन ठिकानोँ—सब जुटी केँ कुछ करिये बैठेँ । भीड़ के की मोँन-मिजाज । हेन्हौ केँ आयकल पुलिसोँ के डरे कल्लेँ रही गेलोँ छै—भला लोग भले डरौक । वहु में शिवेन्द्र की एस. पी., डी. एस. पी. छेकै—बस फाँड़ी के मुँशिये तेँ छेकै । होना केँ ओकरोँ यार-मित्रेँ ढाढ़सो देलेँ छै, मतरकि सब व्यर्थ ।

महीना भरी बाद जबेँ शिवेन्द्र लौटलै तेँ ओकरोँ हाजरिये में वैनेँ गुमटी के बंद कपाट खोललकै । कपाट तेँ खुललै, मजकि हफ्ता भरी कोय सामान वैमें नै ऐलै । बस आवै आरो दिन भरी बैठलोँ-बैठलोँ मने-मन गुरु के नाम सुमिरन करतें रहै । गुमटी देखी केँ जोँ एकाध गाहक हुन्नेँ दुघरी आवै तेँ जयन्तो हेनोँ हड़बड़ाय उठै, जेना कोय विपत्ति के सामना करै लेँ झटपट आपना केँ तैयार करतें रहेँ आकि फेरु गाहक केँ ई बताय के कोशिश कि आज्हे तेँ दुकान खोललेँ छियै, बस दू-एक दिनोँ में सब व्यवस्थित होय जैतै ।

मजकि आस-पास के सब लोगेँ ई जानै छै कि आय तांय ऊ व्यवस्थित नै हुएँ पारलोँ छै ।

सोचै के तेँ जयन्तो यहू सोचलेँ छेलै कि ई गुमटी, खाली पाने वास्ते नै होतै, अखबार-पत्रिका, चॉकलेट, बिस्कुटो के व्यवस्था होतै आरो गुमटी के एक कोना में, चाय के व्यवस्था वें करी देतै, तेँ पान के दुकान एकदम चली निकलतै । चाय पीला के बाद पान के तलब होवे करै छै । आसपास चाय के कोनो दुकानो तेँ नै छै । फेनु कोय चाय पीयै लेँ आवौ, नै आवौ, ओकरोँ पहचान के दस यार-मित्र तेँ संझकी ऐवे करै छै—दसो-बीस कप बिकी जाय छै तेँ काफी छै ।

यही सोची वैनें आठ-दस ईं टों जोड़ी केँ खाड़ो करलकै कि तखनिये एक आदमी आवी केँ पूछलेँ छेलै, “है की बनाय छौ ?”

जयन्तो केँ लागलै जेना वैं ओकरोँ पलान बुझी गेलोँ छै आरो आबेँ खा-म-खा बितंडा खाड़ोँ करतै । दस आदमी केँ जुटैतै आरो ई चुल्होँ-चाल्होँ तेँ छोड़ी देँ, गुमटियो-उमटियो नै उखाड़ी केँ फेंकी देँ । से घबड़ैतें होलेँ दोनों हाथ केँ पंजा केँ इनकार में हिलैतेँ हुएँ जयन्तो कहेँ लागलै, “नै नै । है नै समझियोँ कि चूल्हा बनाय रहलोँ छियै, चाय-वाय केँ बिक्री लेँ ।” आरो कहतें-कहतें ऊ गुमटी सेँ उछली केँ नीचेँ उतरी ऐलोँ छेलै—आपनोँ धोती रोँ ढेका ठीक सेँ संभालतें ।

“खैर तबेँ तेँ कोय बात नै छै, हममें तेँ वही बुझलियै ।” कही केँ ऊ आदमी चूना माँगलकै ।

जयन्तो केँ मालूम छै कि वैं सामने में जे चूना-कत्था केँ बाटी सिनी सजाय केँ राखलेँ छै, वैंमें नै तेँ कत्था छै, नै तेँ चूना । जबेँ पाने नै छै, तेँ चूना-कत्था कथी लेँ । शायत ऊ आदमी खैनी केँ पुड़िये लटकलोँ देखी केँ सोचलकै कि चूनाहो जरूरे होतै । मतरकि है सुनी कि चूना नै छै, कहलकै, “तेँ बेचै छोँ की—आपनोँ भदरोइयोँ ?”

जयन्तो केँ मोँन होलै कि कही दै, “हों, वही तेँ बेचैलेँ गुमटी खोललै छियै, मजकि तोरासिनी वहु बेचैलेँ दौ, तबेँ नी ।”

ओकरोँ वहाँ सेँ निकलला पर जयन्तो कनखियाय केँ ओकरा पीछू सेँ देखलेँ छेलै—आखिर जाय छै कहाँ ? आरो ई देखी, ऊ बड़ी चिन्ता में डूबी गेलै कि हौ आदमी सामनाहै केँ एक दुकानी पर जाय रुकलै । चूना लेलेँ छेलै आरो नजर घुमाय केँ ओकरे दिश एक दाफी देखलकै । आखिर कैहनं देखलकै ? देखै केँ की मतलब हुएँ पारेँ ? ई बातों केँ लेँ केँ ऊ केँ एक दिन तांय परेशान रहलै ।

पहिलोँ दू-एक दिन तेँ ओकरोँ मोँन एकदम्मे बेचैन रहलै, फेरू ई सोची केन्हैं केँ मोँन इस्थिर करलकै कि जोँ हेनोँ कुछ बात होतियै, तेँ होय गेलोँ होतियै । ऊ तेँ बेकारे नहियो बातों में हों बात लेँ केँ बैठी जाय छै । ई बात जयन्तो मनोँ में खूब गांधी केँ बैठाय लेँ चाहलेँ छेलै, मतरकि कोय नै कोय मौका पर, घूरी केँ ताकेँ वाला बात, उखड़िये आवै । तखनी ऊ भोलेबाबा केँ गीत मूड़ी हिलाय-हिलाय केँ मनेमन गावेँ लागै—सब बातों केँ भूली जाय लेँ.....कखन हरब दुख मोर हे भोलानाथ । तखनी जयन्तो केँ आँख सिर्फ शिवाला दिस हुऐ । भजन गैतेँ-गैतेँ ऊ अपने-आप बुदबुदावेँ लागै, “सब सोचै छै, गुमटी बैठाय लेलियै तेँ जेना भरलोँ दुकान बैठाय लेलियै । अरे, गुमटी चलाय

में अभियो हजार-दू हजार के जरूरत छै, आरो ई पूंजी ऐतै तबे नी । कथा, सुपाड़ी, पाँच किसिम के जर्दा, खाली पानो के पत्तै लानी देला सें की होतै..... देखो ऊ आदमी के—बोललै, “ते बेचै छो की ? आपनो भदरोइयाँ ?” ऊ ते खैर पोर आदमी छेलै.....बीचो-बीचो में शिवेन्द्रें है-रं जे बोली जाय छै कि “तोरा सें गुमटी चलाना मुश्किल छै जयन्तो । यही तोरो जग्घा पर कोय आरो होतियै ते बीस कमैतियै आरो पाँच दुसर्हो में लुटैतियै ।” आबे बताबो, शिवेन्द्र के ई बोलना चाहियो । ऊ थाना के मुंशी छेकै, ओकरा हजारो अलगी ऐतें होतै, हम्मं केना तुरत हजार लै आनियै । एकाध के कहलै छियै, देतै ते गुमटियो चलतै, आरो देवे करतै—देर-सबेर ।

ई सोचतें जयन्तो के चेहरा पर एक सन्तोष के भाव जागी गेलै आरो फेनू शिवाला दिश मूँ फेरी गावे लागलै—कखन हरब दुख मोर हे भोला नाथ ।

००

अइयो शिवेन्द्र जयन्तो के दुकानी दिश सें गुजरलै, चार दिन पहिलो गुजरलो छेलै, आरो पहिलके नाँखी ओकरा एक नजर देखतें साइकिल सें गुजरी गेलै, टोकलकै नै । आरो तखनिये सें ऊ यही बात लै के परेशान छै, आखिर वें टोकलकै कैन्हें नी ? ओकरो मनो में अन्धड़ चले लागै छै । हम्मं फिजूल बात सोची रहलो छियै, शिवेन्द्र के कुछ गुस्सो छै, ते कथी ले, हमरे हित ले नी । बुरे की कहलै छेलै, जे हम्मं बुरा मानी लेलियै ।

जयन्तो के आपनो ई स्वभावो पर लज्जो आवै छै, गुस्सो । आखिर बाते की होलो छेलै ।

कि हठाते ओकरा आपनो ई सोभावो पर हँसी आवी गेलै । एकदम जनानी नाँखी ओकरो सोभाव छै—जनानियो सें गेलो गुजरलो । जनानी ते तभियो मौका ऐला पर तनी के खाड़ो होय जाय छै । आरो हमरो ते ई हाल छै कि टूल बनाय ले जो न बढ़ैय के सौ रूपा देले छेलियै, वहुं तीन महीना नचवैतें रहलै—आय लियो, कल लियो, भारे देवो, संझकी देवो; दुपहरियाँ बनैवोबाप रे बाप, हेनो आदमियो होय छै । वही आदमी गुमटी बनाय के जे पचास टाका हमरा कन बाँकी रही गेलो छेलै, ते छाती पर खाड़ो होय के दोसरे दिन दुहवाय लेलकै । बेटा साथें ऐलै, तखनी ओकरो बोली छेलै, “पैसा नै दौ ते एकरा दोकानिये में बंद करी के आग लगाय दें, दुकान समेते जरी के खाक होय जैतै । पैसा नै देतै.....”

आरो वही आदमी हमरोँ सौ रूपा लेली हमरा केन्होँ नाँच नचवाय देलकोँ । बाप रे बाप । तबेँ दोष हमरे छै—जों एकबार ओकरे हेनोँ तनी केँ ठड़ा होय जैतिये तेँ की मजाल छेलै कि टाका नै देतिये । मतरकि हम्में तनै केना पारतिये । तनेँ तेँ हम्में आपनोँ जनानियो के सामना नै पारै छिये” ई बातों पर जयन्तो अपनेआप ठठाय केँ हाँसी पड़लै । जोँर-जनानी सें हार के बाते सें जयन्तो केँ एक विचित्र गुदगुदी हुएँ लागै छै । इखनियो वहा भेलै । ओकरोँ दोनों तरथी जोर सें मिलतें थपड़ीवाला आवाज करलकै, आरो खिलखिलाहटे में ओकरोँ मूड़ी ऊपर दिश उठी गेलै ।

“की बात छै जयन्तो जी, बड़ी ठिठियाय रहलोँ छोँ ।” कोय छवारिकें गुमटी के ठीक सामन्हें बिजलीवाला खम्भा सें धौनोँ टिकैतें कहलकै, “अहो, आपनो ठिठियाय छोँ आरो संझकी दस ठो केँ घंघेटी केँ दतनिपोड़ी करवाय छौ । सुनोँ, जों दुकानी पर फलतुआ सिनी के अड्डा लगवैलौ, तेँ सोची लेँ । हमरा सिनी के बैठकी खराब करी देलेँ छौ । आयके सांझी सें जों यहाँ कोय अड्डी मारै लेँ ऐलोँ तेँ बुझियोँ ।”

जे रं ई छवारिक कही केँ चली देलकै, होन्है भला जयन्तो केना मुँह खोली केँ कहेँ पारतै, एत्तेँ-एत्तेँ यार-मित्रों केँ । नै ई केन्हौ केँ नै हुएँ पारतै । वैने गुमटी टैम सें पहिले बढैलकै आरो सीधे फाँड़ी दिश चली देलकै । फाँड़ी सें दस कदम हिन्न्है होतै कि वैनें वहेँ छवारिक केँ ऐतेँ देखलकै, मतरकि दोनों अनजाने आपनोँ रास्ता पर चलतें रहलै—तेँ की यहू फाँड़िये गेलोँ छेलै, गेलोँ छेलै तेँ कथी लेँ ? कहीं हमरोँ शिकायते तेँ नै करै लेँ ऐलोँ छेलै ? सोचतै एक बार विचलित होय उठलै जयन्तो, मतरकि ई सोची कि आखिर मुंशीजी तेँ हमरे साथी छेकै, हम्में तेँ बेकारे कोय बातों केँ हद तांय सोची डरेँ लागलौँ ।

फाँड़ी पहुँची केँ ऊ देर रात तांय फाड़िये दरवाजा पर खाड़े रहलै.... आखिर शिवेन्द्र निकली केन्हें नी रहलोँ छै ? कत्तो व्यस्त रहलै तेँ की खिड़कियो सें नै बाहर झांकतै ? काँही हेनोँ तेँ नै कि हमरा देखिये केँ हेनोँ करी रहलोँ छै ? जों कुछु बात छै तेँ हमरा ऑफिसे जाय केँ मिली लेना चाहियोँ.... ई बात सोचै के तेँ सोची लेलकै, मतरकि जयन्तो के एक्को डेग फाँड़ी के भीतर दिश नै उठेँ पारलै । वैँ मनेमन सोचलकै—ऊ आयतक थाना-फाँड़ी नै गेलोँ छै, कौनेँ की समझी लेँ, कोय कुछ पूछिये देँ.... नै-नै, वैँ बाहरे में शिवेन्द्र के इन्तजार करतै । आखिर कखनियो तेँ शिवेन्द्र बाहर निकलतै । निकललै पर सब बात बतैवै कि केना केँ आय एक छौड़ा ओकरा धमकाय गेलोँ छै ।

आरो काम निपटाय केँ शिवेन्द्र जबेँ बाहर निकललै तेँ जयन्तो ओकरोँ लुग स्पिंगवाला खिलौना नाँखी उछली केँ आवी गेलै । आपनोँ संकट बतैतेँ जल्दी कुछ करै लेँ कहलकै । सब बात सुनी केँ पहिलेँ तेँ शिवेन्द्रेँ बेरुख भावोँ सेँ यहैँ कहलकै, “गुमटी के जग्घोँ केकरो जरमियाना करैलोँ आकि खरीदलोँ थोड़े होय छै, जे जोगेँ ओकरे । सब जानै छै—जोरू-जमीन जोर के । होना केँ हम्में जाय केँ समझाय ऐवै”, आरो फेनू हठाते रुख बदलतेँ कहलकै, “जयन्तो, तोरा गुमटी यै लेली नै दिलवैलेँ छेलियौ कि दस ठो आवारा किसिम के आदमी केँ जुटाय केँ तमाशा लगवावें । दुकान छेकै धन्धा वास्तेँ, नौटंकी लगवै वास्तेँ नै । दस रोज बाद मिलिएँ ।” आरो एतना कही मुंशीजी फाँड़ी के बैरक दिश चली देलकै ।

जयन्तो लौटी ऐलै आरो देर तांय सोचतेँ रहलै—आबेँ भला आपनोँ मुँहोँ सेँ केना कहतै यार-मित्रोँ केँ—तोरा सिनी सांझकी यहाँ बैठकी नै करोँ । मतरकि जे रं ऊ छवारिक आरो आय शिवेन्द्र कही गेलै, ओकरा सेँ तेँ चुप रहवो मुश्किल । तेँ करौँ की ?.... हों, एक बात हुऐ पारेँ कि हम्में घोर चल्लोँ जांव । की होतै—आठ-दस रोज गुमटी बन्दे रहतै । शिवेन्द्रो तेँ दस दिनों के बादे बुलैलेँ छै । फेनू जबेँ हिनकासिनी समझी लेतै कि आबेँ दुकान नै खुलतै, तेँ आपनै रास्ता बदली लेतै । होन्हौ केँ हमरोँ गुमटी खुलवे कै दिन करै छै....आबेँ आठ-दस रोज बन्दे रहतै तेँ की ?”

ई नया विचार सेँ जयन्तो एक तरह सेँ निश्चिंते होय गेलै, फेनू मने-मन सोचलकै, “यहू रिटायर्ड दोस्त सिनी कोन मारे हमरा निहाल करै छोँत । गाहक वास्तेँ एक बेंची बिछाय छी, तेँ वै पर मधुमक्खी के झुंड नाँखि जमलोँ रहै छोँत । जैतात तेँ दुकान बन्द करला के बादे । बेंची पर जग्घोँ नै मिलतै, तेँ डिब्बा-डुब्बी हटाय केँ दुकानिये के भीतर महाजन नाँखि बैठलोँ रहतात, जेना हम्में सब्भे के करजा खैलेँ रहियौँ । आरो नै तेँ तीन-चार ठो दुकानिये के आगू खाड़ोँ । जोँ एकाध ठो गाहक बीड़ी-सिगरेट लेँ आवै छै तेँ भीड़ देखतैँ टसकी जाय छै । शैलेन्द्रेँ हमरे हित लेँ तेँ कहलकै, ठिक्के कहलकै । सब दोख हमरे छेकै । अच्छे होतै, दस रोज दुकाने बंद करी केँ घोर चली दौँ ।

आरो करलकै वही । एक दिन जयन्तो ठीक दुपहरिये ऐलै, गुमटी खोली केँ कुछ छोटोँ-मोटोँ सामान आपनोँ झोली में घुसलकै; फेनू गुमटी पर ताला चढ़ाय देलकै, आरो बिना हिन्नेँ-हुन्नेँ देखलहँ बस स्टैण्ड दिश मलकलोँ-मलकलोँ बढ़ी गेलै ।

००

दस दिन बादे आय जयन्तो शहर लौटलो छै । गोधुली बेरा गिरहैवाला छै—गाड़ीवालां आय देर करी देलकै । हेनो कभियो नै होय छेलै, खैर कुछ नै होतै तेँ नै, धूप-ऊप दिखाय केँ गुमटी बढ़ाय देवै—यहेँ सोची जयन्तो लम्बा-लम्बा डेग मारतें गुमटी तांय ऐलै, पर गुमटी तक ऐहेंँ ऊ तेँ पत्थल के मुरुत बनी गेलै । बिना लाठीवाला पत्थल के गाँधी । एक दाफी तेँ ओकरा विश्वासे नै होलै कि वें जे कुछ देखी रहलो छै, ऊ सहिये छेकै । वैनें आपना पर काबू पैतें दू-तीन दाफी मूड़ी झोललकै आरो फेनू आपनोँ गुमटी केँ गौर सें देखलकै ।

झूठ नै छेलै, वें जे कुछ देखलकै, एकदम सही छेलै । गुमटी पर जे जग्घा पर वैष्णवी ताम्बूल भंडार के तख्ती छेलै, वहीं पर नया तख्ती टंगलो छेलै—‘शुद्ध देशी शराब की दुकान’ । गुमटी बाँस के टटिया सें घेराय गेलो छेलै, जेकरा में मूड़ी घुसै मान खोल बनलो छेलै । गुमटी के भीतर अस्सी मनोँ के एक आदमी बैठलो ।

जयन्तो मने-मन याद करलकै—एत्तेँ दिन ऊ यहाँ पर रहलै—कभियो तेँ ई आदमी के शकल वें नै देखलकै । कारोँ चमड़ी पर कारो बाल, कारोँ घन्नों मूँछ आरो दाढ़ी एक होय रहलो छेलै । आँख के घुरतें डिम्मी सें जयन्तो बुझलकै कि ऊ आदमी ओकरै देखी रहलो छै ।

जयन्तो केँ जना थरथरी लागी गेलै । ओकरा बुझैलै, जेना ऊ आदमी अभी तुरत टटिया के बाहर होतै आरो ओकरोँ कालर पकड़ी केँ कहतै, “चोट्टा, जबेँ माल लेना नै छौ, तेँ हेना केँ घूरै की छै रे । माल टपाय के रास्ता खोजी रहलो छै की ? भागले कि अभी.....”

आरो जयन्तो हड़बड़ाय केँ पाँच कदम पीछू हटी गेलै, शहीदवाला चबूतरा के पीछू, जहाँ सें ओकरा पर ऊ मूछियल के नजर नै पड़े सकेँ । कैन्हें जयन्तो केँ आभियो लागी रहलो छेलै कि ऊ आदमी छलांग मारी केँ ऐतै आरो.....

जयन्तो केँ पेटोँ में बेचैनीवाला दर्द उठेँ लागलै । दर्द कम करै के कोशिशे में वैनें आहिस्ता सें आपनोँ आँख बंद करी लेलकै । आँख बन्द करहेंँ ओकरा लागलै कि दरद कम हुएँ लागलो छै । आरो नै जानौँ, कखनी ओकरोँ आँख लगी गेलै ।

जखनी ओकरोँ आँख खुललै तेँ कानोँ में शिवेन्द्र के आवाज सुनाय पड़लै, “कै दाफी तोरा कही चुकलौँ कि तोरा डरन्हे नै छै । पहिलेंँ ऊ मिलौक तेँ.... । वें तेँ हमरोँ कैय्यो महीना के कमाय पर चूना लगैनेँ छै । जग्घा पर गुमटी दिलवैलेँ छेलियै कि...पहिलेंँ ऊ मिलौक तेँ, हम्मू फाँड़ी खोलिये केँ बैठलोँ

छियै । तोरा डरूहै के कोय बाते नै छै.....तोरा सें काम छै....कल.....तेँ ठीक ।”
जयन्तो के गोड़ एकदम थरथरावेँ लागलै । मूँ सें लै केँ भरी देह तांय में जेना झुरझुरी दुकी गेलोँ रहेँ । काहीं वै दोनों में सें कोय ओकरा देखी नै लै आरो कोँन ठिकानोँ” ई सोचतहैं जयन्तो के सौँसे बदन सिल हुएँ लागलै । वैँ आपनोँ सांस केँ एकदम सें बंद करलकै आरो रेंगतेँ होलेँ ऊ मूर्ति के पीछू छिपी गेलै । धोती के एक छोर सें आपनोँ मूँ ई रँ ढांकी लेलकै कि नीन आवी गेला के कारण वाहीं पर कोय मुसाफिर ओघराय गेलोँ रहेँ । ऊ तब तांय ओघरैले रहलै, जब तांय गुमटी बंद नै होय गेलै ।

धरमदास रो कपली गाय

ढीबा धरमदास के पूरा नाम से शायते कोय पुकारलकौ, पुकारलको ते ढीबा जी ही कही के । हों, ओकरो संगी साथी जरूरी ढीबा धरमदास कहै, जे खाय-पीयै में बरवक्त साथे रहे ।

ढीबा । ई नाम ओकरो दादीं राखले छेलै । जनमलै ते एकदम लार-पुआर होय रहलो छेलै । वैद-हकीम, ओझा-गुनी-मंतरिया सब कन दौड़ी-दौड़ी दादीं ओकरो जान बचैलकै आरो हालत सुधरलै ते हेनो कि साले भरी में गोड़-हाथ कद्दू नाँखी और पेट कदीमा रँ होय गेलै; ई देखी, एक दाफी दादीं ओकरा ढीबा की कही देलकै कि ओकरो नाम ढीबाहै पड़ी गेलै ।

ढीबा जों-जों बढलो गेलै, तों-तों हौलको-फुलको कामों से ओकरो जी उचाट हुए लागलै । देखै में भले ऊ जत्ते भोकसो दिखावे—छेलै एकदम फोकसो । भरलो बड़ो बाल्टी की उठावै, साँड़ो हेनो फू-फू करे लागै । यही वास्तें ओकरो मय्यो-बाप कुछ काम करै ले नै कहै ।

ई ते भाग कहों कि वहे गाँव के चकबन्दी ऑफिसों में दास बाबू एक अफसर बनी के ऐलै आरो ढीबा के भाग खुली गेलै । एक दिन केकरो पैरवी ले के ऊ दास बाबू लुग पहुँचलै, ते ओकरा देखिये के दास बाबू ओकरो दिश खिंचाय गेलै । जटा-जूट, दाढ़ी-मूँछ रहला के बादो एकदम शहरुआ छवारिक रं चालू-पुरजा । फिनू की छेलै—दास बाबू कन ओकरो उठकिए-बैठकिए शुरू होय गेलै ।

गाँव भरी में ढिंढोरा पिटी गेलै—ढीबा चकबन्दी अफसर दास बाबू के दोस्त भै गेलै ।

आबे की, आबे ते ढीबा के तूती बोले लागलै । जत्ते दास बाबू के

पूछ चौक-चौराहा पर नै, ओकरा सें बड़ी केँ ढीबा के । ढीबाहीं समय केँ पलटा खैतें देखी आपनो चाल-ढाल में पलटी खैलकै ।

आबेँ वैँ कोशिश करै कि गाँव के सब्हे लोगोँ सें जखनी-तखनी मूँ नै लड़ावौं । अब तांय तेँ ओकरोँ यहै आदत रहै कि जेकराहौ खैनी रटैतें देखै, ओकरे आगू हाथ फैलाय दै, आबेँ ई आदत तेँ वैँ एकदम्में बन्द करी देलकै । बहुत होय छै तेँ आपनोँ जेबी सें खैनी वाला डिब्बी निकाललकोँ आरो केकरौ थमाय देलकोँ, मतरकि ओकरोँ लगैलोँ खैनी खैलकोँ नै—ज्यादा केकरौ सें चिन-परिचय बढ़ाना ठीक नै । होन्हौ केँ साधू-सन्यासी केँ सबके छूलोँ-छालोँ नै खाना चाही ।

दास बाबू कन ढीबा रोँ बस एतन्है काम छै—हुनकोँ साथ बैठी केँ चाय पीयौक आरो गाँव के लोगोँ के बारे में एक-एक जानकारी दौक । एकरा सें ई होलै कि ऊ गाँव के बारे में जत्तेँ जानकारी दास बाबू केँ छेलै, ओत्तेँ ऊ गाँववालाहौ केँ नै । ढीबां रोज-रोज नया बातोँ के जानकारी इकट्ठा करै आरो चाय के चुस्की साथें रस लै-लै केँ एक-एक बात बतावै । दास बाबू के साथें ई बैठकी सें ढीबाहीं बहुत कुछ नया सीखलेँ छेलै ।

वैनेँ दासे बाबू सें सिखलेँ छेलै कि चाय माँढ़ नाँखी सुड़-सुड़ करी पीयै के नै होय छै । बस हेनोँ पीयै के छेकै कि ठोर तांय के आवाज नै हुएँ । ई हिदायत के पालन में चाय कै दाफी ढीबा के ठोर सें छुवैये केँ रही जाय; जीहो तक नै पहुँचै ।

एक दिन ढीबू दास बाबू के साथ हेन्है केँ चाय पर बैठलोँ छेलै तेँ बात बाते में वैनेँ दास बाबू सें कहलकै, “हम्में चाहै छियै कि आफिस के सामना में, ऊ जे ठाकुरबाड़ी छै, तोहें वै में भोरे-साँझ धूप-धूपकाठी आरनी के व्यवस्था करवाय दौ । बिना पुजारी के की रं घास-पतार सें ठाकुरबाड़ी भरी गेलोँ छै, साफ-सुथरा होय जैतै, तेँ आखरियो-पिपरी के डोँर नै रहतै ।”

दास बाबू के चेहरा पर संतोष के भाव झलकी ऐलै, मजकि ओकरा सें ज्यादा संतोष के भाव ढीबा के चेहरा पर छेलै । सरकारी मदद मिली गेला सें तेँ ढनमनैलोँ ठाकुरबाड़ी मथुरे के मंदिर बनी जैतै । वैँ आपनोँ ई खुशी एकदम सें छिपाय लेलकै । सालोँ सें तेँ वैँ यहै चाही रहलोँ छेलै । ढीबू, आय सें तोहें ई मन्दिर रोँ पुजारी । तोरोँ काम आय सें मन्दिर में भगवान के सेवा । हम्में तोरोँ लेँ यहै बगलोँ में एक मड़ैयो बनवाय दै छियौं । रहै-सहै में दुख नै होत्तौँ ।” दास बाबू कहलकै ।

आरो ठीक वहेँ दिन सांझकी बेरा में लोगें शंखोँ के पहिलोँ दाफी

आवाजो सुनलकै—चकबन्दी ऑफिसों के सामना वाला ठाकुरबाड़ी में । सभ्भे आचरज में । कोय धूप-दीप तेँ ऊ ठाकुरबाड़ी में रखी आवै, मजकि शंख के आवाज तेँ आय तक नै होलै । वहाँ छेवे करलै की । बस दू दिशों सें गिरलौं दीवारी के मन्दिरे तेँ ।

कभी एकरे भीतर में अष्टधातु के एक मूर्ति छेलै—बड़ी पुरानो आरो बड़ी कीमती; हाथ भरी के जरूर होतै । एक दिन हल्ला होलै कि मूर्ति गायब होय गेलै । आखिर के गायब करलकै ? गाँववाला के शक ढिबाहै के ओर जाय । होय नै होय, ई काम ओकरे छेकै । वही महीना भरी से ठाकुरबाड़ी के पिण्डा पर ओघरैलौं-पटैलौं देखलौं जाय छेलै—बिहानै, दुपहरकी आरो संझकी । कै दाफी तेँ लोगें ओकरा वहेँ ठाकुरबाड़ी दिशों सें होय केँ आपनोँ घोर जैतें देखलें छै—आखिर हुन्नें सें घोर जाय के की मतलब, जबें कि ढीबा के घोर पछिये पड़ै छै, फेनू पूरबें होय केँ, एलें घुरी केँ, घोर जाय के की मतलब । संझकी वक्ती के बात होतियै, तेँ लोगें मानियो लेतियै कि ठाकुर के दर्शन लेली घुरी केँ घोर जाय रहलौं छै, सेहो बात तेँ नै छेलै—दस बजे रातकोँ बाद हुन्नें से जाय के बात केकरो दिमागोँ में नै अटै ।.....मतरकि है काम जों ढीबा के नै छेकै तेँ केकरोँ छेकै । सौ सालोँ सें ऊ मूर्ति ठाकुरबाड़ी में छेलै, नै पहरा, नै पुरोहित । गाँव भरी के पहरेदारी छेलै, मजकि जहिया सें लोगें ढीबा पर एक तरह सें भरोसा करी केँ मूर्ति के बारे में सोचना छोड़ी देलकै, ठीक ओकरोँ महीना भरी के भीतर मूर्तियो अलोपित होय गेलै...बात तेँ सहिये छेलै, मजकि ढीबाहौ कोय ऐरू-गैरू घरों के तेँ नै छेकै....ओकरोँ एक पुश्त पुरहैतगिरिये में रहलौं छै ।

ई बातोँ पर जोतखी का एकदम गरम होय जाय छै—ई बात तेँ तोरासिनी सतयुगोँ के करी रहलौं छोँ । अरे आयकोँ बात करोँ कि केना मन्दिरे के पुजारी मूर्ति गायब करी केँ विदेशों में बेचवाय दै छै । तेँ ढीबा कोँन वशिष्ट आरो विश्वामित्र छेकै कि ई नै करेँ पारेँ ।

बात यहाँ तांय बढलै कि पुलिसो ढीबा तांय पहुँची गेलै । आरो जबेँ थाना पर ओकरा लानलौं गेलै, तेँ ढीबा के चेहरा पर कोय रकम के अनचित वाला भाव नै छेलै । दारोगा के सब पूछला के बाद वैनेँ एतनै टा कहलकै, “भगवान सब देखी रहलौं छै दरोगा बाबू, हुनका सें बड़ोँ सजा तोरोँ नै हुएँ पारेँ । जौनेँ-जौनेँ हमरा यहाँ पहुँचैनेँ छै, हुनी-हुनी भगवान सें मिलै वाला सजा के इन्तजार करौक ।” ढीबा के एतना भर कहना छेलै कि ढीबा के विरोधियो पलटी खाय गेलोँ छै । सब ढीबा के पक्षोँ में बोलेँ लागलोँ छेलै । सच पूछोँ तेँ भगवान के बात सुनी केँ दरोगो के पसीना उतरी गेलोँ छेलै । महीनै भरी बाद

परमोशन के कागज निकलै वाला छै; की ठिकानोँ ढीबा बेकसुरे रहेँ, जो भगवान नाखुश होय जाय.....आरो ढीबा निर्दोष घोषित होय गेलै—थानाहै सें नै, गाँववाला दिशोँ सें भी ।

कोय नै जानै छै कि थाना सें छुटला के बाद ऊ सालो भर कहाँ रहलै आरो सालो भरी के बाद जबेँ घोर लौटलै तेँ दाढ़ी, जट्टोँ एकदम बढ़ैनेँ । सबनेँ देखलकै—ढीबा तेँ एकदम साधू बनी गेलोँ छै ।

जोँन दिनां ढीबां गाँव छोड़लै छेलै, वही दिनोँ सें ऊ ठाकुरबाड़ी में लोगोँ के आनाहौ-जानाहौ बंद होय गेलोँ छेलै । रहिये की गेलोँ छेलै वहाँ, जे लोग जैतियै ! जोँ कोय मंदिर के बाहरी पिन्डा पर धूप-दीप जलाय-उलाय ऐलकोँ, तेँ बहुत—भीतर तेँ कोय दुकवे नै करै ।

सफाई-पोताई के बिना ठाकुरबाड़ी के दीवार ढनमनाय गेलै । अन्धड़ बरसात, धूप सें दीवार सिनी हेनोँ होय गेलोँ छेलै कि धीरें-धीरें यहू बात फैली गेलै—ऊ ठाकुरबाड़ी में रात-बेरात भूत बोलै छै । फेनू की छेलै—लोग दिन्हौ हुन्नेँ सें गुजरै तेँ एक-दू आदमी साथ चलैवाला लै केँ ही । जबेँ चुल्हाय काका आपनेँ सें दस के बीच कहलकै—परसुके बात छेकै । ऊ गाड़ी पर बीस बोरा गहुम लादी केँ घोर जाय रहलोँ छेलै । झुकझुकी बेरा । ठीक ठाकुरबाड़ी के नगीच ऐलोँ होवोँ कि आँटी औटेँ लागलै । गाड़ी रोकलियै आरो वही ठाँ एक दिशोँ में बैठी रहलियै । मिनिट भर बाद उठलियै तेँ देखै छियै तेँ दोनोँ बैल जुआ सें निकली केँ बोरा दिश मुँ करी केँ खाड़ोँ होय गेलोँ छै आरो आँख फाड़ी-फाड़ी केँ गाड़ी पर बैठलोँ कोय आदमी केँ देखी रहलोँ छै । हमरा कुछ समझै में नै ऐलै । गाड़ी पर कोय नै छेलै । हम्मं एकेक करी केँ दोनो बैल केँ जुआ में टानी केँ लानै के कोशिश करियै, मतरकि बैलवो एकदम सें छलांग मारी केँ फेनू मोढ़ा दिश आवी केँ खाड़ोँ होय जाय आरो होन्है केँ हड़कलोँ-हड़कलोँ गाड़ी पर बैठलोँ कोय आदमी केँ देखेँ लागै । आबेँ तेँ हमरोँ माथोँ ठनकलै । सोचलियै, डरला सें तेँ आरो गड़बड़ । जी केँ कड़ा करलियै, हनुमान चालीसा दुहरैतेँ गाड़ी पर छड़पी गेलियै । आभी गाड़ी पर बैठलोँ नै होवै कि लागलै—गाँड़ी पर हाथ धरी केँ कोय हमरा नीचेँ पटकी देलेँ रहेँ । हम्मं तेँ खच्चा में । आबेँ हमरा सब बात समझै में आवी गेलोँ छेलै.....

ई सब बात चोलाय का बड़ी विस्तार सें सबकेँ सुनाय छै कि केना वें रात काटलकै ।

चुल्हाय काका के बातोँ पर के विश्वास नै करेँ । हौ दिन सें तेँ ऊ दिश जायवाला आदमी जोँ असकल्ले रहै छै तेँ बीस बाँस हटिये केँ पोखरिया

वाला रास्ते से होय के जाय छै । थोड़ो घुरावटे नी पड़े छै, छै ते सुरक्षित । आय पहिलो दाफी बहुत दिनों के बाद लोगे ठाकुरबाड़ी में शंख गूंजते सुनलकै । तबे लोगे यहू जानलकै कि ढीबा ठाकुरबाड़ी के सरकारी पुजारी होय गेलो छै, तबे की छेलै, मूर्तिये गायब होय जकां ढेरे-ढेरे बात उठलै, लेकिन बात दुए टा निष्कर्षो पर खतम होलै कि ढीबा आबे सरकारी पुजारी होय गेलो छै, ये लेली भूत-प्रेत ओकरा धरे नै पारे । सरकारी आदमी ते आपने भूत-प्रेत होय छै, भूत-प्रेते ओकरा की धरतै; वहू में सरकारी पुजारी के । फेनू दोसरो बात ई—कि ढीबू ते अपने पहिले से सिद्ध छै । ओकरा ते टैम मिललो छेलै कि अमुक समय में ओकरा पूर्ण सिद्धि मिली जैतै, से आबे मिली गेलै.....जो नै मिली गेलो छै ते पटना-दिल्ली तांय पढ़लो-लिखलो दास बाबू हेनो आदमी केना ओकरा इज्जत दै छै ।” आरो ई विश्वास ही धीरे-धीरे लोगो में एत्ते बढ़लै कि दासे बाबू रं सौंसे गाँव ओकरा ढीबा धरमदास कहे लागलै, हेना के एकरा में सबसे अधिक मदद करलकै ते दासे बाबू ।

आरो शंख गूंजे के ठीक चौथे दिन ठाकुरबाड़ी में हाथ भरी के मूर्तियो आवी गेलै, छिनमान पहिलके ठाकुर जी के मूर्ति नांखी । लोगे देखे ते आचरज करै । अष्ट धातु वाला मूर्ति, मतरकि कारो केना होय गेलै ? ढीबां ई बात भरी इलाका के समझावै कि मूर्ति ते वहे छेकै, हमरो सिद्धि से डरी के चोरवैय्यां धरी ऐलो छै.....पाप के घरो में रहलाहै से भगवान कारो पड़ी गेलो छै, भगवान के ई पाप के छाया से मुक्त करै ले महीना भरी के अष्टयाम करवाना जरूरी छै । हेनो होतै ते भगवानो आपनो रूप में आवी जैतै आरो भरी इलाका में पुण्य फैली जैतै । कोय एक शंका करै ते पाँच समझावै वाला । समझाय वाला में चुल्हाय काकाहौ शामिल छेलै । काकां समझावै, तखनियो लोगे यह शंका करले छेलै कि कि मूर्ति भला दूध केना पीतै, मतरकि पीले छेलै की नै.....तबे मूर्ति कारो से गोरो केना नै होतै—भजन-कीर्तन आरो तंत्र-मंत्र में कोन ताकत नै होय छै । एक बात फेनू केन्हेंनी समझै छै—ढीबू धरमदास आवै के पहिले केकरो हिम्मत छेलै कि ठाकुरबाड़ी दिशो से दुसकल्लो दुघरी जांव । पाँच ठो मिली के जाय छेलै आरो पाँचो हनुमान चालीसा पढ़ते । ई हमरो ढीबू धरमदास जी ही छेकै कि भरखर राती में असकल्लो वहाँ पड़लो रहै छै । की हेनै के पड़लो रहै छै ? सिद्धि पैले छै—पाँच परैते दिन-राती हमरो ढीबू धरमदास के आगू-पीछू करतै रहै छै । धरमदास जी के ते खाली इशारा होतै, सब अटका-टोटका ते दूर करतै भूत-प्रेत । करिये रहलो छै, नै करी रहलो छै ते हमरो बैलगाड़ी आबे रात-बेरात निरबिधिन केना घोर पहुँची जाय छै । आरो फेनू एतन्है बात नै नी छै,

ठाकुरबाड़िये नगीच धरमदास के गुरु महाराज देवो दास के समाधियो बनतै—ताजमहल नाँखी भव्य । सब बात बड़ी तेजी सें फैली रहलो छेलै ।

ढीबा सें कोय पूछे तें वें हेनो आँख-मूँ बन्द करी लै, जेना ई बातों पर शंका करवो, एत्ते बड़ो पाप छेकै, जेकरा सौ अष्टयाम करला के बादो दूर नै करलो जावे सके । हेनो शंका करैवाला के देखवो पाप ।

सौसे इलाका में खलबली छेलै—रामनवमी के महीना भरी पैहिलें सें अष्टयाम शुरू होय जैतै आरो रामनवमी के दिन खतम होतै । जे जत्ते दान दिऐं पारे । आखिर इलाका भरी के मरजाद के बात छेकै आरो फेनू की हेनो उत्सव बार-बार होय छै ।

ढीबू साथें सौ कार्यकर्ता सें कम नै लागलो छै—एत्ते बड़ो जग जे होय रहलो छै । आखिर भंडारा की असकल्ले संभलै वाला छै । दस जनानी सें कम खटै वाली नै चाही । मतरकि ढीबू के आन जनानी पर विश्वास नै छै । वेंने खाली आपनिये दोनों जनानी के बुलैलें छै, आरो आन काम संभारी दै लें अपनी दू बूढ़ी सासो के ।

जो न दिनों सें एक घोर पीछू एक पसेरी धान वसूली के काम चललै, वही दिनों सें ढीबू गद्दी धरी लेलकै । ठाकुरबाड़ी के बाहर बाँस-बत्ती छानी के बड़ो रँ दू कोठरी के कुटिया बनैलो गेलै । एक में ढीबू आरो ओकरो साथें चुल्हाय का । दुसरा में ढीबू के लॅर-जॅर सब । ई बात तें कोय नै समझै कि जे चुल्हाय का के साथें ढीबू के कभियो नै पटलै, ऊ एक्के कोठरी में रात-दिन केना बिताय छै ।

रामचेलवां एक दिन चुल्हाय के कहलकै, “हो काका, जखनी ढीबू का प्रवचन करै छै, तखनी हुनको आवाज के पीछू आरो एक आवाज हौले-हौले उठै छै, हमरा तें ऊ आवाज तोरहे बुझावै छीं ।”

“चुप ! लागै छै तोरो दिन पुरी गेलो छी । अरे ऊ जे दू बार आवाज बुझाय छौ, ऊ दू दाफी बोलै वाला साउण्ड बॉक्स के कारणें ।” चुल्हाय नें रामचेलवां के मुँह पर हाथ रखतें कहलकै, “तोरा मालूम नै छी कि ढीबू सरकारी पुजारी छेकै, ई सब बोलवें तें कल्हे जेल में दिखाय पढ़वे ।

जे हुऐं ढीबू के प्रवचन सुनै लें जॅर-जनानी उपटै । हफ्ता में पाँच दिन दासो बाबू आवी के खाड़ो होइये जाय, अलग बात छेलै कि जोतखी का हुलकियो के ताकै लें हुन्नें नै जाय । पूछला पर कहै, “आंय रे, जे ढीबां के चानी पर बाल नै छेलै, ई दास बाबू के कारने ओकरा नाँकी में जट्टो होय गेलो छै । बोलें—जे जिनगी भर आपनो मौगी सिनी के वनवास देलें ऐलै, आय ठाकुरबाड़ी में बिठाय

के गृहस्थ धर्म के महत्व बतावै छै । कहै छै—असली सन्यास ते परिवारे बीच रही के भगवत रो भजन छेकै । ढिंढोरा पिटवाय रहलो छै कि वै चंदा-पैसा से आपनो गुरु के समाधि ठाकुरबाड़ी से सटलो बनवैतै, आंय रे ! आरो तोरा सिनी हेनो कि मूर्ति वाला बाते भुलाय गेलै ।”

जोतखी का के बात ढीबा के कानो में नै पड़ै, हेनो बात नै छेलै, मतर ऊ ई सब से हेनो अनजान बनलो रहै कि ओकरा खुद अपना पर आचरज हुए । फेनू ढीबा के ई सब बातों पर ध्यान दै के फुर्सते कहाँ छेलै । घी रे , चौर रे, तेल रे, दाल रे, चिकसो रे, फोल-फलारी रे—एत्ते-एत्ते समान जुटी रहलो छेलै—सब के ध्यान रखना छेलै । ओकरा टपैयो वाला के कमी नै छेलै—ई बात ढीबा से बड़ी के ज्यादा आरो के जानै छै ।

मतरकि ई सब से बड़ी के ओकरो ध्यान इलाका भरी से आवी रहलो चंदा के टाका-पैसा पर छेलै । के कत्ते देलकै—एकरा से ज्यादा वै ई बातों पर ध्यान दै कि कत्ते ऐलै ? के की देलकै आरो लैवालां कत्ते जेबी में राखलकै—ढीबां जानै छै, एकरा पर ध्यान देला पर चंदा कटवैया के टीमे भंगटी जैतै । बाढ़ के पानी जे टा पोखरी-कुइयाँ में बची जाय, वही पानी-पानी, बाकी फानी ।

खाली पाँच दिनो में पन्द्रह हजार जुटी गेलै । कम बड़ो बात नै छेकै । खोमचा आरो लेमनचूस बेचैवालाहो से चंदा उसूललो गेलो छै । होना के ढीबां आपनो आदमी से सुनाय के ते यहे कहले छेलै, “चंदा वास्ते केकरो तंग नै करलो जाय, धरम-करम छेकै स्वेच्छा से ।” मतरकि मुखिया, सरपंच, चौधरी हेनो घरों के छोड़ी के हर घरों से पर मुंडा दस टाका आरो बाजार में पर दुकान सौ टाका दल बांधी के वसूल भेलै । सड़क पर दौड़ैवाला मोटर-ट्रक से मनमाना । ढीबाहै के इशारा पर मोटर-ट्रक रोकै वास्ते सड़क पर बांस के बल्ला आरो बैलगाड़ी बीच बीच लगैलो जाय छेलै आरो चंदा वसूलहै पर गाड़ी हटै । काफी उछाह छेलै चंदा उगवैया में ।

ढीबां गद्दी पर बैठलो-बैठलो खाली गाड़ी के गिनती लिखै । टाका लिखे के जरूरते नै छेलै । टाका ते बांधी देलो गेलो छेलै—ट्रक पीछू बीस टाका आरो सवारीवाला मोटर पीछू पच्चीस टाका । झारखण्ड से जोड़ैवाला एक्के ते ई सड़क छै । ढीबू ते गाड़िये गिनते औल-बौल होतें रहै । यही से गाँववाला चन्दा पर ओकरो विशेष ध्याने नै रहै । कहीं से ते आँख मून्है ले लागे—बहुत कुछ पावै ले । ई राज के ढीबू खूब अच्छा रं जानै छै ।

अष्टयाम कल से शुरू होयवाला छेलै आरो मूड़ी-घुँघनी, कचड़ा-फुलौड़ी, घुपचुप के ठेला-खोमचा के अइवो एक दिन पहिले से शुरू छेलै । बिकौ कि नै

बिकौ । पाँच टाका—पर ठेला । माल नै बिकौ, तेँ पाँच टाका के समाने कार्यकर्ता खाय लेतै—ढीबू के व्यवस्था छेलै । ई व्यवस्था सेँ कार्यकर्ता खुश तेँ, खोमचो वाला । वाह एकरा कहै छै धर्मी आरो भगत—आपनोँ एक-एक आदमी के खयाल राखै वाला ।

गनगन करी रहलोँ छेलै गाँव । ठाकुरबाड़ी के पछियेँ सटले बड़का पीपर रोँ गाछ । वहेँ पीपर गाछ के चार डाली पर चारो दिश कण्डाल लगैलोँ गेलोँ छेलै । दिन-रात भजन-कीर्तन ठनका वाला आवाजोँ में गूजतेँ रहै । आबेँ अष्टयाम छेलै, तेँ एक्को पल रुकतियै केना । रात भरी सौँसे गाँव उधियैतेँ रहै । जे सुतेँ पारलोँ—ऊ मीर, नै तेँ अधीर । केकरोँ मजाल कि जाय केँ कोय ढीबू केँ बोली दौ—जरा कण्डाल के आवाज कम करवाय दौ । ई तेँ गनीमत समझोँ कि इलाका भरी में जगह-जगह पर कण्डाल तारोँ सेँ नै जोड़वैलकै, होना केँ ढीबा के विचार तेँ यही छेलै । शहरोँ में ई वेवस्था देखलेँ छेलै । पीपर गाछी पर चार कण्डाल लगाय के जबेँ पहिलोँ दाफी विरोध होलै, तेँ ढीबां कहलकै, “जे पीपल गाछ पर तैंतीस करोड़ देवता बसै छै, हुनका सिनी केँ, की ई चारे कंडाल सेँ भजन-कीर्तन सुनैलोँ जावेँ सकै छै—एक करोड़ देवता पीछू कम-सेँ-कम एक कण्डाल लगतै की नै ? मानी कि तैंतीस कण्डाल ।” एकरा सेँ ज्यादा बात करै के फुर्सत ढीबू केँ नै छै ।

हुन्नेँ ढीबू के आदमियो कम व्यस्त नै छेलै—रोज-रोज, कुछ-नै-कुछ ढीबू के बारे में नया खबर लोगोँ के बीच लानै—

“आय हुनी है पड़पड़िया रौदी में एक ठोप पानियो नै राखलकै जीहा पर”

“आय हुनकोँ एक दिवसी साधना छेलै”

“दू दिन सेँ एक सबद नै बोललै”

“ एकदम निराहार छै तीन दिनोँ सेँ”

ढीबू चुल्हाय का रोँ गोड़ पकड़ी लेलकै । केन्होँ-केन्होँ बुद्धि लगाय रहलोँ छै, आखिर केकरोँ लेँ—ओकरे लेँ नी । चुल्हाय के भी मोँन भरी गेलै । मनोँ में कुछ बात उठलोँ छेलै, वहुँ धोलाय गेलै, मजकि ढीबू सधलोँ जोतसी रं ओकरोँ मन-मिजाज केँ गमतेँ कहलकै, “काका, है नै समझियोँ कि सतकर्म के फोँल बेरथ जाय छै । धर्म तेँ कपली गाय होय छै, आरो कोय काम बेरथ चल्तोँ जाय तेँ चल्तोँ जाय, कपली गाय के सेवा नै.....काका जखनी हम्मं हरीद्वार में छेलियोँ, एक साधू के सेवा करै छेलियै, हुनी समाधि लेलकौँ तेँ हम्मं हुनकोँ समाधिये थान के सेवा करेँ लागलियै । पहलेँ तेँ ऊ समाधि थान पाँच हाथ के छेल्लै, दुवे साल में ऊ दस हाथ के जमीन पर फैली गेली । भजन करियोँ, प्रवचन

करियों, भीड़ लागों, फेनू एक दिन जहाँ तांय भीड़ लागलो छेलौ, वहाँ तांय बाँसबत्ती सें घेरवाय देलियों । पैसा तें भादों के पानी रं झरों । जों ऊ सन्यासिनी के फेर नै पड़तियों तें की हम्में यहाँ होतियों । चुड़ैल की रं हमरा आपनो माया में फाँसी लेलकौं । खुल्ला बाल, हाथों में कड़ा आरो चुट्टा देखी के हमरो मति भ्रम में पड़ी गेलीं । सब खजाना के सब तरह सें मालकिन वहे होय गेलीं..... .मजकि जावै ले दहौ सब बातों के । हम्में तें तोरो मन गमतें है सब कहीं देलियों; फेनू यहू बात छै—हमरो बाद तोंही नी धरमदास ।”

चुल्हाय एकदम नरम पड़तें कहलकै, “तोहें जत्ते बात मनेमन सोची गेलौ ढीबू, ओत्ते दूर तांय हम्में नै सोचले छेलियै । हों एतना टा जरूर सोचले छेलियै कि ई अष्टयाम सें जों हमरो व्यापार आरो बड़ी जाय, तें आपनो आदत अलगे लगय्यै ।”

“होतै काका, यहू होतै, मजकि पहिले अष्टयाम । आरो हों, बहुत सोच-विचार के बाद हम्में सोची लेले छियै—छाती पर कलश राखी के निराहार रहै के ।”

फेनू की । भोर होतें न होतें खबर फैललै कि ढीबू रामनवमी के ठीक नौ दिन पहिले सें रामनौमी तांय निराहारै रहतै, छाती पर कलश धरनें—नै जीहा पर एक बूँद पानी जैतै, नै दिशा-मैदान । यहाँ तांय कि सबके छायायो सें दूर रहतै । देखियो के कोय नै देखे पारतै ।

सबके आचरज हुऐ । फेनू यहू सोचै, ढीबा वास्ते एत्ते सब बात खाली ढीव नै हुऐ पारे । पूरे इलाका में ई खबर सें सनसनी छै । मजकि जोतखी का के ई सब बातों पर एकदम विश्वास नै । कहै छै—जे पेटू दिन भरी में बीस बार अंगुली जुठावै छै, ऊ नौ दिन छाती पर कलश धरलें भुखलो रहतै, हुवै नै पारै । सुनियें, निराहार रहै के दिन ऐहें गामों सें फिरारे होय गेलो छै । विश्वास नै छौ तें देखी लियें । आरो रहिये गेलो छै कत्ते दिन—बस आरो तीन दिन ।

आय दू रोज सें ढीबा कुटिया सें बाहर नै निकली रहलो छै । ई बात खाली चुल्हाय के मालूम छै कि कैन्हें नी ऊ बाहर निकली रहलो छै—रिहर्सल करी रहलो छै, जखनी मॅन तखनी चित्त लेटी जाय छै, छाती पर भरलो कलश राखी के आरो फेनू आठ-नो घंटा पड़ले रहै छै.....तखनी ओकरो मोन एकदम चंचल होतें रहै छै, किसिम-किसिम के बात उठतें रहै छै.....दास बाबू के छाया उभरै छै, सरपंच-मुखिया के छवि उठै छै आरो सबके आँख ओकरे दिश उठलो होलो.....तखनी ढीबा के ठोरो पर मुस्की फैली जाय छै आरो ऊ बुदबुदाय उठै छै.....दास बाबू, तोरो कारनामा केकरा नै मालूम छै, ऊ तें मुखिया-सरपंच तोरो पच्छों में छौं, बस यही ले, है अष्टयाम में तोरो दरियादिली

के मतलब हममें नै समझे छियौं की ? आरो फेनू हममें देखे नै छियै, की रं सरपंच-मुखिया तोरो पीछू लागलो रहै छौं एकदम दासमदास । आबे जे एत्ते भक्ति करै छौ तोरो, ओकरो विरुद्ध तोहें बोलवौ करभौ ते केना के । शिवाला तांय मुखिया के हाता में होय गेलै.....तबे की करभौ, भगवानो के यहै मंजूर छै । हौ कहै छै नी कि भगवान ते भक्त के मुट्ठी में कैद होय छै, तबे मुट्ठी जेकरो जत्ते मजबूत, ऊ ओत्ते बड़ो भक्त आरो मुट्ठी मजबूत होय वास्ते की चाहियो—हड्डी-माँस ? नै, एकरो वास्ते चाहियो टाका ।....ई सब जे हममें एत्ते उद्योग करी रहलो छियै, कथी ले ?

सोचते सोचते ढीबू एतै खुश होय जाय छै ऊ छाती पर धरलो कलश के एक दिश धरी, स्प्रिंग वाला पुतला नाँखी उछली के खाड़ो होय जाय । ६ गोती ठेहुनां से ऊपर उठाय के ढेका खोसै आरो कोठरी में 'ता थै' के नाच शुरू करी दै—कभी थोड़ो लबी के दोनों टांग फैलाय लै, कभी बारी-बारी से दाँया-बाँया कमर के बरोबर उठाय लै आरो कभियो दोनों हाथ ऊपर नीचे करते कोठरी के एक दिश जाय ते कभी दुसरो दिश । एकदम उन्मक्त होय उठलै ढीबू ।

थकी गेलै ते कलशो छाती पर राखी के होने दोनों हाथ कमर तांय सीधा करते चित्त लेटी गेलै ।

आरो ऊ दिन ते सब्भे के मुँहो पर बस ढीबू के चर्चा छेलै । ठाकुरबाड़ी के ठीक पीछू, पीपर गाछी से थोड़ो हटी के आठ हाथ लम्बा आरो तीन हाथ चौड़ा गड्ढा खोदलो गेलै—करीब पाँच हाथ गहरा । वही में पुआल पर साफ-साफ गेरूआ रं के चादर बिछेलो गेलै आरो वही पर जबे ढीबू चित्त लेटी गेलै—छाती पर धान से गुंथलो गिल्ला मांटी के चकती धरी के आरो चकती पर भारी रं कलशो—जे आमो के पल्लो से ढँकलो छेलै, ते सबके आँख लोराय गेलै ।

ढीबू एक दाफी नजर फेरी सबके निहारलकै आरो फेनू इशारा करलकै । इशारा करतै गड्ढा के ऊपर तख्ता बिछाय देलो गेलै । फेनू तख्ता पर बिल्ला भरी माँटी के मोटो परत । जेना कि गड्ढा पर तख्ता रखे से पहिले ढीबू देखवैया के देखी आहिस्ता से हाथ जोड़ले छेलै, होने के, तख्ता पर मिट्टी पड़तै सब्भे ढीबू के जिनगी ले ठाकुर दिश मूँ करी हाथ जोड़लकै ।

जमीन के सोर बराबर होना छेलै कि भजन-कीर्तन, ढोल-झाल के हेनो विन्डोवो उधियैलै कि मत पूछो । चारे कंडाले चार सौ के काम करे लागलै । कुछ हेन्हे कि आपनो बात कहै ले कण्डाल के जरूरत पड़े । गाँव भरी के लोगो के मुँहो पर बस ढीबू के चर्चा ।

जों-जों दिन कटलोँ गेलै, चर्चोँ गनगनैलोँ गेलै । रामनौमी आरो अष्टयाम के जिकर के बदला ढीबुए के चर्चा छेलै ।

आठमोँ दिन बीती रहलोँ छेलै । कल्ले ढीबू बाहर निकललै । देखवय्या तेँ हद-हद होँ-होँ करी रहलोँ छेलै ।

मतरकि है की ? माँटी आरो तखता हटैलोँ गेलै तेँ गड्डा में ढीबू वहाँ कहाँ छेलै । बिछैलोँ चादर पर, ढीबू के जग्घा पर माँटी सें जेना-तेना बनैलोँ आरो भसकलोँ आदमी छेलै आरो धान के घास चारो दिश उगलोँ । गाँव-टोला आरो इलाका भरी में खबर भादो के बोहोँ रं होहाय उठलै—ढीबू धरमदासेँ देह तेजी देलकै, माँटी के देह माँटी बनाय लेलकै, कोय बात सें हुनकोँ मोँन दुखित होय गेलोँ छेलै ।” खबर दै वाला के आँख लोराय रहलोँ छेलै ।

गड्डा देखवैय्या के तेँ टूट्ट लागी गेलै । इंचियो भर जग्घोँ नै कि टाँगोँ बीचोँ सें निकली केँ कोय बच्चो वहाँ तांय पहुँची जाय । लोग पीपरोँ गाछी पर चढ़ी-चढ़ी गड्डा हुलकी रहलोँ छै ।

सबके चेहरा पर किसिम-किसिम के भाव छै, मजकि चुल्हाय के चेहरा पर एक्के भाव—जों केन्हौँ केँ ढीबा पकड़ाय जाय तेँ ओकरा यही गड्डा में जीत्ते जी भत्ती दियै । कलश में पानी राखै के जग्घा में चंदा रोँ लाखो टका राखी केँ गायब होय गेलै । जहाँ टाकावाला कलशोँ गाड़ी जाय के बात वैँ कहलै छेलै, वहाँ तेँ पानी भरलोँ कलशोँ छेलै । चुल्हाय केँ आपना आप पर भारी गोस्ता ऐलै कि तखनिये वैँ एक दाफी कैने नी माँटी खोदी केँ कलशोँ देखी लेलकै, जे ढीबा के गायब होला के बाद देखलकै ।

आरो चुल्हाय चट सना एक कसलोँ थाप आपनोँ दाँया गाल पर दै मारलकै । ओकरोँ कानोँ में जोतखी का के खिलखिलैवोँ सुनाय पड़े छै, मतरकि चुल्हाय इस्थिरे बनलोँ रहै छै ।

आरो ऊ जे चुप होलै तेँ चुप्पे होय गेलै । कुछ नै बोलै छै ।

ढीबा के हौ रं अलोपित होय गेलोँ साल भरी होय गेलोँ छै । जहाँ सें ऊ गायब होलोँ छेलै, वहीं पर आबेँ एक लम्बा-चौड़ा समाधि स्थान छै । समाधि पर लिखलोँ छै—ढीबा धरमदास समाधि-स्थल । समाधि-स्थल महीना भरी में अपने आप एक हाथ बढ़ी जाय छै आरो ओकरोँ बढ्हैँ घेरलोँ दीवारो अपने आप हाथ भरी बढ़ी जाय छै । केना बढ़ी जाय छै ? जों कोय वांही पीपरोँ गाछ के नीचेँ बैठलोँ चुल्हाय धरमदास सें पूछै छै, तेँ उत्तर दै के बदला खाली उल्टा राखलोँ एक तखती सीधा करी केँ देखाय दै छै, जे पर लिखलोँ छै— “धरमदास ढीबू के पुण्यफल सें ई संसार में कुछुओ संभव छै, कुछुओ आचरज नै ।”

एक सावित्री रोँ मौत

“तोहें ठिक्के पहचानलौ बाबूजी, ई वही बसमतिया छैकै—छट्टू मरड़ के जेठी बेटी, मतरकि आबेँ एकरोँ नाम बसमतिया नै । आबेँ येँ आपनोँ नाम रबिया खातून बतावै छै ।”

“से केन्हें ?”

“बड़ी लम्बा कहानी छै बाबूजी । सब तेँ बतैबोँ एकदम मोश्किल । होनो केँ के नै जानै छै—बसमतिया के कहानी ! आबेँ तेँ गाँव केरोँ बच्चा-बच्चा जानी लेलेँ छै—बसमतिया के कहानी । बसमतिया नै कहिए बाबू ! रबिया खातून कहिए ।”

“मतरकि ई सब होलै केना ?”

“की कहियोँ बाबूजी; ननकेसर भगत छेलै नी—अरे वही, पूबारी टोला वाला ननकेसर भगत—ओकरे बेटा कर्कट....की कहियोँ बाबूजी, ऊ तेँ बसमतिया पर ई रं लट्टू-लट्टू छेलै कि बस ! गाँव-टोला भरी में दोनोँ के प्रेम के चर्चा उठतैँ रहै । यहू बसमतिया की कम रहै बाबूजी.... कहै के तेँ तेरह-चौदह बरस के छेलै, मतरकि राधाहौ के कान काटैवाली ।”

“जात तेँ दोनोँ के एक्के छेलै । केन्हें नी ननकेसर आरो छट्टूँ बातचीत करी केँ दोनोँ के जोड़ी लगाय देलकै ।”

“ई बारे में आबेँ हममें की कहियोँ, मतर एत्तेँ तेँ जानै छियै कि ई बातोँ केँ लै केँ बसमतिया मांय कर्कट के दुर्गत पुराय देलकै । समैयो के फेर देखोँ, की सुमति-कुमति के फेर पड़लै कि बसमतियो के मोँन धीरें-धीरें कर्कट सेँ उचाट हुँए

लागलै ।”

“से केन्हें ?”

“ई बारे में की बतैय्यौं बाबूजी । होना के गोतिया-लोहिया रो यही कहवो छेके कि बसमतिया मांय ओझा-गुनी रो मन्तर पढ़लो बतासा बसमतिया के खिलाय देले रहै—देवघरो के परसाद कही के, आरो वही दिनों से बसमतिया रो मोन कर्कट दिशो से उचाट हुए लागलै । मजकि ईटहरीवाली भौजी के ते कहवो छेके कि एकरा ओकरी मैय्ये कहने छेले कि आबे से जो बसमतिया कर्कट से मिललै-जुललै, ते वै ओकरो चमड़ी उतरवाय देते आरो यहे डरो से ये कर्कट से मिलनौं-जुलनौं छोड़ी देलकै....मतरकि कर्कट एकरा कहाँ से छोड़े वाला छेले । कोय-न-कोय वक्त, आरो कोय-न-कोय बहाना बनाय के ऊ दिन भरी में बसमतिया से मिलिऐ लै.... ई परेमो अजगुत चीज होय छै बाबूजी—आदमी के नचाय-नचाय के राखी दै छै....आरो जबे देवी राधाहै के नचाय देलकै, तबे मनुक्खो के की बात । मजकि बाबूजी, की हेनो परेमो से केकरौ जशो मिललो छै ? बदनामी छोड़ी के आरो मिलले छै की ? कर्कटो के की नै दुर्गत पुरलै.... की कहियौं बाबूजी, एक राती बसमतिया मांय ओकरा आपनो घरो के पिछुवाड़ी में पावी, ओकरो जुल्फी लचाय-लचाय के जे पिटाय करलकै कि मत पूछो, ओकरो परेम करै के सब निशाँवे उतरी गेलै । की जानौं, केना के भोर होतै-होतै ई खबर सब्भे के मिलियो गेलै । पूबारी टोलो से लै के पछियारी टोलो आरो उतरवारी से लै के दखिनवारी टोलो तांय रो के नै जानलकै ।...कर्कटो आपनो कारिख लगलो मूँ कहाँ-कहाँ नुकैतियै, तेसरे दिन जे गाँव छोड़लकै, ते आय तांय नै लौटलो छै । कोय ते कहै छै, कर्कटें कहलगांव टीशनो के नगीच टरेनो से कटी के जान दै देलकै—लहाश छिनमान कर्कट से मिलै-जुलै छेले, मजकि सुरेनमा आपनो आँखी देखलो बतावै छै कि वै पौरकां साल कर्कट के जमालपुर टीशनो पर खोमचा बेचते देखले छेले—सुरेनमा के देखतै ऊ भीड़ के ठेलते टीशनो से बाहर निकली गेलै । आबे के की कहे सकै छै बाबूजी कि कर्कट जीत्तो छै आकि मरी गेलै.... ।”

“मजकि बासमती रो ई हाल ?”

“मत पूछो बाबूजी, कर्कट के गेला रो बाद, साल भर ते बसमतिया रो घर-दुआर से निकलवो बन्द होय गेलै—नद्दी-बारी करबो ते छोड़ी दौ । जो र-जनानी की बात कहै छै, की सुनभौ । तोरा याद होतौ बाबूजी, नहियो हुए, तबे महमूदवा चार या पाँच साल के होतै ।”

“के महमूदवा ? वहे इस्माइल रो बेटा ?”

“हों-हों बाबूजी, वहे इस्माइल रो बेटा, तबे ते यादे छीं । बम बैजनाथ, हममें एक्को बात जों झूठ बोलतें रहैं बाबूजी । महमूदवा रो लच्छन हमरहो ठीक नै लागै, मजकि गाँव-जवार रो बात छेलै, के की बोले । होना के जे कहो बाबूजी, घरवैय्या के बुरा लगौ, नै लगौ, आन-आन के बुरा जरुरे लगै—घरे-घर काना-फूसी ते चलवे करै ।”

“ते तोरो मतलब छै की..... ।”

“बम बैजनाथ, जों हममें झूठ बोलतें रहैं । विश्वास नै छीं ते गामों के बिन्देसरी पांडे, कैलू भगत, रामचन्नर मरड़, गोविन्द घोष—जेकरा सें चाहौ, पूछी ला । सब्भें एक्के बात बतैथीं । ठिक्के कहावत छै कि तिरिया रो चरित्तर आरो पुरुखों के भाग—भगमानो नै जानै छै ते आदमी की जानतै । यहे बसमतिया जे कर्कट बिना चोइयाँ नोचलो मछली सन लागै छेलै; महमूदवा साथे लटसट होहैं केन्हो हलफलाय उठली छेली—ई ते हममें आँखों देखलो बताय रहलो छियाँ बाबूजी । बसमतिया के फेनू सें नद्दी-बारी जाना शुरू होय गेलो छेलै ।”

“ते की एकरी मांय एकरा नै रोकै छेलै ?”

“मांय की रोकतियै बाबूजी, जे आपन्हें चरतें-फिरतें रहै, वै बेटे के भला की रोकतियै....नारी मरजाद के ताखा पर राखी देले छेलै बाबूजी ।”

“ते दोनों रो व्याह केन्हें नी करी दै छेलै ?”

“अहा, वही कहाँ हुँ सकलै । मांय जे कुछ सोचै छेलै, ओकरा सें ते ऊ बाते छिनाय गेलै ।”

“ऊ की ?”

“तोहे ते जानवे करै छौ कि छट्टू के खाय-पीयै के ठिकानाहे की छेलै । खींची-तीरी के बसमतिया रो जनम तांय ते चललै, मतरकि ओकरो बाद बसमतिया मांय बसमतिया के लेनें चचेरो दियोर खखरहै कन पड़ली रहै छेलै । मजकि तोहें कहो बाबूजी, ई कोय अच्छा काम भेलै ! पेट रो आगिन केकरो पास नै होय छै....आरो एक दाफी शरम जेकरो साथ छोड़ी दै छै, तबे ते जानबे करै छो बाबूजी....खखरा गामे के पुलिस चौकी में रतजग्गी करै छेलै....अरे बाबूजी, चाम जरै छै ते केकरा लुग नै दुर्गन्ध पहुँचै छै । धीरें-धीरें बसमतिया मांय आरो खखरा के लटसट वाला दुर्गन्ध पुलिसों के नाकी के लागी गेलै । ओकरो बाद ते बसमतिया मांय के लेले दिन-रात खखरा के फाँड़ी पहुँचते के नै देखे. ... मतरकि जुआनियो की ओरदा पूरे तांय के होय छै बाबूजी, ओकरहै में दस ठो के होय के—एक्के-दू साल में ते बसमतिया मांय गुलगुलैन नाँखी दिखावे लागलै आरो जबे ओकरो मोल घटलै ते बसमतिया के महमूदवा के हाथे बेचै के बात

सोचेँ लागलै.... नै मालूम, बसमतिया माय केँ केकरा सें तेँ ई पता चली गेलोँ छेलै कि इनरकास्ट बीहा होला सें सरकारी पैसा साथेँ-साथेँ सरकारी नौकरियो मिलै छै ।पेट जे नै करावेँ । एक दिन वैँ बसमतिया केँ—की कहै छै ओकरा—कोर्ट मैरिज ? वहा करावै लेली गाँमोँ सें भोरे-भोर बाहर भेजी देलकै ।”
‘तबेँ ?”

“तबेँ की । तबेँ तेँ बिन्डोवोँ उठवे नी करलै बाबूजी, गामोँ में । भोरे-भोर खैरावाली, डुमरीवाली आरो गोलहट्टीवाली जे उधियैलै की मत पूछोँ—सात पुस्त केँ निनौन पुराय केँ राखी देलकै । आखिर हम्मी पूछै छियोँ बाबूजी, कैन्हें नी पुरैतियै—गाँव-जवार के मरजाद तेँ सब्भे पर होय छै । होय छै कि नै बाबूजी ?”
“मजकि बसमतिया रोँ ई हाल ?”

“वही तेँ बताय लेँ चाहै छियोँ । बसमतिया केँ लै केँ जबेँ महमूदवा गाँव सें चली देलकै, तबेँ गाँमोँ के भयंकर बिन्डोवोँ उठलै—हिन्दू-मुसलमान रोँ बिन्डोवोँ—एक दिश हिन्दू पट्टी रोँ भोला पासवान, जोगिन्दर जादव, रामकिसुन सिंह रोँ भीड़ आरो दूसरोँ दिश मौलाना साथेँ सब्भे मुसलमान पंचपट्टी वाला मैदानोँ में जुटेँ लागलौँ । हमरोँ करेजोँ तेँ लोहारोँ के धौंकनी रं हुएँ लागलौँ । ऊ तेँ ठीक टैम पर दरोगा-निसपिट्टर आवी गेलौँ बाबूजी, दू दाफी हवा में फेरिंग करलकौँ आरो बन्दूक के आवाज होना छेलै कि एक-एक करी केँ दोनोँ पट्टी के लोग खिसकी गेलौँ । मतरकि महीना भरी गामोँ में डोर बनले रहलौँ बाबूजी, नै हमरा सिनी हुन्नेँ जइयोँ, नै मुसलमान टोला के कोय्यो हिन्नेँ आवौँ ।”

“मजकि ई बसमतिया.... ?”

“बसमतिये के बारे में बताय लेँ जाय रहलोँ छियोँ....एकरोँ लेली की-की नै होलै, मजकि सब बतैवोँ मोशिकल बाबूजी ! टोला-टोला में पुलिस घूमेँ लागलौँ—बसमतिया केँ खोजै लेँ । वसुदत्त सरपंचे मियां टोली केँ चेतावनी दै देलेँ छेलै—जोँ पाँच रोजोँ में बसमतिया केँ हाजिर नै करलोँ गेलै तेँ मियां पट्टी के सब गुंडागर्दी हेट करी देलोँ जैतै । भला तोहीं बतावोँ बाबूजी, यै में मियां पट्टी वाला के की दोख छेलै आरो जोँ हमरा सें साफ-साफ पूछोँ तेँ यै में खाली दोखी छै बसमतिया माय । यै में इस्माइल के की दोख ? महमूदवो रोँ की ? दही बिल्ली रोँ आगू राखवौ तेँ चाटवे करतै—ऊ बिल्ली काली रहौक कि गोरी ।”
“होँ, तबेँ की होलै ?”

“होना की छेलै बाबूजी । गामोँ में बसमतिया रहतियै, तबेँ नी । मतरकि कानूनोँ सें के बचेँ पारलेँ छै । दसो रोज बितलोँ नै बितलोँ होतै कि दरोगा साहबें पकड़िये तेँ लेलकै महमूदवा केँ । मुंगेरी के हौ कौन टोला कहावै

छै—इखनी नाम भुलाय रहलो छियौं—कहै छै, सौ योजन दूरो के चीज गिद्ध के दिखाय पड़ै छै । नै जानौं, केना पुलिसो के ई खबर लागी गेलै कि महमूदवा बसमतिया के लै के मुंगेर भागी गेलो छै—मानै ले होथौं पुलिसो के, अजगुत बरेन राखै छै बाबूजी, केन्हौं न केन्हौं सच के उगलवैय्ये लै छै, आरो होलै वही । हेनो पेंच मारलकै कि.... की कहै छै हुनका, जे मुसलमानो के शादी-बीहा कराय छै, जे भी कहैते रहौ, हुनका से एक-एक करी के सब बात उगलवाय लेलकै । तबे की छेलै ।हेनो के जे कहो बाबूजी, बीहा जबे होय्ये गेलो छेलै ते एत्ते धिकवा-मंथन करला से फायदे की छेलै ।”

“से ते ठीक छै । वहू में जबे बसमतिये माय चाहै छेलै ।”

“बसमतिया माय की चाहै छेलै आरो की नै, ई तोहें की जानवौ बाबूजी, ओकरो ते एक्के किंछा छेलै—कोय रकम से सरकारी पैसा पावै के । मतरकि ओकरो मनसुआ पर जेना पानी फिरी गेलै, तभिये ते वहू ई बवंडर के विरोध नै करलकै । बलुक घूमी-घूमी के टोला से लै के थाना तांय यहें कहते फिरै कि इस्माइलें जानी-बूझी के हमरा धरमभ्रष्टो करै लेली हमरी बेटी के उड़वैले छै.... हद होय गेलै.... बाबूजी, पुलिसो से ते लटसट छेवे करलै, तभिये ते पुलिसवाल्हें जी-जान एक करी देलकै । नै ते हेनो इग्गी-दुग्गी परिवारो लेली पुलिसो के की पड़लो छै ।”

“ते तोहें बसमतिया के बारे में बताय रहलो छेलें ।”

“कहै लेली बसमतिये पर खाली की, ई घटना से जुड़लो बहुते पर बहुत कुछ कहलो जावे सकै छै, मजकि की होतै कही के.... कहलें से की होय जैते । आबे ते बसमतियौ के जिनगी में जे भोगना छै, भोगी रहलो छै—देखवे करै छै । होना के जे कहो, जो महमूदवा के पुलिसे नै पकड़तियै.... होना के पकड़ियो के कहाँ पकड़े पारलकै पुलिसे ।”

“से केना ?”

“अरे, की बतैय्यौं बाबूजी, महमूदवा के जग्घा में एकरहै खींची-तीरी के थाना लानलो गेलै । जो न वक्ती बसमतिया के थाना लानलो गेलै, की बतैय्यौं, देखैवाला के की भीड़ छेलै । लागै छेलै, थाना में मेला लागलो रहे । मौगी, मरद, बूढ़ो-बुतरू के ठसाठस भीड़ में जबे पुलिसे बसमतिया से पूछना शुरू करलकै, ते की कहियौं.... मजकि वाह, बसमतियौ आपनो नाम रबिया खातून छोड़ी के आर नाम नै बतैलकै बाबूजी । पुलिसे जबे माय-बाप के नाम पूछै ते यहें कहै, ‘हमरो कोय माय-बाप नै ।’.... जहलो में राखलो गेलै, मजकि बसमतिया पर ते जेना भूत-नाम्ही गेलो रहे । बस एक्के बात बोलै, ‘हमरो कोय माय-बाप

नै ।”

“तबे ?”

“तबे की ? डागडरी जाँच भेलै । बसमतिया केँ कै दिनों तांय कोर्ट-होस्पिटल लै गेला बादें, नै जानौं डागडर आरो पुलिसें मिली-जुली की गिटपिट करलकै आरो बसमतिया केँ छोड़ी देलकै ।”

“ई कैन्हें, कि ससुराल जाय के बदला यहाँ हटिया में तरकारी बेची रहलौं छै ?”

“नै तेँ आरो की करतै बाबूजी ।”

“कैन्हें, महमूदवां नै लै गेलै ?”

“आय बाबूजी, तोरा तेँ ई बतैये लेँ भूली गेलियौं कि जोँन वक्ती पुलिसें बसमतिया केँ मुंगेरी में पकड़लकै, तबे तेँ महमूदवा साथे छेलै, मजकि, थाना पर लोगें नै देखलकै । की कहियौं बाबूजी, दस आदमी, दस रं के बात । कोय कुछ कहै छै, कोय कुछ । तबे तेँ बिरजू मिसिर हकाय-हकाय केँ कहै—पुलिसवालां पैसा लै केँ महमूदवा केँ छोड़ी देलेँ छै, मजकि नसीम मियां तेँ यहेँ कहलेँ फुरै कि बसमतियै मांय पुलिसोँ केँ पैसा-कौड़ी दै केँ महमूदवा केँ भगवाय देलकै—रहस खुली जाय के डरोँ सें । आबेँ के की कहै सकै छै । मजकि एतना बात तेँ जरुरे छै कि तबे सें महमूदवां जे गाँव छोड़लकै, तेँ घूमी केँ ओकरोँ छायाहो यहाँ लौटी केँ नै ऐलै ।”

“मजकि बसमतिया रोँ ससुरालवाला ?”

“तहूँ की बात करै छौ बाबूजी । बसमतिया सें मतलब छेलै तेँ महमूदवा केँ । घरवाला केँ एकरा सें की लेना-देना छेलै । बलुक पुलिस-उलिस के चक्कर देखी केँ तेँ घरवालां साफ-साफ कही देलकै कि ‘हमरासिनी कोय बसमतिया आकि रबिया खातून केँ नै जानै छियै; जोँ महमूदवा गलती करलेँ छै तेँ ओकरा मारोँ-डँगावोँ ।’...मजकि सच पूछोँ तेँ बाबूजी, भीतरिया बात कुछ आरो रहै । इस्माइल के साफ-साफ कहना छेलै कि जे जनानी जहल काटी केँ ऐलोँ छै, ओकरोँ अखण्डोँ होय के की भरोसोँ । यही लेली बसमतिया केँ इस्माइलें आपनोँ द्वारी पर चढ़ौ लेँ नै देलकै ।”

“ई तेँ बसमतिया साथें बड़ा अन्याय भेलै ।”

“हों, बड़का भारी अन्याय, आरो की, यहू पर बसमतियां आपना केँ रबिया खातून कहवोँ नै छोड़लकै । अइयो कहै छै.... मजकि कहौ आपना केँ भले कुछ, काम तेँ आबेँ करै छै आपनोँ माय्ये वाला.... । की करतियै.... सास-ससुर छोड़ी देलकै, माय के देहरी लौटनै नै छेलै....नौड़ियो के काम पर तेँ हिन्दू राखै लेँ तैयार नै छेलै, तेँ मियां पट्टी रोँ लोग की.... जबेँ एकरोँ वास्तें कोय्यो नै रहलै,

तेँ सबकेँ ही यें आपनोँ बनाय लेलकै.... पेट की नै करावै.... आबेँ तेँ देखवे करै छौ बाबूजी, कभी-कभी सब्जी बेचलकौँ आरो कभियो आपनां केँ.... नजर घुमाय केँ देखिये लौ नी....।”

गर्वी दयालें कुछु येँ ढंगोँ सेँ हमरा कहलकै कि हमरोँ नजर एकबारगिये बसमतिया दिश पलटी गेलै । देखलियै—तरकारी भरलोँ डलिया केँ आपनोँ माथा पर उठैनेँ बसमतिया एक दिश चली देनेँ छेलै आरो अधवैसू उमरी के मरद, जे कुछुवे देर पहिलें सब्जी रोँ मोल-तोल करै छेलै, आबेँ कुत्ता नाँखी बसमतिया केँ पिछुवैलेँ जाय रहलोँ छेलै ।

“सुरेनमा चोट्टा छेकौँ.... आक्-थू, हेनोँ सब आदमी केँ तेँ कमर सेँ काटी केँ अलगाय देना चाही ।” गर्वी दयाल के टनटनैलोँ आवाज तेज हुएँ लागलोँ छेलै । हमरा लागलै, हमरोँ सीना के खून एकबारगिये बलबलाय केँ बाहर निकली ऐतै आरो यहू कि बसमतिया रोँ सौँसे देह खूनोँ सेँ लथपथ हुएँ लागलोँ छै ।

रैन भई चहुँ देस

पाँच दिन पहिलौं एतन्हें जोरो सें बरसा होलो छेलै । कोशी गांग मिली केँ एक होलै तेँ ओकरो तांडव लीला कटिहार सें लै केँ नौगछिया तांय फैली गेलै । कटिहारो के यहें गाँव छेलै, जे बची गेलो छेलै । आय तांय नै भांसलो छै, कत्तो केन्हें नी बोहो आवी जाव । ई गाँव के बारे में यहाँकरो लोग यहें जानै छै कि सौंसे इलाका डूबी जाय, तेँ डूबी जाय ई गाँव केन्हौ केँ नै डूबेँ सकै । औघड़ बाबां आपनो मशानी हड्डी सें ई गाँव केँ घेरी देलेँ छै । आयको बात नै छेकै, हजार, दू हजार साल पहिलको बात छेकै.....नै जानौं कहाँ सें ऊ औघड़ ऐलो छेलै आरो यहें उतराही कोना सें सटलो असमसान में जमी गेलै । चार कट्ठा के जमीन पर झबरलो बोर गाछी के नीचें । नै कुटिया, नै आसन-बासन । सावन-भादो के महीना छेलै । कोशी के पेटी हेनो उमतैलै कि मत पूछो । औघड़ के तेँ कुछ नै बिगाड़े पारलकै, हों बोर गाछी केँ जड़ें सें उखाड़ले बही गेलै । औघड़ के गुस्सा तेँ हेनो बढलै कि जेना ऋषि जहनु हेनो ही चुरूवे में लै केँ कोशी केँ पीवी जैतै । सात दिनों तांय पानी के बीच खाड़े रही गेलै, एकदम खाड़े उपास आरो जबे बोहो उतरलै तेँ ऊ औघड़ें एक हड्डी लै केँ ई गाँव के सिमाना केँ ही बांधी देलकै । वही दिनों सें कोशी कत्तो उखाल मारौ, ई गाँव में नै घुसेँ पारेँगाँव के पुरखा-पुरातन सें ई कथा सुनलेँ छै किसनां, झुट्टो थोड़े हुएँ पारेँ ।

रात के टापेटुप अन्हार में किसनां आँख उठाय केँ देखलकै—बाप रे बाप केन्हो अन्हार, जेना काली मांय आपनो देहो के रंग पोछी केँ सौंसे इलाका

के देही पर पोती देले रहे । सब कुछ कारो-कारो, कुछओ नै दिखाय पड़ी रहलौ छै । बस गंगा आरो कोशी के उमड़ते धार के आवाज । जेना काली माय रेतो पर छमछम नांचते रहे । ओकरा लागलै, ऊ आवाज ओकरे दिश दौड़लो ऐते रहे । ओकरो सौसे देह भौवाय उठलै ।

“किसुनका होऽऽऽऽ”

“के नरैनां आं आं ?” किसनां अन्हारे में आवाज लगैलकै

“हों, हर्मीं, काकी आरनी पार उतरी गेलौं । काकी कहलें छीं—फसिल ले जान जोखिम में डाले ले नै ।”

एकरो बाद कोय आवाज नै ऐलै, नै किसना फेनू आवाज देलकै ।

ओकरो आँखी के सामनां में अचोके केला रो खड़ा फसिल उब-डुब करे लागलै । लागलै कि वै आपने हाथें आपनो दोनों हाथ चूरी लेतै, लहूलुहान करी लेतै, ताकि फेनू कभियों कोय किसिम के ऊ खेती करे लायके नै रहे ।

घंटा भर होलो होतै, पानी खूब झमाझम बरसी के थमी गेलो छेलै । दालानी पर बेचैन घुमतै किसना सोचलकै, ई बोहा से केला रो ओकरो खड़ा फसिल बर्बाद होय जाय छै, ते वै केकहूँ दोषियो ते नै ठहरावे सके । लछमनियों ते मना करले छेलै । कहले छेलै, “आपनो पास जे कुछ जमीन-जायदाद छीं आरो एकरा से जतन्हें टा मकै-गहूम रो फसिल होय जाय छै, ओकरा से परिवार के ते भरण-पोषण होइये जाय छै, फेनू केला खेती के ई झमेला में की फँसवो । ज्यादा हाय-हाय करलहें से की होतै, परेशानिये होतै आरो फेनू बचलो समय्यो रो सुख सपना ।”

मजकि किसनां अपनी कनियैन लछमनिया रो बाते कहाँ मानलकै । वै देखले छेलै कि कोन रकम दस सालो के भीतरे नौगछिया, कटिहार, पुर्णिया, खगड़िया रो छोटो-छोटो किसान केला रो उपज करी मालोमाल होय गेलो छेलै । वहे किसान, जे पहिले कलाय, रहार, मकै के खेती करे, तबे हुनको जिनगी हेनो ते खुशहाल नै रहै कि ऊ आपनो बेटा के पटना आकि भागलपुरो भेजे पारे । आय ते वहे में से कैकटो के बच्चा दिल्ली आरो बनारस में पढ़े छै । हमरे टोला के यहे परमेसरी पाँच साल पहिले हमरुहे से पाँच सौ रूपा ले गेलो छेलै, पाँचे दिनों में वापिस करी दै के नाम पर आरो साल भरी में नै लौटावैपारलकै । आय महाजन बनलो होलो छै—केलाहै रो खेती पर । सब्भे के मालूम छै, परमेसरी महीने में सात-आठ हजार रूपा आपनो बच्चा लेली दिल्ली भेजे छै आरो ऊ हरकरिया, जे कल तांय दसो कोस पैदल चली के ग्यारह-बारह बजे राती घोर पहुँचे छेलै, आय ओकरो गोड़ कारो से नीचै नै हुए छै.....जब ओकरो

कार गामों में घुसै छै तेँ माँटी के ऊबड़-खाबड़ रास्ता केँ पार कारलेँ सीधे ओकरोँ घरे पर रुकै छै । सब केलाहै खेती के कमाल । आबेँ तेँ यहें परमेसरी हमरो सिनी सें अंगरेजिये में बतियैलकोँ, बाप-दादा रोँ भाषाहै भूली गेलै । खड़ियो बोली बोललकोँ वहू में तीन-चार ठो अंग्रेजी शब्द दाली में फोरन नाँखी डालिये केँ । जेना चौबटिया वाला पनेड़ी आपनोँ पानोँ में ऊपरोँ सें कल्था जरूरे डालेँ, भलेँ कोय चाहेँ की नै चाहेँ आरो परमेसरी के दोनों बच्चा, ऊ दोनों तेँ खैर हिन्दी जानवे नै करै छै—परमेसरी तेँ जेना बस कोय अंगरेजी बच्चा केँ गोद लेलेँ रहेँ..... ।

किसना के मोँन सोचते-सोचतेँ केन्होँ तेँ होय उठलै, एकदम कसैलोँ-कसैलोँ । मजकि आधे-एक मिनिट लेली । तुरते नरम पड़तेँ सोचलकै, “वहूँ तेँ केलाहै रोँ आमदनी सें आपनोँ बच्चा केँ दिल्ली-बनारस तांय पढ़ाय के बात सोचलेँ छै—भले आपनोँ बाप-दादा के जुबाने में—आखिर यही सोची कि हिन्दुस्तानों में जनमलोँ छै तेँ हिन्दी नै बोलतै तेँ की बोलतै । जानले बात छेकै—जों बाप-दादा के भाषा नै बोलतै तेँ आपनोँ समाजोँ, आपनोँ देश-दुनिया के दुख-दरदे की समझेँ पारतै...मजकि है सब तेँ बादकोँ बात । पढ़ीक कुछुए आरो जेना पढ़ीक—पढ़ै लेली पहिलें चाही टाका । आपनोँ मुलुक में आबेँ तेँ धोँन बिना शिक्षा के पूछो पकड़बोँ मुश्किल..... । लछमनिया कहै छै, केला खेती नै करै लेँ । की वैँ है बात नै समझे छै कि एकरोँ सिवा कोय दुसरोँ रास्तो की छै । एक तेँ भगवानें ई इलाका के मिट्टिये हेनोँ बनैलोँ छै कि केलाहे वै में सबसेँ बढ़िया उपजेँ पारेँ आरो दुसरोँ बात छै कि आन खेती में टाका-पैसा लै केँ ओल्लेँ परेशानी तेँ नहिये छै । खुचुर-खुचुर खर्चा करोँ, एक मुश्त पैसा लगाय के जरूरत नै पड़े छै, तेँ अखरबो नै करै छै । आन खेती में तेँ चोटे पर चोट । केला खेती में खुचुर-खुचुर लगावोँ आरो हर दाफी झोला भरी-भरी सेती राखोँ । परमेसरी मुख नै छै जे केला खेती नै छोड़े छै । एक दाफी नै, कै दाफी बिन्डोवोँ-अन्धड़-बतासेँ खेते के खेत ओकरोँ केला गाछी केँ उजाड़ी देलेँ छै, तेँ की वैँ ई खेती छोड़ी देलकै...घाटा-लाभ सोचिये-परखिये केँ तेँ....

आरो यहें लेली तेँ किसना पहिलें परमेसरी होय के बात सोची लेलेँ छेलै । सब ओरी सें हिसाब-किताब बैठाय केँ वैँ देखलकै कि मकै आरो गहुम रोँ खेती के जग्घा में केलाहै रोँ खेती पकड़ला में फायदा छै । तबेँ वैँ लछमनिया रोँ एक बात नै मानलकै आरो सामाचरण बाबू के यहाँ सें सूद पर बीस हजार टाका लै आनलकै ।

सूद पर टाका लै के पहिलें किसना आपनोँ दोस्त जगेसरो सें मिललोँ

रहै । बात तेँ यहें छेलै कि जगेसरहें सूदोँ पर कर्जा लै केँ केला खेती करै के सलाह ओकरा देलेँ छेलै । सलाहे नै, यहू समझैलकै कि केला रोँ एक खानी पर बीस सें पचीस टाका के मुनाफा छै । एक एकड़ में जों वैँ छों हजार टाका लगाय दे छै, तेँ बारह हजार समझोँ ओकरोँ आपनोँ छेकै ।

सुनहेंँ किसना के मोँन झूमी गेलै । वैँ करलकै भी वही आरो साल के ऐतें नै ऐतें किसना के खेतो केला गाछी सें लहलहावेँ लागलै । केला के हरा रंगो सें ज्यादा ओकरोँ मोँन हरा होय गेलै । ओकरे नै, लछमनियो के । आपनोँ भूल केँ मानतें आरो किसना के साहस केँ सरैहतें बोललै, “जन्हेंँ काटेँ वोँन ।”

सचमुचे में किसनां आपनोँ लगन आरो संघर्ष सें सब किसिम के विपति रोँ जंगल काटी-छाँटी देलेँ छेलै । कत्तेँ मेहनत सें पटाय-पटाय केँ वैँ केला कंद खड़ा करलेँ छेलै । समय-समय पर कोड़ाई साधेंँ दवाय-दारू के छिड़काव तांय । किसना केँ मालूम छेलै कि केला गाछ रोँ सबसें बड़ोँ बेमारी छेकै—बांझी । जों लागी गेलोँ तेँ एकेक पौधा सूखी-सूखी सनसनाठी बनी जाय ।

यही डरें लछमनिया तेबारी थानोँ में कबूलतियो गच्छी ऐलोँ छेलै आरो मने-मन यहू कबूली ऐलोँ छेलै, जों फसल ठीक-ठाक उतरी गेलै तेँ वैँ धान केँ जरूरे पक्का करवाय देतै ।

तबेँ के जानै छेलै कि हेनोँ बारिस होतै । हथिया में सताहा । दस दिन पहिलेंँ किसना केँ बोहो के चिन्ता नै छेलै । चिन्ता छेलै तेँ बस एकरे कि कहीं केला पर चित्ती नै पड़ी जाय । चित्ती लगतै तेँ व्यापारी ना-नुकुर करतै, बीस के माल दस में मांगतै; हेनोँ केला केँ छुवोँ लेँ नै चाहै छै । जगेसरे साथ रही केँ किसना व्यापारी के चालबाजी सें खूब परिचित होय गेलोँ छै । मजकि चित्ती लागी गेलै तेँ वैँ करवो करतै की । कम में नै बेचतै तेँ की फसल खेमें में सड़तै । ई इलाका में एतना बड़ोँ मंडियो तेँ नै कि फसिल वाहीं जाय केँ बेची आवों । बस लै दै केँ धनबाद, पटना, लखनऊ आरो बनारस । आरो जों कोय किसान चाहेंँ कि ट्रक ठीक करी आपन्हेंँ फसल वहाँ बेची आवों तेँ समझोँ ओकरोँ हेनोँ आरो कोय बड़ोँ मुखेंँ नै । किसना के खयाल ऐलै—पिछुलका साल आन में छंगुरी कां यहेंँ करलेँ छेलै । ट्रक ठीक करी वैँ पर केला लदवैलकै आरो पहुँची गेलै पटना । सोचलकै, दू के चार बनेवै आरो होलै की ? वहाँ तेँ केला पहिलहेंँ से बाजारोँ में भरलोँ छेलै । छंगुरी का केँ की मालूम कि पटना में केला के भाव कम होय गेलोँ छै । आबेँ लौटैयो केँ की लै जैतियै । पैसा-कौड़ी के अभाव में आखिर छंगुरी कां घोरोँ सें घाटा सही केँ फसल बेची देलकै आरो हेनोँ टुटलै कि दस साल तांय खेती के बातो नै सोचेँ सकलकै ।

किसना सोचलकै—छंगुरी का रो खेत ते सड़के किनारी छै । व्यापारी के टरको लाने में कोय दिक्कत नै । जबकि हमरो खेत ते सड़क से बहुत हटी के दूर पर छै, ट्रक नै पहुँचे पारे । बैलगाड़ी पर लादी के पहिले सड़क तांय लानो, यै में खरच अलगे । किसना मने-मन कुढ़ते फदकलै, “आखिर गामो के मुखिया एतन्हौ टा कैन्हें नी करै छै कि गामे में एकटा हेनो बाजार हुएँ, जै में हमरो हेनो मँझलो किसिम के किसान आपनो माल बेची आवौ ।”

गंगा-कोशी में सावन-भादो के उफान आवै के ठीक दू महीना पहिलको बात छेकै; किसना से परमेसरी कहले छेलै, “गाँववाला सिनी जो मिली-जुली के शिवराज बाबू के मुखिया से विधायक बनाय दिएँ, ते कोय्यो कीमत पर है ते तय्ये छै कि हुनी विधायक से मंत्री बनिये जैते आरो मंत्री बनहैं जे हुनी पहिलो काम करतै, हौ कटिहार में केला से जेली बनै के कारखाना खोलवाना, है हममें नै कही रहलो छियौ किसिन, शिवराज बाबू खुद्दे धानुक, कोरी, यादव टोली के पाँचो सौ आदमी के बीच कहले छै, आरो तोंही सोच-विचार करी के देखें किसिन, जो हेनो होय जाय छै ते केला बेचै ले किसानो के नै बाहर जाय ले लागतै, नै ते मजूरिये ले दिल्ली आरो पंजाब भागै ले लागतै । बस आपनो टोलावाला से वोट दिलवाय दिएँ किसिन । आपनो टोला पर तोरो पकड़ छौ, ई बात ते सब्भै जानै छै ।”

किसना ओकरो बात चुपचाप सुनी लेले छेलै । बोललै कुछ नै । वै जानै छेलै कि है सब होतै कुछवे नै, कहै-सुनावै ले जे जतना कही, सुनाय लौ । होना के जब तांय परमेसरी कहते रहलै, तब तांय ओकरा हेने लागलै कि ओकरो सब्भे टा दुख-दरिद्री जइये वाला छै—लक्ष्मी घोर, दलिदूदर बाहर । आरो जे परमेसरी आपनो बात कही गेलै, ते जादा ते नै, एतना किसना जरूरे सोचलकै कि शिवराज बाबू विधायक मंत्री बनला पर जो नहियो कुछ करतै, ते एतना ते जरूरे करतै कि ई गाँव के कच्ची रास्ता के पक्की जरूरे बनाय देतै—पक्की सड़क तांय । आखिर शिवराज बाबू के मौका बे मौका ई गाँव ते आबै जाय ले पड़तै । जो सड़क बनी जाय छै, ते अबकी वहु बैलगाड़ी से नै, सीधे टैक्सी करतै आरो लछमनिया साथे भोले बाबा के दरशन लेली सिधेसर थान पहुँचतै । लछमनियो ई बात के दाफी कही चुकलो छै । अबकी बाबा के किरपा से फसलो होन्है लहलहाय रहलो छै । ई फसल से एतना ते जरूरे करतै । चौधरी जी के सबटा कर्ज चुकैला के बादो ओकरो मुट्ठी में एतना टाका ते बचिये जाय छै कि अगला आषाढ़ में केला के कंद रोपै पारे । किसना मने-मन सब हिसाब-किताब लगैले छेलै ।

पर ओकरा की मालूम छेलै कि भादो गेला के बाद हेन्हो बरिश होतै । पाँच दिन पहिले जबे सताहा लागी के बरसा रुकी गेलो छेलै आरो मौसम वैज्ञानिके एकरो घोषणा करी देलकै कि आबे बाकी साल में मौसम सूखे सूखा रहतै ते किसना के बड़ी ढाढस होलै । मजकि ओकरा की मालूम कि मौसम वैज्ञानिक के भविष्यवाणी आरो सड़को किनारे के पिंजड़ा में बंद सुग्गा के भाग्य बतैवो—दोनों बराबरे ।

छठमो दिन बीतते नै बीतते भोररिये से वहे प्रलयकारी बरसा शुरू होय गेलै । किसना सुनलकै—समस्तीपुर, खगड़िया के बाद आबे कटिहारो के कै गाँव भाँसे वाला छै । नौगछिया ते पानिये पर तैरी रहलो छै । किसना मनेमन सोचलकै—मनिहारी घाटो में पानी जो सतह से ऊपर उठलै ते समझो कि ओकरो गाँव नै बचे पारे ।

मजकि हेनो नै हुए पारे । किसना फेनू मनेमन सोचलकै—गाँव के पुरखां जे औघड़ वाला कथा कहै छै, ऊ झुट्टे नै हुए पारे । आरो कुछ होय जावे पारे, ई गाँव के कोशी छुवौ नै पारे । आरो ई सोचलै ओकरा लागलै, जेना वै बोहा में भाँसते कोय गाछी के सहारा पावी लेले रहे । “की सचमुचे ओकरो गाँव बची जैतै, जो कोशी आखरी तांय उमतैलै । तखनी औघड़ के बचन की करतै । सुनै छियै कि एक दाफी बाली रं बलशाली एक राकसे कोशी के छान्हे के कोशिश करले छेलै—रूप से मोहित होय के । की बन्हाय गेलो छेलै । ते औघड़ के मंत्र से की बन्हाय जैतै कोशी माय ।” किसना एकदम से काँपी उठलै । ओकरो हाथो से ऐलो गाछ गोता खाय कहीं दूर निकली गेलै—ढेर सिनी शंकारो थपेड़ा खाय के ।

किसना सोचे लागलै—आय भोररिये से जोन रकम के बरसा होय रहलो छै, रुकी-रुकी के, ओकरा से ते ई नै लगै कि हमरो ई गामो केन्हो के बचे पारतै । आस-पास के नगीच वाला में ते हेलाव भरी पानी छप-छप करिये रहलो छै । समेली, तिनघरिया, बोखरी, अमोध्यागंज, मजडीहा के लोग नाव पर बैठी-बैठी आपनो घोर-दुआर छोड़ी देलकै—जोर-जनानी, बच्चा-बूढ़ो सब नाव-डेगी पर बैठी के । बस दू-एक टा छवारिक हरेक घरों में रही गेलो छै । बड़ी जिद करी नाव पर वहुं लछमनिया के चढ़ाय देले छेलै, बेटा आरो दियोर साथे लगाय के ।

किसना सोचलकै ई ते वै अच्छा करले छेलै कि लछमनिया के जिद पर मकान के छत पर माँटी गारा पर ईटा के एक छोटो रं कोठरी आरो बनाय लेले छेलै । नै जानौ कि सोची के ऊ उठलै आरो बाँसो वाला सीढ़ी छत से लगाय

के ऊपर चढ़ी गेलै । किसना झाँकी के देखलकै—बाँस भरी दूरी-दूरी पर नाव रेत पर बही रहलौ छै, जै पर जनानी बच्चा-बूढ़ो साथें गाय-भैंस-बकरी तांय लादलौ छै । नाव बड़ी तेजी सें बड़ी रहलौ छै । किसना आकाश दिख देखलकै । कारो- कारो मेघ बीच मलका साँपे रं ठनकी रहलौ छेलै—उखेल होला सें की, कखनियो पानी होहाय के पड़े पारे ।

ओकरो दोनों आँख अपने आप मूंदी गेलै आरो दोनों हाथ उठी गेलै कोशी माय के प्रार्थना में । आँख मूंदलै ते कुछ देर लेली मुंदले रही गेलै । कानों में छप-छप के आवाजो साथें मनौन के गीत गुँजे लागलै,

सगरे समैया कोशिका हँसी खेली बितैलियै से भादो मासे
कोशी माय लागै छै पहाड़ से भादो मासें
एक ते अन्हार राती दोसर बरसात घाती सूझै नहीं
मैया गे रेत के बहाव सें गे सूझै नाही
मलरी-मलरी कोशिका करै अनघोल सें नदी बीचें
कोशी माय मन डरयाय से नदी बीचें ।

पहचानै में देर नै लागलै । ओढ़ैया के दादी रो आवाज छेलै “ते की हरिबोलो भैया गाँव छोड़ी रहलौ छै ?” किसना के मुँहो सें आवाज निकललै आरो फेनू ऊ पागल नाँखी आपनो छत पर चक्कर लगैतें बोललै—“हरिबोलो भैया छोड़िये रहलौ छै ते की अचरज । अबकी हुनी खेतियो-बाड़ी ते नै करलौ छै । कोन मोह होतै । मजकि हम्मं केना छोड़ी के चल्लो जांव । ओकरो आँखी में अचोके केला रो हलहलैतें गाछ सिनी नाँचे लागलै जेना सेना के सैनिक के जमात आपस में कोय उत्सव मनैतें ।

“किसना का, नाव लेले परमेसरी का पुबारी टोलो के ऊ छोरी पर छौं । कोशी के बोहो गाँव में घुसी ऐलौं । समेली, तिनघरिया, बोखरी, अयोध्या गंज, मजडीहा सब हेलम-हेल हुएँ लागलौ छै । काका, जल्दी तोरा बुलैलकौं । नाव खोलतौं ।” ऐंगन सें अठारो साल के एक लड़का हाँक देलकै ।

“की ?” किसना के काटो ते खून नै । एक क्षण लेली काठ बनी गेलै ।

“हों काका, जगेसर काका एकदम जल्दी बोलैलकौं ।”

“बिलटा” किसना तुरते आपनो हालतो पर काबू पैतें कहलकै, “जो जगेसर के कही दियें, ऊ नाव लै के निकली जैतै, जेकरा-जेकरा लै जावे पारतै, लै जैतै, मजकि हम्मं नै जैवै ।”

किसना देखलकै, बिलटा ओकरो पूरा बात बिना सुनलहँ उड़ान दै देलै छेलै । कुहराम मचे लागलै । हजार, दू हजार के आदमी के आवाज, एक लाख

के आदमी के शोरगुल में बदली गेलै । किसना समझी लेलकै कि कोशी औघड़ के बांधलो रेखाहौ के लांधी गेलै । रेखा लांधी गेलै, तहीं से ते ई हाहाकार छै । बैरिया, करबोला, पहाड़पुर, जमरा, अमबड़िया आरो गोरबा गाँव ते पहिलें बोहा में भाँसे लागलो छेलै, आबे यहू इलाका जलमगन । जबे समेली, तिनघरिया आरो मजडीहे डूबी गेलै ते ओकरो केला खेते केना बचलो होतै । आदमी ते छत्तो पर चढ़ी गेलो होतै, गाछो पर चढ़ी गेलो होतै, मजकि बेचारा फसिलऊ ते ढोर-ढांगर नाँखि बही गेलो होतै । ढोर-ढांगर ते तभियो हेली-हूली के बची जैतै, मजकि खड़ा फसिल ? ऊ तेकल जबे भोर होतै ते केला के गाछ सिनी कटलो-मरलो सैनिक के लहाश नाँखि हिन्ने-हुन्ने पानी पर पड़लो नजर ऐतै । मजकि आबे भोर होतै की ?

सोचतै किसना के आँख आपने आप मुनी गेलै । आरो मुनले आँखी से वें आपनो खेत के एक-एक गाछ के देखलकै—एकदम क्षत-विक्षत । जेना धृतराष्ट्र ने मुनलो आँखी से कुरुक्षेत्र के देखले छेलै । किसना के छाती फाटी के रही गेलै । ओकरो मोन होलै—ऊ उठै आरो हमेशे-हमेशे लेली ई गाँव छोड़ी के चली दै । रहौक कोशिये माय आरो पंचतल्ला हवेली में बाबू शिवराज जी ।

मजकि कहाँ जैतै किसना । ई गाँव में ते किसना रो कनियैनिये के नै, ओकरो सपना गड़लो छै—एक ठो नै, कैक ठो । फेनू कन्नू चौधरी ? सपने नै गड़लो छै—कन्नू चौधरी के कर्जो गड़लो छै—सान नाँखी ओकरो छाती में । केन्हौ के नै भागे पारे ऊ ।

आकाश कारो-कारो मेघो से ओन्हे ढलढल छेलै । मलका के अभियो होन्हे मलकवो । बूदा-बूदी नै होय छेलै, मतरकि वही राती से किसना के आँखी से जे बूदा-बूदी शुरू भेलै, ऊ आय तांय नै रुकलो छै ।

पगलवा मरी गेलै

“सुनलैं, पगलवा मरी गेलै ।”

“आंय की बोलै छैं, पगलवा मरी गेलै !”

“झूठ थोड़े बोलै छियौ.....होना केँ जे कहैं, लोगें ओकरा पगलवा भले कहै छेलै, बात ओकरोँ पागलवाला नै छेलै ।”

“बात रहौ कि नै रहौ, हर बातों पर ओकरा भाषण आरो कुढ़बों ओकरा पागले सिद्ध करै छेलै ।”

“से तेँ ठिक्के कहलैं.....मजकि जे कहैं, आबेँ ओकरोँ बिना घोर, गली, मुहल्ला, चौराहा सब सूने-सूने लगतै ।”

“धूरो ! सूनों की लागतै, ओकरा सें तेँ सब तंगे छेलै—घोरवाला सें लैकेँ गली-मुहल्ला वाला तांय । पता नै, कत्तेँ बड़ों महात्मा बुद्ध आरो चाणक्य आपना केँ समझै छेलै वै ।”

“मजकि जे भी कहैं, बात बुद्धि वाला बोलै छेलै ।”

“धूरो ! की बोलै छेलै, माथों चाटी जाय । आबेँ तोँही बोलैं—घरोँ के औकतोँ-भाँसों लोगें घरोँ सें बाहर नै फेकतै तेँ कहाँ फेकतै । सोचैं, सौ घरोँ के गन्दगी एक्के ठियाँ जमा होतै तेँ ढेर नै लागतै की ? आबेँ यहै बात लै केँ ऊ दिन भरी भिनकतेँ रहै । केकरौ सीधा बोलै के तेँ दम छेलै नै—कूड़ा दिश मूं करी फदकतेँ जाय अरबी-फारसी, अंगरेजी में—जथी में जखनी सुर चढ़ी गेलों, बस वही में ।”

“एकदम सुराहा छेलै । फदकी शुरू होलै तेँ रुकै के नाम नै । यही बातों सें तेँ ओकरोँ घरवालाहौ तंग छेलै ।”

“तंग नै ऐतै । छोटों-छोटों बातों वास्ते ई रं ऊ बहू-बेटी पर झुंझलैते रहै कि नै पूछें । जरा-सा बर्त्तन-बासन के आवाज होलै कि हुन्ने से ओकरो आवाज झाँझे नाँखी झनकलै—रसोय घोर छेकै की कारखाना ? मार ठायं-ठांय करी रहलौ छे भोरें सें ।”

“यहू बात नै छेलै कि एक बात के खतम होतैं वहीं पर रुकी जांव, बर्त्तन-वासन सें शुरू होलौ ते तुरत्ते दोसरो बातों पर, लागले तेसरो बातों पर ।”

“घोर भरी के उधियाय के राखी दै । एकदम तंग-तंग करी मारै । आबे तोंही बोलैं.....खैर ओकरो डरो सें ओकरो कोय बच्चा-बुतरू टी. वी., रेडियो ते नहियें चलावै, जखनी पड़ोसियो टी. वी. बजावै, तखनी ओकरो मिजाज देखतियें । हमरा ते के दाफी देखै के मौका मिललौ छै—भन्न-भन्न करतें रहैतियो—आपनों कोठरी सें लै के पड़ोसी के दीवारी तांय जाय के फदकतियो ‘ई मुहल्ला ते जेना शाह मार्केट बनी गेलौ छे ।’ पत्नी दिश जाय-जाय कहतियो—शाह मार्किटे में केन्हें नी जाय के मकान खरीदी लेला । कान ते छौं नै, कान ते फाटै छे हमरो—लागै छे जेना कान्हें में कंडाल बजते रहे ।”

“है बात बोललै ते हमरा याद ऐलै, सावनी पूजा के दिन छेलै । फांड़ी के सामना वाला गोवर्द्धन मंदिरों के कंडाल रो मूँ वही दिश छेलै, जन्ने पगलवा रो घोर । जखनी हममें ओकरो घोर पहुँचलिये ते देखलिये, कंडाल के आवाजो सें ज्यादा ऊ बाजी रहलौ छे । आपनों दोनों छोटकी बेटी पर बरसवो करी रहलौ छै—तोरे सिनी हेन्हो परवैतनी के कारणे है कंडाल चंडाल रं बाजी रहलौ छे । गाहक जत्ते बढलै, दोकान ओत्ते सजतै, ई ते जानले बात छेकै ।”

“फेन्हू ते परवैतनी साथें पगलवो के उपास होलौ होतै ?”

“एकदम ठीक बोललैं । बकबक करतें, घोरो सें निकललै ते दिन भरी ले निकलिये गेलै । दिन भरी आसरा देखतैं रहलिये कि घोर लोटै ते श्यामसुन्दर घोष वाला कविता-पुस्तक लै लिये । कै दिन होय गेलौ छेलै—मांगिये ते कहै—आभी ते कुछे पंक्ति पढ़ले छिये । पढ़ै छेलै कि गीतों के गोड़ जातै, पता नै ।”

“अरे, तोहें घोष जी के ऊ किताब की देले छेलें, सब्भे ले विपत्ति के पिटारा देले छेलें । एक दिना हममें वही वक्ती पहुँची गेलिये, जखनी वैं वहे किताब पढ़ी रहलौ छेलै । हमरा देखतैं इशारा सें बैठे ले कहलकौ आरो सुनाबे लागलौ—गीतों में है जे नदी, जंगल, पहाड़, झरना के बात कवि करने छै आरो जे रं सरकार सें लै के ठेकेदार तांय पर्वत-जंगल उजाड़ी रहलौ छै, तबे कवि के की होतै, कविता के की होतै, नद्दी के की होतै, सबसे बड़ो बात कि नरी के की होतै !” हर साल

बनले सड़क के बनैलौं जाय छै । सालो नै पुरै छै कि सड़क के गिट्टी-छर्री नाली में । फेनू पहाड़ के काटो-तोड़ो आरो सड़को पर बिछावो । अरे लोगें समझै छै कैन्हें नी कि सड़क तें हजार बनैलौं जावें सकै छै, मजकि पहाड़ की वैं दोवारो बनावे पारतै ? अरबौं साल उथल-पुथल के बाद एक पहाड़ मिलै छै, लोगें समझै छै, दनादन तोड़लें जाय छै ।”

“एकदम पागल छेलै, कोय बात मिलना चाहियो, बस वहे पूछ के लंका में हनुमान रो पूछ बनाय लेलकौ । जे चीज कोय सुनहौ ले नै चाहलकौ, वै पर वैं घंटो सोचलकौ....ही.....ही.....ही.....ही ।”

“यहे कहै छैं, एक दिन के बात सुन । ऊ आपने मुहल्ला के बैजानी चौधरी सें लड़ी गेलै । आबे भला तोंही सोचें—कहाँ राजा भोज आरो भोजबा..... । चौधरी जी मंत्री भेलै, दस पुलिस तें संगे-संग लागले रहे छै.....हौ तें वही दिन ठोकाय जैतियै, समझें कि औरदा नै पुरलौ छेलै ।”

“मजकि ऊ भिड़ी गेलै कौनी बातों पर ?”

“अरे बात की होतै । ऊ जे पुलिसिया नै टुटलै आरो वैमें दस ठो मजूरो नै दबी के मरी गेलै तें चौधरी जी नें कहलकै कि एक-एक मजूर के दस-दस लाख मिलतै, साथे-साथे एक-एक परिवार के एक-एक आदमी के सरकारी नौकरियो....बस वही बातों पर.....हम्में पूछै छियौ, मंत्री टाका आकि नौकरी देतियै की नै देतियै, ओकरा कथी ले लबर-लबर करना छेलै....ऊ तें कहैं कि चौधरी जे के अमला-कफला ओकरो कालर पकड़ी के धकेली देलकै, नै तें जे रं पुलिस सिनी सावधान होय गेलौ छेलै कि तखनिये ओकरा नेक्सलैट कही के ठोकिये देतियै ।”

“बतावैं, हौ रं अपमानित होला के बादो ओकरा में कोय सुधार छेलै की ?”

“सुधार कहै छैं, अरे ऊ तें हेनो पागल छेलै कि कांके के डॉक्टरो ओकरो ईलैज करतियै तें डॉक्टरे सिनी पागल होय जैतियै, वै पर ऊ नै सुधरतियै । सुनें एक कहानी.....अच्छा तोंही कहैं, कोय हेनो मुहल्ला छै, जेकरो गली साँकरो-साँकरो नै छै ? दसो फीट के गल्ली छै तें लोगें दुआर के सीढ़ी हेनो बनैलै छै कि आधो सड़के पार ।”

“ई तें छोड़ी दें, पगलवा रो गल्ली में तें सब्भैं आपनो दुआरी सें ले के बीच सड़क तांय ससरौआ बनैलै होलो छै कि कार हुर सना घोर दुकी जाय ।”

“आबे तोंही सोचें, एक बनैतें तें दुसरो केना चुकतै । ओकरा गाड़ी रहौ कि नै रहौ; वहूँ ससरौआ दुसरो दिशो सें बनाय लेलै छै.....गली के सड़क तें जेना घाटी के बीच नाली । आबे सुनें पगलवा रो बात—ऊ कभियो ऊ मुख्य गली सें नै निकलै, सुरंग नाँखी चिमनिया गली सें निकली जाय, मजकि गली के पक्की

सड़क से नै । ओकरा ई दिरिश देखले नै जाय—भले यै से केकरौ कुछ मतलब नै रहे ।”

“केन्हें नी; पगलवे के तेँ एकटा आँख छेलै, बाकी तेँ सब सूरदासे, ही....ही.. ही...ही ।”

“तहूँ की याद दिलाय देलैं । ऊ तेँ आँख रहतौं अन्हरे छेलै । रस्ता में केकरो उटपटांग चाल-ढाल देखै कि आँख मुनी लै, आरो जोँ मानी ले कि तखनिये उटपटांग ढंग से चलतें कोय ठेलावाला आकि मोटरसाइकिल धक्का मारी देतियै, तबेँ ?”

“मारी केना देतियै, ऊ तेँ आपने नाली सेँ सटले-सटले हाथ भरी अलग हटी केँ चलै—साइकिल-ठेला के डरोँ सेँ । एक दिन तेँ बिना धक्के खैले नाली में फच सना ससरी गेलै, ही, ही, ही, ही, ही ।”

“अरे रे रे रे, तोहें जोन दिनकोँ है बात सुनैलें, ठीक वहा दिनकोँ एकठो आरो बात सुन । मारवाड़ी पाठशाला के कोनमा वाला नल.....जानवे करै छैं, ऊ तेँ दसो सालोँ सेँ बिना टोटिये के ओन्है बहतेँ रहै छै ।”

“वहेँ नल की, शहर के सब्भे सरकारी नल के वहेँ हाल छै.....”

“वहेँ तेँ सुनाय रहलोँ छियौ.....है तेँ तहूँ जानै छैं कि कोनमै पर विजयेन्द्र जी आपनोँ कॉर्पोरेटिव ऑफिस खोली केँ कत्तेँ परेशान छेलै ऊ पागल सेँ । साँझकी ओकरा हुन्ने सेँ गुजरन्है छेलै आरो पानी केँ हेन्हें बहतेँ देखै तेँ सीधे ऑफिस घुसी जाय आरो विजयेन्द्र पर लागै उपदेश झाड़वोँ, “हेन्है केँ चलतै देश-सेवा आरो समाज-सेवा विजयेन्द्र भाय ? एकठो नल के तेँ वेवस्था करेँ नै पारेँ छौ, वै पर बड़का-बड़का मोर्चा के संयोजक बनी गेलौ ।” ओकरा सेँ विजयेन्द्र एहें तंग छेलै कि ओकरा देखतहैं स्टोररूम में घुसी जाय आरो निकलै तेँ गेला के खबर पैल्लै पर ।”

“हा, हा, हा, हा, हा ।”

“आरो आगू नी सुन ! दिनकोँ बात छेकै । नल के पानी नाली में वेग सेँ बही रहलोँ छेलै, कोय भरवैया नै.....ऊ सीधे सीढ़ी केँ लांघतेँ ऑफिस तरफ बढ़लै आरो विजयेन्द्र जी तेँ भनक मिलतहैं स्टोर रूम में ।.....है सब बात जखनी कोनमावाला पनवाड़ी सुनावै छै, तखनी मजा आवै छै । पगलबा गुरगुरैतेँ नीचें उतरलै आरो पहिलेँ तेँ नल के मूँ पर हथेली रखतेँ कुछ देर लेली खाड़े रहलै... ..हाथ हटैलकै तेँ वहेँ रं पानी होँ-होँ.....तबेँ जानै छै वै की करलकै । जेबी से आपनोँ रूमाल निकाललकै आरा नल के मूँ में पेंच नांखी अमेठी-अमेठी केँ घुसाय देलकै । मजकि पानी के हौ वेग, भला रूमाल केँ की बुझतियै । पहिलेँ

तेँ छुर-छुर करी केँ हिन्नें-हुन्नें सेँ पानी निकललै, फेनू हेनोँ धक्का मारलकै कि पगलवा के रूमाल नाली में । ही.....ही.....ही.....ही ।”

“हा....हा....हा.....हा, एकदम घोर पागल छेलै । जानै छैं, एक दिन की देखलियै ? देखै छियै कि खलीफाबाग चौक के एक दुकानी के बाहर खड़ा छै । हौ चित्रशाला वाला पिन्डा नै छौ, वही पिन्डा पर आरो टुक-टुक चौकोँ पर खड़ा पुलिस के छतरी केँ ताकी रहलोँ छै । पीठी पर हाथ धरी पूछलियै तेँ कहलकै—‘आपनोँ आदर्श चौक देखी रहलोँ छियै—स्मार्ट सिटी रोँ स्मार्ट चौक । देखै नै छैं—की रं पाँच-पाँच गाय सड़क के बीचो-बीच बैठलोँ जुगाली करी रहलोँ छै । खाड़ोँ साँढ़ पुलिस के डंडा नाँखी नेंगड़ी भांजी रहलोँ छै । बोहोँ में खोरपतार, गाछ-बिरिछ आरो मरी नाँखी कार, फटफटिया, साइकिल, ठेला बही रहलोँ छै—हेनोँ आदर्श चौक मिलतौ कहीं दुनियाँ में ? ई चौराहा छेकै कि गोशाला—हम्में आय तांय नै समझेँ पारलियै ।’ आरो ई कही ऊ एकदम खामोश भै गेलै भाय, जेना गोबध लागी गेलोँ रहेँ ओकरा ।”

“आरो देखैं, वहेँ गाय-साँढ़ के बेलगाम दौड़ में पगलवा के आखिर जानो चल्तोँ गेलै । जानवे करै छैं, गरमैलोँ गाय के पीछू जबेँ साँढ़-बैल दौड़ै छै, तबेँ तेँ रास्ता में केकरौ की देखहौ लेँ चाहै छै.....वहेँ धरमशाला के सामना.....उमतेलोँ साँढ़ दौड़लै तेँ एक बूढ़ोँ भागै के फेरा में हिन्नें-हुन्नें करेँ लागलै । ठेला, साइकिल, कार—भागोँ तेँ कन्नें भागोँ.....हुरै लेँ साँढ़ बढवे करलोँ छेलै कि पगलवां देखलकै आरो बूढ़ा केँ एक दिश धकेली देलकै । धकेली केँ भागी नी जाना चाही, से नै, ताकेँ लागलै कि बूढ़ा केँ चोट तेँ नै लागलै, कि तखनिये साँढ़ें सिंगी सेँ फाड़िये तेँ देलकै पगलवा केँ.....दोनों सिंगी पर पहलेँ तेँ ओकरा उठैलकै आरो नीचेँ होन्है केँ पटकी देलकै, जेना कोय मजूर भारी-भरकम सिमेन्टी के बोरा केँ जमीनोँ पर पटकी दै छै आरो फेनू पेटोँ में सिंगी केँ घुसाय केँ हिलकोरी देलकै । मिनटो नै लागलोँ होतै—फुटलोँ बेलुन नाँखी लेटाय गेलै माँटी में ऊ.....खून तेँ दर-दर ।”

“चू, चू, चू जे कहैं, पगलवा रहै छेलै सब्भे वास्तेँ चिन्तित । चल दू मिनट ओकरोँ आत्मा के शांति लेँ खाड़ोँ हो जइयै—वहीं चौधरी जी के लकड़ी-गोला में । कोय आरो आवै वाला तेँ छौ नै—हमरा सिनी दू होलियै, गोला के विजय बाबू—तीन होलै आरो मुनी लाल—चार । बस खाड़ोँ होय जाना छै दू मिनट । आरो की । चल उठ ।”

“ठीक कहलैं, मजकि पहिले एक-एक ठो सिगरेट तेँ सुलगाय ले ।”

सुख

“बस आयके भर तेँ । कल फरचोँ होतै नै होतै कि हम्मं बोरिया-बिस्तर समेटी लेवै । अबकी तीन दिन नै आना छै । लदनी घोड़ा नाँखी खटवोँ सें आराम मिली जाय छै तेँ देहो-हाथ टनमनैलोँ लागै छै । आरो कैन्हें नी-जीरबामाय हाथोँ के बनैलोँ खाना खाय केँ के नै टनमनाय जाय । जेन्होँ तन्तोँ सें खाना बनाय छै, होने तन्तोँ सें खाना खिलैबो करै छै । जब तांय खाना रोँ एक्को कौर पत्ता में पड़लोँ रहै छै, टसकै नै छै । हमरोँ एकेक कौर पर ओकरोँ चेहरा खिलतेँ रहै छै, जेना, कै दिनोँ के बेमारी सें उठलोँ रोगी पत्थ देखी । जखनी आखरी कौर मुँहोँ में राखी गिलास उठाय छियै तेँ अघाय-अघाय जाय छै जीरबा माय । यही स्नेह तेँ ओकरोँ छेकै कि ई टूँठ जग्घा में रहै के एक जरा मोँन नै करै छै.... इखनी भागौँ कि तखनी भागौँजों गामे में जीयै लायक खर्ची निकली ऐतियै तेँ ई परदेश कथी लेँ जोगतियौँ ।” रिकशा पर बैठलोँ अजमेरी ई सब याद करी गेलै ।

अजमेरी आय चार महीना सें भागलपुरोँ में रिकशा चलाय छै । तीस-पैंतीस सें ज्यादा के होतै । काठी-कुठी मजबूत । मौका पड़लोँ तेँ दू-तीन सवारी के जग्घा में चार-चार तक खीची लेलकोँ । एक तेँ देह सें अलग, दुसरोँ ओकरोँ रिकशो हेनोँ कि केकरो मोँन ललची जाय वै पर बैठै लेँ । कमाय के पैसा काटी-काटी केँ वैँ ई रिकशा खरीदनेँ छै । यहाँ नै, दुमका में । आरो वांही सें चलैतेँ-चलैतेँ भागलपुर लै आनलकै । चार-चार ठो सवारी बिना कसमकुस के बैठै पारेँ । दू आगू में आरो दू पीछू में । सीट के पीछू एक काठ के पट्टी राखी

केँ सीट बनैलोँ गेलोँ छै ।

हेना केँ तेँ छोटोँ-मोटोँ सवारी ओकरोँ रिकशा के तड़क-भड़क देखिये केँ संकोच में पड़ी जाय छै—पता नै कत्तेँ किराया माँगी बैठेँ, मोल-मोलाय करवोँ उचित नै समझै, कुछ बोली नै देँ ।

होन्हौ केँ अजमेरी सवारी देखिये केँ रिकशा पर बैठलकोँ । दिन भरी में चार-पाँच लम्बा सवारी मिली गेलोँ तेँ रिकशा खटालोँ में जाय केँ लगाय देलकोँ । खटालोँ में रिकशा लगाय केँ ही ओकरोँ दस टाका रोज दैलेँ लागै छै । ऊ तेँ खैर कहूँ सुती लिऐँ पारेँ, मजकि रिकशा केना कहूँ छोड़ी देतै—नीन खुलै के पहिलेँ कोय रिकशे खोली लै जाय ! रिकशा खटालोँ में आरो कमैलोँ टाका हमेशे कमीज के नीचेँ गंजी वाला जेबी में, जेकरा वैँ कभियो नै खोलै छै । हफ्ता भरी के जमा पूंजी ओकरै में ।

ई कोय नै जानै छै कि साँझ केँ रिकशा लगैला के बाद अजमेरी रहै छै कहाँ । ठीक सात बजे ऊ खलीफाबाग के चित्रशाला लुग आवी केँ खाड़ोँ होय छै । स्टूडियो के मालिक रंजन जी, ओकरोँ आखरी सवारी होय छै । आरो ठीक आठ बजे बाद, जखनी ऊ खलीफाबाग लौटै छै, बिना रिकशा के होय छै । खाली हाथ डोलैनेँ ।

आवी केँ चित्रशाला के संगमरमर वाला बाहरी पिण्डा पर बैठी जाय छै । बस बैठवे भर के देर कि त्रिफला सबसेँ पहिलेँ ओकरे सामना में पत्तल परोसलकोँ । भले कोय रिकशावाला ओकरा सेँ पहिलेँ केन्हें नी ऐलोँ रहेँ । ई चौराहा पर बीसो रिकशा खाड़ोँ होय छै आरो बीसो रिकशावाला केँ त्रिफलैँ खाना खिलाय छै । ऐलोँ गेलोँ, खैलेँ गेलोँ, मजकि अजमेरी आपने टैम पर आवै छै—ठीक आठ बजे ।

आय हुवेँ सकै छै, वैँ त्रिफला हाथोँ के खाना नहियो खावेँ सकै; जीरवे माय के हाथोँ सेँ बनलोँ खाना खाय । बस दू-चार टा मोटोँ-मोटोँ सवारी तेँ मिली जाव । सौ, सवा सौ होय जाय, तेँ की कहना—वैँ मने-मन सोचलकै—एकरा सेँ कम आमदनी होलै तेँ ऊ आय घोर नै लौटतै । आयकोँ रात यहीं । एक रात त्रिफला हाथोँ के खाना आरो, फेनू तेँ तीन दिन नहिये नी । होन्हौ केँ त्रिफलां जीरबा माय सेँ की कम मनोँ सेँ खिलावै छै खाना ।

“की हो, मायागंज चलवौ ? हस्पताल चलना छै ।”

अजमेरी के ध्यान टुटलै । सामना में एक जनानी एक बूढ़ा के हाथ पकड़ने ठाड़ी छेलै । कपड़ा-लत्ता देखला सेँ बुझावै छेलै कि कोय पढ़लोँ-लिखलोँ घराना के छेकै । अभी ओकरोँ मनोँ में ई सवाल उठवे करतियै कि—पता नै..

.... कि तभिये जनानी फेनू बोललै, “बेटा, किराया के चिन्ता नै करियो”, जे टा तोरो किराया होय छौं, ओकरा सें दुगने देभौं, कम नै, बस आहिस्ता-आहिस्ता हमरा मायागंज पहुँचाय दा ।”

अजमेरी झट सीटो सें उतरी गेलै—किराया के सुनी नै, ऊ जनानी के भद्र बोली सुनी के आरो जबे दोनों सवारी लै के ऊ चललै ते ओकरो गोड़ पैडिल पर होन्हे कले-कले चले लागलै, जेना ओकरो गोड़ नै रहे, एक चाल में चलैवाला बैलगाड़ी के चक्का रहे—सड़क के बायां दिश रसे-रसे चलतें ।

होन्हौ के अजमेरी जबे खांचा-खुंची वाला सड़को पर रिकशा हाँकलको ते रसै-रसे—आपनो रिकशा छेकै, कोनो किराया पर नै । फेनू भागलपुर रो सड़क ते जेना एक्के चेहरा पर गोटियो के गड्ढा आरो ऐलाहो के माँस—दोनों । चेती के नै चलावो ते निनौन पुरी जाय रिकशा के । आरो इखनी ते हेनो सवारी बैठलो छेलै कि जरियो टा झोल पड़े ते सवारी नीचे । से अजमेरी आगू ताकै, ते घुरी-घुरी के पिछुवो ताकी लै ।

“मालकिन, बूढ़ा मालिक के ठीक सें पकड़ले राखो । ई ते हेनो सड़क छै कि रिकशा खाड़ो रहे, तभियो सवारी उछली के सड़को पर गिरी पड़े ।” सराय होय के जबे भी अजमेरी रिकशा निकालै छै, सवारी सें ई कहवो नै भूलै । तखनी है बात कहै में ओकरो चेहरा अजीबे रं होय जाय छै ।

कै दाफी ते कसम खेले छै कि भले दस मिनिट देर लागे, हिन्ने सें नै जाना । मजकि करवो करै की, जो पसैंजर यूनीवरसिटी तरफो के मिली जाय । आरो विहानको बेरा ते अधिकतर सवारी हिनरके मिलै छै । एक्को प्रोफेसर-टीचर मिली गेलो ते भीखनपुर सें मारवाड़ी कॉलेज तांय के पन्द्रह-बीस टाका । अय्यो होने सवारी सुथरी गेलै ते आबै ले पड़लै ।

प्रोफेसर कॉलोनी सें मायागंज जाय में ओकरा पूरे घंटा भर लागी गेलै । रुकलै, ते हैंडिल में फंसलो रबड़ के ब्रेक सें फंसैते वै बूढ़ा के उतरै में मदद करलकै । सोचले ते यहें छेलै कि सवारी उतरतै आरो ओकरा छोड़ी देतै, मजकि हेनो नै होलै । जनानी ओकरा रुकले रहै के बात कही वृद्ध साथें हस्पताल के हाता में घुसी गेलै ।

एकरो मतलब छै, आबे आधो घंटा देर—अजमेरी सोचलकै आरो फेनू रिकशा एक दिशो में लगाय, वै पर जमी गेलै । मने-मन हिसाब लगावे लागलै—यूनीवरसिटी सें मायागंज—कत्तो कम-से-कम ते पच्चीस टाका, रोकै के मतलब होलै, फेनू लौटती—पच्चीस । पचास टाका ते हेन्हे होय गेलै.....कहले छै दुगना देभौं । दुगना देतै की हेन्हे, घंटा, आध घंटा रुकतै ते पच्चीस टाका होन्हौ

केँ होय गेलै—जों देब्हौ करतै तेँ पचीसे टाका ज्यादाहै नी.....एत्तेँ बचाय-बचाय केँ लानै में एतना देना ही चाही.....जे सोची केँ हम्मं गदगद होय रहलोँ छेलियै, से हेन्होँ कोय बात नै छै । मेहनतानै भर मिली रहलोँ छै । हों, ई होलै कि एक्के सवारी हेनोँ मिली गेलोँ छै कि आबेँ दुसरोँ सवारी उठाय के जरूरते नै पड़तै । बस आराम सेँ रिकशा लगाना छै आरो नौगछिया वाली गाड़ी पकड़ी केँ सीधे कटिहार । कत्तो देर-सवेर होतै तेँ आठ बजे रात तांय पहुँचिये जैवै.....अच्छे होतै.....जखनी जिरबामांय हमरा हठाते ऐलोँ देखतै, तेँ केन्होँ गुदगुदाय जैतै—ई बात सोचहेंँ अजमेरी आपन्हेंँ ई रकम गुदगुदाय उठलै कि मत पूछोँ । चेहरा पर एक अजीबे चमक उठी केँ फैली गेलै ।

की-की नै सोचतें रहलै ऊ—जब तांय सवारी लौटी नै ऐलै । अनुमानो सेँ ज्यादा देर करी केँ ऐलोँ छेलै—पौने घंटा बाद ।

—चलोँ कोय बात नै छै, हिन्नें सेँ तेँ ढलुव्वे ढलाव छै । बीचोँ-बीचोँ में एकाध पैडिल मारना छै आरो सीधे खलीफाबाग, फेनू सराय चौक सेँ भैरवा तालाब तांय तेँ कोय दिक्कते नै—ऊ मने-मन बुदबुदैलै आरो सवारी केँ सावध पान करतें कहलकै, “दोनों आदमी, टप्पर के बत्ती केँ पकड़ी लिऐ, ढलाव छै नी, कत्तो कल्लेँ-कल्लेँ चलैवै, तेज होय्ये जैतै ।”

रास्ता भर वेंँ भरसक कोशिश करतें रहलै कि गाड़ी तेज न चलेँ, नै तेँ हेनोँ ढलाव पर ओकरोँ रिकशा केँ पंख लागी जाय छै—पंखवाला गाड़ी आरो अजमेरी ओकरा पर सवार । तखनी ओकरा सवारी के कोय ख्याल नै रही जाय छै । मजकि की मजाल, कि रिकशा रास्ता सेँ जरिया टा बेरास्ता होय जाय ।

आधो घंटा नै लगलोँ होतै कि रिकशा फेनू वहेँ जग्घा पर । आरो जखनी ओकरोँ हाथोँ में भाड़ा के सौ टाका पड़लै तेँ ऊ खुशी सेँ गनगनाय उठलै । बड़ी गौर सेँ दोनों सवारी केँ देखलकै, पहलेंँ एत्तेँ ध्याने नै देलेँ छेलै—जनानी रेशमी साड़ी में आरो मरदाना रेशमी कुर्त्ता में, शांतिपुरी धोती—एकदम चकचक, कोय बहुत बड़ोँ घराना के बुझाय छै । आपनोँ कार नै होतै, ई बात हुऐ नै पारेंँ, या तेँ गाड़ी में कोय खराबी आवी गेलोँ होतै आकि ड्रायवरे नै ऐलोँ होतै, तहीं से रिकशा करै लेँ लागलै—एक क्षण में वेंँ बहुत कुछ अनुमान लगाय लेलकै ।

सवारी एक नमरी थमाय केँ हेने आगू बढी गेलै, जेना वेंँ कुछ ज्यादा नै देलेँ रहेँ, ओकरोँ वाजिबे भाड़ा भर ।

अजमेरी नमरी केँ निरयासी केँ देखलकै, उलटैलकै, पलटैलकै, आँखी के आगू लानी केँ कुछ मिलैलकै आरो फेनू जतन सेँ मोड़ी केँ गंजीवाला जेबोँ

में राखी लेलकै, जेकरा वैं बदन से कभियो नै उतारै—बस चार-पाँच रोजों के बादे, घोंर पहुँचलै पर ।

—आबे की कमाना छै । होय गेलै । जीरबामाय के हाथों में जखनी पाँच सौ टाका राखवै, तखनिको ओकरो खुशी के लिखे पारे । मजकि पाँच सौ टाका वास्ते ते ओकरो पास आरो पचीस टाका होतियै, तबे नी । पाँच सौ हटैला पर ते ओकरो पास पचासे बचे छै, ये में खटाल मालिको के देना छै आरो भाड़ाओ । बस एक-दू पसँजर आरो उठाय लिये ते बीस-पचीस होय जाना दायां-बायां के बात छेकै । फेनू हेनो रिकशा पर ते हुभों आदमी चढ़ैले चाहे छै—मने-मन सोची ऊ मुस्कैलै आरो रिकशा मोड़ी लेलकै ।

खलीफाबाग दिश नै जाय के नया बाजार दिश मुड़ी गेलै ।

चढ़ाव पर भाड़ा दू पैसा लगैय्ये के मिलै छै । आवे जों गाड़ी निकालिये लेले छिये ते की आधो दिन आरो गोठो बेरा.....मतरकि नै, सवारी मिललो जाय छै ते की, आय उठायवाला नै छिये, भले आय घोंर नै जावं ते नै, मजकि गाड़ी एक बजे ते लगैय्ये देना छै । लगाना छै आरो बस बैठी रहना छै सिनेमा हॉलो में—उड़ी-उड़ी बैठे मरवड़िया दुकनियाँ.....इस्स, एकेक गाना जोरदार छै, दू बार देखलिये, मोंन नै भरलै, की पता, लौटी के आवों आरो फिल्मे गायब । भीड़ो ते नै जुटे छै, मजकि जे पूछो—नौटंकीवाली के नखरा आरो गाना एकदम झकझोरी दै वाला छै—सोचतैं अजीबे स्थिति होय गेलै अजमेरी के—आँखी में मेला के नाच, कानों में ढोलक के थाप आरो मुँहो पर रही-रही वहे गीत के एक पंक्ति—उठी-उठी बैठे मरवड़िया दुकनियाँ ।

आरो ठिकके एक बजे रिकशा खटाली में लगाय के अजमेरी सिनेमा हौलो में जाय के बैठी रहलै । जबे सिनेमा हौलो से निकललै ते ओकरा नमरी सिनी याद ऐलै । गंजीवाला जेबी में हाथ डाललकै, कुछ हेनो डंग से, कि कोय है नै समझे—टाका समेटी रहलो छै, समझे ते यहे समझे कि पनखोका में खुजली उठी गेलो छै, वही खुजलाय छै । देखैय्ये लेली वैं दू-तीन दाफी पनखोका खुजलैले छेले—कोंन ठिकानो, ऊ नौटंकी वाली के देखे में मशगूल रहे आरो हिन्ने टेवा में पाकिटमार.....बाप रे बाप, जों टिपिये लेले होतै ते वैं जिरबामाय के हाथों में की देतै, जेकरा हम्मे केना जमा करै छिये, हम्मी जानै छिये—सोचतैं ओकरो माथो ठनकी गेलै । चुटकी ससारी-ससारी नमरी झब-झब गिनलकै—एक, दू, तीन, चार, पाँच । निश्चिन्त होलै ते फेनू वहा रं वैं हिन्ने-हुन्ने देह-हाथ खुजलैले छेलै ।

००

हाता से बाहर निकललै ते साढ़े आठ बजे रात होय छेलै आरो जखनी त्रिफला लुग पहुँचलै ते नो बजे लागलो छेलै ।

“की, आय एत्ते बेर ? कोय दुसरो त्रिफला मिली गेलै राह-बाट में की ?”

त्रिफला के ई बात सुनी के अजमेरी जाने ते कोन रसो से भीतर तांय भीगी गेलै । बोललै कुछ नै, मुस्की के रही गेलै । त्रिफलों जानै छै कि शनिच्चर आरो रविवार के ऊ शहर में नै रहै छै, आपनो गाँव चललो जाय छै—घर वास्ते कुछ कीनै ले निकली गेलो होतै । कत्ते हाय-हाय करतै, हेनो हाय-हाय में परिवारो के सुक्खे नसाय जाय—यही से अजमेरी कत्तो ओला-पानी केन्हे नी पड़ी, ओकरा कोय आंधियो तूफान नै रोके पारे ।

“बहुत देर होय गेलीं । सच पूछो ते तोरे ले दुकान अभी तांय नै बढैले छियै । नै ते जेकरा-जेकरा खाना छेलै, ऊ खाय के जैवो करलै ।” त्रिफलां बड़ी नेहो से धोलो थरिया के साफ कपड़ा से पोछते कहलकै । पोछी-पाछी ओकरो आगू करी वैमें भात रखलकै । सड़ियैलकै । गोल करी गड़ढा करलकै कि दाल डाले ते पसरे नै । दाल डाललकै आरो फेनु थरिया में दू तरकारी राखते कहलकै, “आलू के भरता-भुजिया ते खैतै रहलो छै । आय आलूदम खाय के देखौ । तोरो मनपसन्द के बनैले छियै—खटरुस वाला—टमाटर दै के । तोहे हेनो तरकारी ते जी-जानो से चाहै छै ।” सब एक्के सांस में कही गेलै—आलूदम वाला कटोरी ओकरो आगू राखते ।

ओकरा मालूम छै, आयको बाद अजमेरी आबे दू रोज बादे दिखतै । ओकरो थाली में कुछ कम होवो नै करै कि त्रिफलां ओकरो मना के बादो ऊ चीज जबरदस्ती राखी दै, “जी-जानो से खटै छै ते रुचो के जी भरी खैवो नै करवौ । गाड़ी खींचे के मतलब होलै बरदो रं मजबूत देहो राखो, खाय-पीयै में लाज की । कहै छै नी—एक घड़ी के बेशरमी, चौबीस घड़ी आराम ।”

त्रिफला के बात सुनतै अजमेरी के जिरबामाय के याद आवी गेलै—हेन्हे के ते वै खाना खिलाय छै, जोर-जबरदस्ती करी के । यहे रं के बात वहुं कहै छै—‘देह हाथ सलामत रहथौं, तबे नी घोर-गृहस्थी के भार । जो समांगे नै रहतौं’

ओकरा याद ऐलै—जिरबामाय हेन्हे के ते हमरो वास्ते देर तांय आसरा देखते बैठले रही जाय छै आरो कोय खाना बनावे न बनावे, झोरवाला कोय खटरुस तरकारी ओकरो वास्ते जरूरे बनैतै, जानै छै, ई होला से दू कौर ज्यादा खाय लै छियै.....ई बात त्रिफला के केना मालूम होय गेलै.....जनानी छेकै, सौ

दिन खाय छियै तेँ रुच जानी लेवोँ कोय बड़का बात नै.....

अजमेरी तेँ एकदम विभोर होय उठलै । एक-एक कौर पर गुनी रहलोँ छेलै—त्रिफला बारे में । ओकरा एकोँ सुधे नै रहलै कि ऊ घरोँ पर नै—चौराहा वाला चित्रशाला के पिण्डा पर बैठलोँ खाय रहलोँ छै आरो जिरबामांय नै, त्रिफलां ओकरा खाना खिलाय रहलोँ छै ।

त्रिफलाँ केँ कुछ समझै में नै ऐलै कि आखिर आय अजमेरी कुछ जवाब कैन्हें नी दै रहलोँ छै । ऊ परेशान होय उठलै, मजकि पूछलकै आगू कुछवे नै ।

अजमेरी के खाना खतम होय गेलोँ छेलै । एतेँ दिनों में ई पहले दाफी होलै कि वैँ थरिये में हाथ धोलकै । दोनों हाथ के अंगुली सिनी क्रम सेँ मुट्ठी में बांधतेँ दू-तीन बार हेनोँ घुमैलकै कि भीजलोँ हथेली सूखी जाय । त्रिफलां देखलकै, मजकि बोललै कुछयो नै । बस, थाली एक दिश हटाय केँ हड़िया-पतली झब-झब समेटेँ लागलै । समेटी-उमेटी जबेँ जुट्ठोँ थाली दिश आपनोँ हाथ बढैले छेलै कि अजमेरी ओकोँ हाथोँ में आपनोँ कमाय थमाय देलकै ।

त्रिफलां देखलकै, ओकोँ हाथोँ में दस टाका के बदला पाँच नमरी छेलै । ओकोँ आँख फाटी केँ रही गेलै । अजमेरी दिश देखलकै, हजार-हजार सवाल वाला आँखी सेँ, मजकि अजमेरी त्रिफला केँ देखलहौँ कहाँ देखी रहलोँ छेलै । बेसुध होय रहलोँ छै । टाका केँ राखतेँ नै देखलकै तेँ अजमेरी कहलकै, “राखी लेँ, सब दिन की समांग एक्के रं रहै छै ।” कहतैँ-कहतैँ जबरदस्ती नमरी सिनी त्रिफला के मुट्ठी में बांधी देलकै आरो झब-झब घंटाघर दिश अन्हरिया रातोँ में बढी गेलै ।

भय

ऊ आदमी आपनों चार-पाँच लोगों के साथें चन्दा माँगै लेँ ऐलोँ छेलै । देखैय्ये सें लागै कि ऊ सब चन्दा लेलेँ बिना कोय्यो रं जाय वाला नै छेलै । मुंशी चन्दा दैय्यो देतियै, मजकि जोँ न रं सें ऊ आदमीं रशीद पर पाँच-दस टाका लिखै के जग्घा पर सीधे पचास टाका लिखी देलेँ छेलै, ओकरा सें मुंशी के तेँ मिजाजे चढ़ी गेलै आरो वैं आपनों कुव्वत सें बाहर चन्दावाला केँ कही देलकै, “हम्मं चन्दा दै वाला नै, तोरासिनी केँ जे करना छौं, करोँ ।”

सुनहैं ऊ आदमी के रंग चढ़ी गेलै आरो कहलकै, “की कहलौ, नै देवै ! मुहल्ला में रहवौ आरो चन्दा नै देवौ । तेँ ठीक छै ! रे सुखना, चल । जबेँ अपहरण होतै; आपन्है आवी केँ पचास हजार टाका जमा करवैतै—फिरौती लै लेँ ।” आरो ई कही ऊ आपनों आदमी सिनी साथें बडबड़ैतें निकली गेलोँ छेलै ।

सब के जाय भर के देर छेलै कि मुंशी के दिमागे जेना चक्कर खावेँ लागलै । ओकरा कुछुवो समझै में नै ऐलै आरो ऊ सीधे आपनों घोर सें निकली केँ नगीचे के थाना जाय पहुँचलै । संयोगे छेलै कि थाना के बड़ा बाबू कुर्सी पर आराम करतें मिली गेलै । मुंशी केँ देखलकै तेँ बिना उकुस-पुकुस करल्लैं बोललै, “की छेकै मुंशी, हिन्नं केना ? तौहे तेँ बोलतें रहलोँ छैं कि भला आदमी केँ थाना-फाड़ी सें की काम ?”

“धोखा में छेलियै बड़ा बाबू । आयकल तेँ भगमानो केँ थाना-फाड़ी के बिना राहत नै ।”

मुंशी के बातों में रस के गंध मिललहैं बड़ा बाबू कुर्सी पर सीधा होय गेलै आरो बोललै, “बोलें, की बात छै ?” एक भेद भरलौ नजरी सें बड़ा बाबू मुंशी के देखलकै ।

“हेनो छै कि अभी कुछ लोग हमरो घरों पर ऐलै—चन्दा माँगै लै आरो हमरो मोन के खिलाफ रशीद पर अपने मने पचास टाका लिखी देलकै । जबे हम्मं नै दे के बात कहलियै ते वै में एक कही गेलै—‘आबे अपहरण होला के बादे पचास हजार टाका पहुँचवैतै ।’ हम्मं जानै छियै कि ऊ सब कत्ते खतरनाक किसिम के लोग छेकै, कभियो कुछ करे सकै छै ।”

बड़ा बाबू मुंशी के ओकरो बातों सें एक पल में तौली लेलकै, आरो फेनू वहा रं कुर्सी पर जमते हुवे कहलकै, “ते फेरू जो, जबे अपहरण होतौ, ते कहै लै अय्ये आकि रिपोर्ट करैय्ये । अभी कधी ले आवी गेलो छैं—माथो चाटे ले ।”

“मजकि अपहरण के बाद हम्मं यहाँ केना आवे पारौ ?”

“सब होय छै” आरो हठाते बड़ा बाबू उखड़ते बोललै, “थाना के कबाड़ी के दुकान समझी राखले छैं—कहीं कुछ बात होलै नै कि सीधे थाना पहुँची गेलौ । भागै छैं कि नै यहाँ सें ?”

आरो वही दिन मुंशी शहर छोड़ी के भागी गेलै ।

रहस्य

चुनाव जीतते नेताजी धर्माचार्य लुग गेलै आरो सब तरह के समृद्धि, सफलता वास्ते आशीर्वाद मांगलकै ।

धर्माचार्य ने लाल कपड़ा में लपेटलो एक धर्मग्रन्थ हुनको हाथों में थमैते कहलकै, “एकरो नियमित पाठ तोरो यश आरो समृद्धि के दायक बनतौ ।”

नेता जी आपनो दोनों हाथों से ओकरा लेलकै आरो ओकरा पर माथा रखते, बगल में सावधान मुद्रा में खाड़ो एक संतरी के देलकै ।

फेनू मंत्रीजी एक सफेद कपड़ा में लिपटलो एक ग्रन्थ धर्माचार्य दिश बढ़ैलके । हुनियौ हौ किताब दोनों हाथों से लेलकै आरो ओकरा से माथो लगैते सामना के सिंहासन पर राखी देलकै ।

